

BATOZIWA BA KWA NAKO YA MAUNGULO



Muzuhile, sicaba. Halu amboleñi ku Mulena luna cwale. Mulimu Yomutuna, Mubupi wa mahalimu ni lifasi, Yena ya luketile ka Bumulimu mwa nako ye kakusasana cwana, kuto Ku lapela. Mi cwale he, Mulena, mwa lipilu za luna luipeye ka kufebelela kwa tato ya Hao ya Bumulimu ni kubeleka kwa Moya o Kenile mwahali ku luna, kuli lu tahise So bata kuli luzibe. Takazo ya luna ki kuba Bakreste babande ni bayemeli babande ba Hao. U Alabe se ku luna kakusasana cwana, halunze lu libelela ku Wena, ka Libizo la Jesu Kreste. Amen.

Ha muine. [Yomuñwi uli, “Nizuse tusila twa litapelo nji?”—Mu.] Eeni.

² Lutabile hahulu fa kuba mo kakusasana cwana hape, mwa—mwa sebelezo ya Mulena yomutuna. Mi lu swabile, luna, hape, kuli haluna sibaka sa ku bulukela sicaba, kono lusazo . . . Luka lika kueza ze lu kona kaufela, mwatasa lika zeñwi.

³ Cwale, babañata bana ni litaulo ni likupo ze beilwe fa kuli lilapelelwe. Ni libeya fela kwa neku leliñwi; isiñi kuli Na li tokolomoha, kono Ni ka li lapelela sihulu kasamulaho Ni mano . . . sina, ni busihu bwa kacenu. Na kakusasana cwana, mi hape ni busihu bwa kacenu hape, fani . . . Mi Ni ka lapela ni ku libelela Moya wa Mulimu kwa foliso, mi fani kona fo Ni tabelanga ku lapelela li—li taulo ni lika zeñwi.

⁴ Mi kwa likupo ze ipitezi, Billy uli file, mutu ni mutu, ku na. Kuna ni babaeza mianda yemilalu, mi Ni nani fela, libaka ze siyezi. Mwa bona, Ni sweli fela kuba fumanela sesiñwi kapili, mi mutu kaufela, yo Ni kona kufita ku yena. Ni ka fita kubona kapili fela mo Ni konela. Hanina ku kona kuba ni bona kaufela. Kufita fela mwani, ni lukela kunga alimuñwi, muli, “Mulena, haibe yena *yo*, mi ibe yena *yo*?” Ona cwalo fela, kakuli bona, mutu ni mutu, yatokwile, likupo zaluli; sesiñwi, haku kakanyiwi, kuli lu lukela kuambola hamoho ka zona. Mi Na . . . Konji, mwa ziba, fokuñwi Moya o Kenile wa kona kubulela taba yeñwi ye Ni balile, yeli fa pilu yaka; Ni kuta kusani hape, ni ku batisisa mwatani kufita Ni ifumana. Kusicwalo, ki ku talima fela ona cwalo.

⁵ Cwale, hape lu bata kubulela kuli, kakusasana cwana, ni kulumelisa bani babali kwande mwa libaka zeñwi za naha. Lu bata kulumelisa balikani ka mukwa wo wa luwaile, kwa New York City; Beaumont, Texas; Prescott, Arizona; Tucson, Arizona; San Jose, California; Connecticut; Gainesville, Georgia; ni New

Albany, Indiana; mwa buse bwa linaha. Lwa mi lumelisa ka Libizo la Mulena Jesu.

⁶ Kakusasana cwana, mwa Indiana, ki kakusasana wo munde. Ne lu na ni pula maabani busihu ye batisize buino bwa moya. Mi luna . . . Tabernakele itezi hande, mi mutu ni mutu wa libelela, ka tibeledo yetuna, kwa tuto ya sikolo sa Lasunda. Mi Ni sepa kuli bufumu bwa limbuyoti za Mulimu bukaba fahalimwa mina kwande kafo.

⁷ Mi lwa sepa, kapili cwanoñu fa, kueza ka nzila—nzila ye lu nani, ko lu kona kutaha luna kaufela hamoho, mwendi mwatasa tende yetuna, ko Ni ikutwa kuetelelwa kwa luli kuli ni kutaze fa Manaka a Supa a mafelelezo mwa Bibebe.

⁸ Kacwalo he, ili kuli lusike lwaba nako yetelele hahulu fa tuto kakusasana wo . . . Ni batile Mulena, na nahana kuli, “Ki sikamañi se Ni kona kubulela?” ka kuziba kuli ye ikona kuba sebelezo ya mafelelezo yelukaba ni yona. Kutaha kwa Mulena ku sutelezi hahulu fa kaufi!

⁹ Na bona, kasamulaho wa kunuha kwani kone kubile mwa California, kuna ni mandu kwani, ni libaka, ze tiba ka buima bwa mainci a mashumi a malalu ka hola, likota linze lipazauha ni kulobakeha. Mi haba zibi sesisweli kueza cwalo. Lu kwa maungulo. Mandu aeza ma dollar a handeleti sauzande, kutiba. Ni na ni litaba zetuna mwa mutende, maswaniso, ao Ni bata kutisa busihu bo, sina ha Ni bata ku bulela sesiñwi ka sona busihu bwa kacenu.

¹⁰ Mi, hasamulaho, busihu bwa kacenu luna ni ku lapelela bakuli. Mutahe mwa musihali wo, faifi, sikisi kiloko, kamba nako yeo kaufela. Luka kala ka kuitahanela, Na sepa, fakuli sicaba sizwe kapili, mi mu amuhele makadi amina a litapelo. Mi lu ka lapelela bakuli busihu bwa kacenu, haiba Mulena alata.

¹¹ Cwale, kasamulaho wa ku nahana ka litapelo, “Ki sikamañi se Ni lukela kueza?” ka ku ziba kuli zazi leliñwi Ni lukela ku yo alaba ka se Ni bulela fa . . . Mi Ni iketezi, kamba ku ikutwa ku etelelwa ka Moya o Kenile kuli ni ambole kakusasana cwana fa bupolofita, ka mukwa wa ku luzibisa. Mwabona? Ki nto yeñwi ya kuli . . . Haiba halusika zibiswa, mi sika sesiñwi sa ezahala ka kusa itukisa fela, lu lukela ku ziba za teni. Moya o Kenile ulufile sona, ili kulemusa batu ka ze taha. Mwa ziba, Bibebe iize, kuli, “Mulimu hakuna sa ezanga konji pili Abonise batanga ba Hae, bona bapolofita.” Mi—mi mane cwalo kuli Jesu na lemuisse sicaba, sene sika ezahala; kamo bapolofita neba lemuisse sicaba, sene sika ezahala. Mi sa lu susueza cwale, mwa hola ye tuna yeo lupila kuyona, kuli lubone lusika lolu pila kulona, mi kiñi sesi ezahala, kiñi sesi ka ezahala mwa lusika lo. Kacwalo iliñwi ya lituto zenca ze zona ze lubile lubalanga ka linako zeñata, siwezi fa pilu yaka kuli—kuli ni bulele kwa sicaba kakusasana cwana.

¹² Cwale halu apuleñi Libibele zaluna mwa Mateu kauhanyo ya 24 ni kubala siemba sa Linzwi. [Muzwale Branham waikomona fa mumizo wa hae—Mu.] Muni swalele. Ka nzila ya—ya kunga tuto ya palo yaluna ni ngambolo.

¹³ Cwale, muhupule lu ka luta taba ye sina sitopa sa Bibele, ka kuiketa. Munge lipotoloto za mina ni mapampili. Ni na ni Mañolo amañata añozwi fa, ao—ao mukona kuñola. Mi muye kwa mandu muyo abala, kakuli se siswana fela sina sikolo sa sitopa sa Lasunda, kuli lu kone ku ziba, mi lu lemuswe ni ku itukisa ka liholo ze lupila ku zona.

¹⁴ Mwa Buka ya Mulatiwa Mateu. [Muzwale Branham waikomona fa mumizo—Mu.] Muni swalele. Timana yabu 24 . . . Kamba, kauhanyo yabu 24, nitaluse, kukala ka timana yabu 15, Ni bata kubala siemba sa Linzwi la Hae.

Mi ha mu ka bona bumaswe bobu shandaula, bobu bulezwi ki mupolofita Daniele, kuli buinzi mwa sibaka se si kenile, (ya bala, a utwisise:)

Fohe baba inzi mwa Judea ba sabele mwa malundu:

Ya li fa situwa—situwa sa ndu a si ke a shetumukela kuyonga sika mwa ndu ya hae:

Mi ya inzi mwa simu asike akutela kwa hae kuyonga kubo ya hae.

Ba ka ba ni bumai basali baba itwezi, ni baba anyisa mwa mazazi ao!

Kono mulapele kuli kusaba kwa mina kusike kwaba ka nako ya maliha, kamba ka lizazi la sabata:

Kakuli kukaba ñalelwa yetuna, ya kuli lali kusimuluha lifasi kutisa nako ya cwale, ha ku sikaba, kale ñalelwa yecwalo mane ni kwapili.

Mi kambesi kuli mazazi ao aka fukuzwa, nekusike kwaba mutu yana ka piliswa: kono kabakala baketwa mazazi ao aka fukuzwa.

Mi mutu hakali ku mina, Mubone, Kreste u kwanu, kamba kwani; musike mwa mu lumela.

Kakuli ku ka taha bo Kreste ba buhata, ni bapolofita ba buhata, mi ba ka eza limakazo zetuna ni liponiso; kuli mane, kambe ki nto ye konahala, baka puma nibona baba ketilwe.

Amubone, Ni mi bulelezi kale.

Cwale ha ba kali ku mina, Amubone, umwa lihalaupa; musike mwa zwela kwateni: amubone, umwa muzuzu wa ndu; musike mwa lumela.

Kakuli sina lumonyi lwa pula ha lu taha kwa upa, lu yo bonahalela ni kwa wiko; kona mo ku kabelo ni kutaha kwa Mwana mutu.

Kakuli ko kuinzi situpu ki ko limbande lika kubukana kwateni. . .

¹⁵ Cwale, ka kuba tuto, Ni bata kunga timana yabu 24, ka kutiisa fa timana ye kwa tuto yaluna ya sikolo sa Lasunda kakusasana cwana. Mi muteeleze hande ha Ni nze nibala fateni, hape.

Kakuli ku ka taha bo Kreste ba buhata, ni baplofita ba buhata, mi ba ka eza limakazo zetuna ni liponiso; kuli mane, kambe ki nto ye konahala, baka puma nibona baba ketilwe.

¹⁶ Cwale ka tuto kakusasana cwana, kamba palo, nitaluse, Ni bata kunga yeli: *Batoziwa Ba Kwa Nako Ya Maungulo*. Yani kona tuto yeo Ni bata kubulela fateni, kamba yona palo: *Batoziwa Ba Kwa Nako Ya Maungulo*.

¹⁷ Ni lumela kuli lupila mwa nako ya maungulo. Ni sepa kuli buñata bwa mutu ni mutu wa . . . Mubali wa Mañolo, kamba mane mu—mu lumeli, wa ziba kuli lu inzi kwa mafelelezo cwale a makande a akale a lifasi. Hakuna kuba tuso ya kuañola, kakuli hakuna kuba mutu ya ka abala. Seli kwa maungulo a nako. Ki lili, ha Ni zibi. Butelele bo bukaba teni, nihaiba ona Mangeloi a Lihalimu hazibi muzuzu wani kamba hola. Kono lu bulelezwi ki Mulena Jesu, kuli, fani lika ze lubona ze cwale alika kala ku ezahala, kona kuli lu nanule litho zaluna kakuli kuliululwa kwa luna ku sutelezi fakaufi. Cwale, seo “kusutelela fakaufi” kutalusa, ha Ni zibi. Ikona kutalusa . . .

¹⁸ Sina ba sayansi hane babulezi zazi leliñwi, fa mazimumwangala, kubulela ka za limeale zetuna ze likiti za kifisi lelika pazuha ni kutiba. Na buzizwe puzo, “Ne likona kutiba kwani?” Yani ki Los Angeles, siemba sa Likamba la Wiko. Mi buñata bwa mina muboni mone ba lilatelezi ka siitusiso sa masupeza nzila, ni kuya mwa halimu cwalo . . . neli ku pazuha mwatasa San Jose, kuya cwalo kuyofita mwa Alaska, kuyopunya cwalo ni kwa Aleutian Islands, mwendi ki limeale ze mianda yemibeli ka kukena mwa nuka, ni kukuta kwani kwa San Diego, kuya cwalo kwa mulaho wa Los Angeles, ni kukuta kwani, ki mukoti o mutuna.

Ni lizikinyeho ze kaufela zelubile ni zona ki ku pazuha kwa macwe mwa mubu kona zepangile mukoti tuna wo, cwalo, mwahali mwani. Hani koni kupunda libizo lene ba—ba ibiza. Kono, sani hasi nyanganya, sani sitisa ona lizikinyeho zelubile ni zona kwa Likamba la kwa Wiko. Cwale lipazuhile mwa maneku kaufela. Mi ba sayansi ba bulezi kuli, alimuñwi . . .

¹⁹ Mutu naize ku yomuñwi, “Sani ne si ka kona kuwela mwahali?”

Ki hali, “Isiñi ‘kukona,’ kono sika wa.”

Ali, “Kono isiñi mwa lusika lwa luna, mwendi?”

Ali, “Mwa mizuzu iketalizoho ye tatama, kamba myaha iketalizoho yetatama. Ha lu zibi fela kuli ki lili.”

²⁰ Sunda ye, ne ba ni lumezi taba ya mwa mutende, ka za mandu aeza ma dollar a mianda-ye-likiti ya mali a pazauha ni kutibuka, sicaba si nze sizwa mwatani. Mi ha ba zibi mwa ku li tuheliseza. Hakuna nzila ya ku lituhelisa. Mwabona, Mulimu wa kona kueza sika kaufela Sa bata kueza, mi hakuna mutu ya kona ku Mu bulelela mwa ku ezeza.

²¹ Mu yaha mandu, mwa kona kueza lika za sayansi, mi Mulimu ki Mubupi wa sayansi. Kana muka Mu tuhelisa cwani? Wa kona kusinya lifasi le kakusasana cwana ka linda haiba Wa lata. Kana mwa lemuha, Na bulezi mi linda za taha, mi za kona kuba ka limaele ze mashumi amane mwa butungi ka licika la hola, mwabona, hakuna sika . . . ni kuca batu kuba zusa mwa mubu. Yena ki Mulimu. Yena uezanga fela ka Mwa latela. Yena ki ya ipitezi, ku Yena muñi.

²² Cwale, ka kubona bupaki bo kaufela bo bu fumanwi, ili mwahala hola yelupila kuyona cwale, Na sepa ki nto yende ku kutela lika ze ni ku lihoha mwatani, haibile Maswayo a kwaluhile, ni kufumana buniti bwa lika ze, sina Mulimu habile ya luutwela hahulu, ka muhau wa Hae, ku lubonisa lika ze.

²³ Ni bata kuli mulemuhe fa mwa Mateu 24, Jesu naitusisize linzwi lakuli “Bokreste,” B-o-k-r-e-s-t-e, “Bokreste.” Isiñi Kreste, kono “Bokreste,” ka buñata, isiñi alimuñwi. “Bokreste.” Kabakaleo, linzwi la kuli *Kreste* litalusa “Ya tozizwe.” Mi haiba ki “batozizwe,” hakuna kuba alimuñwi fela, kono babañata, batozizwe, “ba batozizwe.” Mwabona?

²⁴ Kusicwalo, kambe Na bata ku sitisa mwatasi kuli lu utwisise hande, Naka bulelela kuli, “Mwa mazazi a maungulo ku ka taha mahata, ba batozizwe.” Cwale, sani si bonahala kuli mane asikonahali, mwabona, manzwi a kuli “batoziwa.” Kono mulemuhe manzwi ateni luli, “ni bapolofita ba buhata,” b-a-p-o-l-o-f-i-t-a, mwa buñata.

²⁵ Cwale, *ya tozizwe*, ki, “alimuñwi ni liñusa.” Mi nzila yeo liñusa likona kutaha ka yona ki ka alimuñwi ya *tozizwe*, mi yani ulukela kuba mupolofita, mutoziwa. “Ku ka taha mahata, baluti baba tozizwe.” Mupolofita uluta seo liñusa la hae lili sona. Baluti ba batozizwe, kono ki batu ba batozizwe ka tuto ya buhata. Ba batozizwe, “Bokreste,” mwa buñata; “bapolofita,” mwa buñata. Mi haiba kuna ni sika sa kuli ki—ki Kreste, mwa buñwi, kona kuli ba balukela kuba “ba batozizwe,” kuli bupolofita bwa seo neba luta ikaba shutano, kakuli ki ba ba tozizwe, batoziwa.

²⁶ Cwale, ki tuto ya la Sunda, lu bata ku—ku lika kutisa taba ye kwa kangisano ya niti, ka Mañolo, isiñi ka sa bulezi mutu yomuñwi ka sona, kono ka kubala fela Mañolo.

Mwa kona ku bulelela kuli, “Taba ye i konahala cwani? Kakuli ba batozizwe . . . ? Nebali likamañi?”

27 “Bokreste,” B-o-k-r-e-s-t-e, batoziwa. “Bokreste, ni bapolofita ba buhata.” Ba batozizwe, kono ba nze bali bapolofita ba mahata!

Jesu naize, kuli, “Pula isuluhelanga ku ba balukile ni baba sika luka.”

28 Cwale, babañwi bakona kuni bulelela cwana, “Kana utalusa kuli tozo yani fa sicaba sani italusa kuli ki tozo ya Moya o Kenile?” Eeni, sha, ki ona Moya o Kenile wa Mulimu fahalimwa mutu, kono niteñi ki mahata.

Cwale muteeleze hande mi mubone sa Na bulezi. “Mi ba ka eza limakazo ni liponiso, kuli mane lika puma ni bona Babaketilwe haiba ki nto yekonahala.” Mi ba tozizwe ka Moya o Kenile wa niti. Na ziba kuli se siutwahala bukuba hahulu, kono lukanga nako yaluna ka kuiketa ni ku si talusa ka Linzwi, kuli sani ki sona luli sa kuli KISONA SA BULELA MULENA, yona Niti.

29 Cwale halu apuleñi mwa Libibele zaluna, fa muzuzu fela, mwa Mateu kauhanyo ya 5, mi lu kale ka—ka timana yabu 45, mi mubone cwale halunze lu bala fa nako nyana mwa Mañolo a. Mi hasumulaho, hasumulaho lu mano fita fa, kupalañi, luka mifa . . . Kuli mu, haiba lu palelwa kubala kaufela ona, kona mukanga Libibele zamina; mi—mi hape mwa kona ku abala haluse luzwile kwanu mi mu ya kwa hae, mi—mi mubala seo Bibeles ibulele ka sona.

30 Cwale ka kunga nako yaluna, kuba ni—ni buniti bwa makalelo, kakuli Ni fa pulelo fa ye komokisa. Kana Moya o Kenile uka toza cwani muluti wa buhata? Kono sani kona sana bulezi Jesu kuli si ka ezahala.

Cwale, Mateu, kauhanyo ya 5, timana ya 45, halu baleni cwale. Halu ngeni, lukalele fa—fa halimu nyana, fa 44.

Kono Ni li kumina, Mulate lila za mina, mufuyole baba mi lwaha, mueze hande baba mi toile, . . . mu lapelele baba mi eza maswe, ni baba mi nyandisa;

Kuli mu be bana ba Ndata mina ya kwa lihalimu: kakuli yena upazuliseza lizazi la hae baba maswe ni . . . ba bande, ni kuneliseza pula kuba ba balukile ni . . . baba sika luka. (Pula isuluhelanga fahalimwa ba bamaswe ka kuswana sina ku babande.)

31 Cwale ka kulatelela taba ye hande, kwa bupolofita bo buñwi kuama ka se, halu apuleñi mwa Maheberu kauhanyo yabu 6, ka kulatelela kokutatama hande fa timana ye, ko Paulusi hatisa kwa kupuzo ya taba yeswana yana bulezi Jesu. Paulusi, wa bulelela cwale. Hamunze mu i bata . . . Ni mina kwande mwa manzwi fa silimba, mubeye Libibele za mina bu kaufi ni mina ni siemba sa pampili, mi mu i bale cwale. Maheberu, kauhanyo ya 6, Paulusi uñolela kwa Maheberu, kuba bonisa miluti ni mifuta,

ku ba zwisa mwatasa Bujuda kutaha mwa Bukreste, kuba bonisa kuli lika za kale kaufela neli bonisa fela miluti ya lika ze ne sa taha. Paulusi wa bulela cwale, Maheberu 6.

Kabakaleo lusiyeni litaba za makalelo a tuto ya Kreste (K-r-e-s-t-e, mwa buñwi), mi luye ku za kupetahala; lu si ke lwa toma hape mutomo wa ku baka . . . kwa misebezi yeshwile, ni wa tumelo ku Mulimu.

Ni wa . . . tuto ya likolobezo, ni wa kubeya mazoho, ni wa zuho ya bafu, ni wa katulo ye ka yema ko ku sa feli.

Mi ki mo luka ezeza, haiba Mulimu alumela.

Kakuli haku konahali kuli bona babakile ba bonisezwa liseli, mi ba lazwize kwa mpo ya lihalimu, baba abezwi kwa Moya o Kenile,

Ni bata kubiza kutwisiso ya mina fa muzuzu fela. Kana mu lemuhiye, yani ki “mpo”; mi ha ki “limpo,” bo muca sanda ba “limpo za lihalimu”? Kono, “mpo ya lihalimu,” mwa buñwi; “Kreste,” mwa buñwi; “mpo,” mwa buñwi.

. . . mpo ya lihalimu, mi . . . baba abezwi kwa Moya o Kenile,

Mi ba lazwize kwa . . . linzwi la Mulimu, . . . (kulwaza kwa sikamañi?) . . . kwa linzwi la Mulimu, ni ze mata za bupilo bo bu taha,

Bona bao ha ba ka wa, kuli ba ancafazwe ilibona hape kuli ba bake; haku konahali kakuli fo baikokotelela Mwana Mulimu sinca, ni ku mu shwaulisa ku ba bañata.

Kakuli, (muteeleze) naha . . . ye nelwa ki pula hañata mi ikolobile, ha ibeya lico ze pilisa baba li lima, naha yeo itambuzi mbuyoti ku Mulimu:

Kono haimelisa mikona . . . ni liseto haisana tuso, ifa kaufi ni ku kutiwa; mi kwa mafelelezo ya cisiwa.

³² Cwale mubapise sani ni Mateu 5:24 hape. Mulemuhe, Jesu naize pula ni lizazi litahanga fa lifasi, ki kuli Mulimu wa lilumanga kuto lukisa lico ni lika za batu ba lifasi. Mi pula ilumelwangwa bakeñisa sico, zona limela. Kono haili mifuka, macwani, haliba mwa simu, li amuhelanga zeswana. Na pula yeswana ye melisa buloto kona pula yeswana ye melisa bucwani.

³³ Kamo Ne ni bezi ni tuto ya seo nako yeñwi, hane Ni kopani lwapili ni sicaba sa ma Pentekota! Mi neli tuto yetuna kuna. Ne ni boni baana bababeli, alimuñwi . . . Nali kuba niutwe ya bulela ka malimi haisali. Yomuñwi atobulela ka malimi, yomuñwi iza toloka, ni ku cincana cwalo. Mi neba bulela niti, kubulela kuli, “Kuna ni babañata mo baba lukela kubaka busihu bwa kacenu. Kuna ni basali ni baana, hamoho.” Mi kipeto sicaba sa yema ni kuya kwa pili kwa katala.

Na hupula, “Ha ki kanya ni yeo!”

34 Mi cwale ka mpo yenyinyani ya Moya o Kenile, Na bulela kwa baana bani, ili fela, kana mwa ziba, mwa ku lemuha, ka nzila yenyinyani mwa kubatiseza. Mi alimuñwi wa bona nali Mukreste wa niti, mi nali mutanga wa niti wa Kreste, mi yomuñwi nali muipi. Mi alimuñwi wa bona, yena yanali wa muipi, na pila ni musali wa milili ye minsu, inza zamaya ni musali wa milili ye mi fubelu mi na pepile bana ka yena. Kulukile, neli ona mwani mwa pono; neisa koni ku hanyezwa. Mi kiha Ni bulela ku yena ka zona. A nitalima mi aikela kwa buse bwa muyaho.

35 Cwale ne Ni lyangani, luli kaniti. Neni hupula kuli Ni tile mwahala mangeloi, mi se Ni hakanyeha haiba ne Nisi mwahala bo diabulosi. Neku ka konahala cwani cwana? Ne ni palelwa ku li utwisisa. Mi ka lilimo Ni inzi ka ku litokolomoha, kufitela zani leliñwi hane. . .

George Smith, mushimani ya zamaya ni mwanake wa musizana, ne luile maabani, kuyofita kwa sibaka sa sikayo sa kale ko Ni yanga ku yo lapela.

Mi kasamulaho a kuba mwahali mwani mwa mazazi nyana, Moya o Kenile wa tisa Liñolo le kuna: “Kakuli pula inelanga mwa lifasi kuli imelise lico, kono mikona ni liseto lipila kayona pula yeswana yani, mi mafelelezo a zona ki ku cisiwa.” Ku pila fela ka bupilo bo buswana bo bu filwe ki Mulimu. Mi kiha Ni utwisisa sani. “Ka. . .” Jesu naize, “Ka miselo yabona mu ka ba ziba.”

36 Cwale, kabakaleo, pula ha inelela fa limela za lifasi, ki mufuta wa pula ya Moya ye fa Bupilo Bobusafeli, o suluhela fahalimwa Keleke, kakuli lu ibiza kuli ki pula ya masehulo ni ya mwa mulaho. Mi ki pula, yezwa mwa Moya wa Mulimu, kutaha fahalimwa Keleke ya Hae.

37 Mulemuhe, ki taba ye nca luli fa. Mwabona? Fani lipeu zani hane liwezi mwa mubu, ka mukwa kaufela one likeni mwateni ka ona, ne lili liseto ka kukala. Kono kwani buloto bone buile mwa mubu, ni limela za lico, nelili lico ka kukala. Mi sico kaufela siitahisa sona siñi, ona cwalo hape, ku bonisa kuli nesili mwa buino bwa makalelo.

38 “Mi baka puma nibona ba Baketilwe kambe ki nto ye konahala,” kakuli ba amuhela pula yeswana, mbuyoti yeswana, ku bonisa lisupo zeswana, limakazo zeswana. Mwabona? “Ba ka puma, kamba ba ka puma nibona ba Baketilwe haiba ki nto ye konahala.” Cwale, muutwa haukoni kueza sika kaufela kakuli ki muutwa, mi ni bona buloto habukoni kueza sesiñwi kakuli ki buloto; ki seo Mubupi wa zona alitomezi kueza kukala kwa simuluho. Bani ki ba Baketilwe. Pula yeswana!

39 Lizazi lipazula kakusasana ni ku monyehela lifasi kamukana, sina mo li ezeza mwa lifasi le mwa lizazi le lu pila ku lona. Mi haili lizazi, lona lizazi leliswana le li pazulelanga kwa Upa kona lizazi leliswana le li likelelanga kwa Wiko. Mi

lizazi lani li lumezwi kuto bu zwise peu ye mwa lifasi, yeo mibili yaluna ipangilwe ku yona.

⁴⁰ Luna lupila ka lika ze shwile. Yani kona nzila fela yeo mukona ku pila ka yona. Mi haiba sesiñwi si kona kushwa zazi ni zazi kuli mu pile, ka butu, kona kuli kana ha ki niti kuli . . . Mubili wa mina ulukela ku pila ka lika ze shwile, kwa bupilo bwa lifasi le, kona kuli mulukela kuba ni Sesiñwi sesi lukela kushwa, ka moya, kuli sipilise bupilo bwa mina bwa moya. Mi Mulimu, natilo ba sibyana, nama, mi ashwa kuli luna lupile. Hakuna keleke, hakuna sika sisili kaufela mwa lifasi sesi kona ku mi pilisa kwanda Mulimu. Sani kona fela sika seo ba pila ka sona.

⁴¹ Cwale mubale Mañolo. Jesu ki Linzwi. “Kwa simuluho ne ku na ni Linzwi. Mi Linzwi ne li ezizwe nama mi la to pila mwahala luna. Kwa simuluho ne ku na ni Linzwi, mi Linzwi nali ku Mulimu. Mi Linzwi la to ezwa nama, mi Yana pilile, na yahile mwahala luna.” “Mi mutu hana ku pila ka buhobe fela,” bwa nama, “kono ni ka Linzwi kaufela le li zwelela mwa mulomo wa Mulimu.” Kona kuli, mwa bona, lupila ka Linzwi, mi yani ki Mulimu.

⁴² Cwale lizazi litahanga kuto bu zwise lipeu. Cwale, halikoni ku li buzwise kaufela zona ka nako iliñwi. Halinze liya cwalo, zahula, libuzwa ka bunyinyani kufitela liba tolwana ye tezi.

Kona moku inezi, kacenu, ni Keleke. Ne ikalile mwa bumbututu bwa yona, kwa mulaho mwa linako za lififi, ko ne iinzi mwatasa mubu. Ihulile cwale seli yetuna. Mi lwakona ku i bona, hande, kuli mane Mulimu ka kufitela mwa lika ze tahile kamita . . .

⁴³ Hamukoni kulyanganisa ze tahile. Bwani kona butata kacenu. Lu fufisa ma bomba, mi kwani mwa liwate, luswelu ku li hulisa ni ku tibululela mwateni ma bomba a atomiki. Musweli fela kueleza kwa masila ani nako kaufela, anze awela mwateni. Mu lemaka likota; muunda uka mi kukisa. Ku eza suuba mwa nuka; ika yuboka kubayula.

Mu lukela kufumana nzila ya Mulimu ya kueza lika ka yona mi mupile ka yona. Lu onga-ongezi batu mwa likeleke ni likopano; mutalime se lu nani! Mupile mwa nzila ya lukisize Mulimu ka zona.

⁴⁴ Kono, mwa bona, “Wa nelisanga pula,” halukuteni kwa tuto ya luna, “kuba balukile ni baba sika luka.” Jesu wa mi bulelela fa, mwa Mateu 24, ikaba sisupo kwa nako ya maungulo.

Cwale, haiba sisupo se sina ni kuzibiwa fela kwa nako ya maungulo, kona kuli ikaba kasamulaho wa kukwalula kwa Maswayo ani. Mwabona? Ki sisupo sa maungulo. Sani ikaba sona, fani lika ze halika ezahala, ikaba kwa nako ya maungulo. Mi ikaba sisupo, cwale, kacwalo ba Baketilwe habana ku

lyangana mwa lika ze. Mwa bona nji? Kona kuli, lina ni kupatululwa, fa ngandaleza.

⁴⁵ Mulemuhe, sibeli sa buloto ni bucwani lipila ka Tozo yeswana yezwa kwa Lihalimu. Sibeli sa zona za nyakalala ka Yona.

Na hupula se, kuswanisisa kwa taba ya zazi lani kwa Sikayo sa Green. Ne—Ne niboni pono yene nitezi. Mi nekuna ni lifasi lelituna, mi neli sikamezi kwa neku leliñwi. Mi kiha kuya Mucali, pili. Ni bata kubeya sani fa pila mina. Mutalime sene sikalile kuya pili, mi ni sene si tatami. Mi cwale Muuna yo yana apezi ze sweu ataha mwa lifasi, inza cala lipeu, mi mwa mulaho wa Hae kwa taha muuna, yana apezi liapalo zensu, na bonahala ya butali tali, inza nyomaeta mwa mulaho wa Hae, inza cala lipeu. Mi taba ye hane izehalile, cwale ki ha Ni bona limela zepeli ha lihula. Mi hane lisweli kuhula cwalo, yeñwi neli buloto mi yeñwi neli bucwani.

Mi kiha kutaha linanga, kuli fani, neku bonahala sina, sibeli sa zona ne li i namisize litho za zona kulilela pula. Mi kiha kutaha lilu lelituna mwa halimu, mi ya nela. Mi buloto kiha buyema ni kubulela kuli, “Kulumbwe Mulena! Kulumbwe Mulena!” Mi ni bucwani bwa yema ni kuhuwa, “Kulumbwe Mulena! Kulumbwe Mulena!” Linepo zeswana. Sibeli sa zona nelishwa, sibeli sa zona linze liya. Mi cwale buloto kiha bu taha buna ni linyolwa. Mi kakuli neli mwa simu yeswana, litema leliswana, sibaka sekwana, mwatasa lisima leliswana, kutaha buloto mi hape kutaha ni mufuka ka taba yeswana luli. Mulemuhe, ona tozo yeswana yeo mezi atisa kwa buloto, kona yemelisa ni bucwani.

⁴⁶ Ona Moya o Kenile oswana otoza Keleke, ona obafanga takazo ya ku pilisa mioya, obafanga mata a kueza limakazo, Uwela baba sika luka ka kuswana fela sina kuba balukile. Ona Moya oswana! Cwale, hamukoni ku ueza ka nzila isili mi mu utwisise Mateu 24:24. Yena naize, “Ku ka taha Bokreste ba buhata,” baba tozizwe, ka buhata. Ba tozizwe ka Sika sa luli, kono bakaba bapolofita ba buhata ba Sona, baluti ba buhata ba Sona.

Ki sikamañi sesi ka eza kuli mutu alate kuba muluti wa lihata wa sika sa Niti? Cwale luka fita fa nombolo ya sibatana mwa mizuzu yelikani, mi muka bona kuli ki kopano. Mwabona? Baluti ba buhata; mahata, baba tozizwe. Bokreste ba batozizwe, kono ki baluti ba buhata. Kona nzila inosi fela yeo mukona kubona ka yona.

⁴⁷ Sina fela kwanu nako yeñwi yefitile, Ni bulezi taba ye. Na lukela ku ibulela kakuli lu ngungahani kwa mawaile mwa naha. Zazi leliñwi ne Ni bulela ku mulikana ka, ko kuzwelela taba ye kakusasana wo, mwa Arizona. Mi nana ni—ni simu ya litolwana. Mi nana ni kota kwani yeneli ya olonji kono neibeya bisansa bwa

magilepu, ni lemune, tangelini, matanjelo. Mi Ni libezi kuli neli miselo ya litolwana zekai zeshutana ze neli kwa kota. Mi se Nili ku—ku—ku muuna yo, Na li, “Ku ba cwani? Ki kota ya mufuta mañi yani?”

Yena ali, “Kota luli, kasibili, ki kota ya olonji.”

Se nili, “Kiñi ha ina ni miselo ya magilepu kuyona? Kiñi haina ni ma lemune ku yona?”

Ki hali, “Zani lingungekilwe fela ku yona.”

Se nili, “Na bona. Kulukile, cwale,” Na li, “cwale, isaho haiba kota ye itaha ni muselo omuñwi,” zeo libuzwezanga ka nako yeswana, Na li, “kona kuli ika beya ma olonji kaufela ona. Haiba ki mukubu wa kota ya olonji, uka tisa lushaba lwa olonji, nji cwani, sha?”

Ki hali, “Batili, sha. Mutai kaufela o comekilwe kwateni uka beya mufuta wa ona uñi.”

Se nili, “Utalusa kuli mutai wa lemune wani uka beya lemune kuzwa kwa kota ya ma olonji?”

Yena ali, “Eeni, sha.”

“Kana muselo wa magilepu uka beya magilepu kwa kota ya ma olonji?”

Yena ali, “Eeni, sha. Wani kona mufuta wa mutai o comekilwe ku yona.”

Se nili, “Tumbo ibe ku Mulimu!”

Yena ali, “Utalusa sikamañi?”

Se nili, “Puzo iliñwi fela. Cwale, ki kuli kota ya ma olonji yani ika beya fateni ma olonji hape?”

Yena ali, “Konji ha ika shoshela mutai omuñwi.” Konji ha ika shoshela mutai omuñwi, isiñi ka o comekilwe ku yona. Kono, ki miselo ya litolwana ze ciwa kaufela zona, mi kaufela kwa bupilo bwa likota za litolwana ze beya miselo ye ciwa.

⁴⁸ Se nili, “Ki fo cwale! Ba Methodist ba kapepa ma Methodist, nako kaufela. Ba Baptist ba kapepa ba Baptist, nako kaufela. Ba Katolika ba kapepa ba Katolika, nako kaufela. Kono Keleke ya Mulimu yapili ika tahisa Krete kuzwa mwa mubisi, Linzwi nako kaufela, haiba ikona kutisa sika sisili kaufela sa mufuta wa yona Iñi.”

⁴⁹ Cwale, mwa kona ku ucomeka mwani, mwa bona. Muselo kaufela wa magilepu, ma lemune, tanjelo, tangelini, seo tolwana yeo ili yona kaufela, yeñwi ni yeñwi ya zona ya kona ku pila mwa kota yani; kono inge i sweli kubeya bupaki bwa buhata ka kota yani, i pila ka kota. Mwa bona nji? Li pila ni kuikataza ka bupilo bwa niti bo bu inzi mwa kota yani.

Cwale, ki yani mwa Mateu 24:24, ku pila ka Bupilo bobuswana, kono ne ba si ba niti, kwa simuluhó. Ba lwezi bupaki

bwa buhata ka za Kota yani! Ki kota ya ma olonji, ibo kanti ki miselo ya litolwana. Mi bona bali, “Keleke ye, kopano i lwezi bupaki bwa Kreste,” mi ina ni kolobezo ya buhata, bupaki bwa buhata ka Linzwi, ku lika kubulela kuli mata a Mulimu neli fela a balutiwa.

Jesu, Kasibili, naize, “Muye mwa lifasi kaufela mi mukutaze Evangeli kwa mutai kaufela okwa . . . kota kaufela ye ka mela, mutai kaufela okafumaneha mwa kota. Mi liponiso ze lika latelela mitai ya niti.” Kakai? Haibile fela ki Kota, ibile fela I beya mitai, kuisa kwa mafelelezo a lifasi. “Ka Libizo la Ka ba ka leleka mioya ya diabolosi; ba ka bulela ka malimi; ba ka swala linoha; ba ka nwa lika zekola; ba ka beya mazoho ku baba kula mi bao ba ka foliswa.” Mwabona hola ye lu pila ku yona? Mwabona sa na bulezi Jesu?

⁵⁰ Muhupule, kwa neli kwa nako ya maungulo, isiñi kwa mulaho mwatasa Wesley ni kwa mulaho kwani. Cwale, kwa nako ya maungulo, se kona kone si lukela ku ezahalela.

Cwale mutalime Mañolo; mutuhele A pake. Jesu naize, “Mubale Mañolo, kakuli ku Ona muhupula, kamba ku lumela, kuli muna ni Bupilo Bobusafeli, mi kanti ki Ona apaka za Ka.” Ka manzwi amañwi, haiba kota ye ikabeya mutai. . . “Kina Lisina, yona Kota; mina mu mitai. Ya lumela ku Na, misebezi ye Ni eza uka i eza ni yena,” Mulatiwa Joani 14:12.

⁵¹ Cwale, “Ya ina ku Na, yena yo. . . yena yanali mwa mubisi wa Ka kwa simuluho.”

Lani kona libaka leo Jesu nali zepeli cwalo ili Mubisi ni Lusika lwa Davida. Nali teni ku sikaba kale Davida, ku Davida, mi ni kasamulaho wa Davida, ali zepeli cwalo ili Mubisi ni Lusika lwa Davida; Naleli ya Kakusasana, Palisa ya Sharoni, Mulilima wa mwa Libala, Alfa ni Omega; Ndate, Mwana, ni Moya o Kenile. “Ku Yena kona ko kuinzi mutalelela wa Bumulimu ka mubili.” Zepeli cwalo ili Mubisi ni Lusika lwa Davida!

“Yena yali Bupilo bo buketilwe, ona Bupilo bo bu lemuhilwe isali kwa simuluho, buinzi ku Na,” mi ki Yena Linzwi, “kuzwa kwa simuluho; ha ka taha, uka lwala miselo ya Ka.” Muñoli Joani 14:12.

Kono babañwi ba ka pila ka taba yeswana, ba nze baipiza kuli ki Bakreste ni ba lumeli. “Ha ki kaufela babali, ‘Mulena, Mulena,’ baba kakena.”

Cwale, ze likanga sibaka ni kuiponahaza mwa mazazi a maungulo, “fo likunutu za Mulimu ha lika patululwa,” sina haluka fita kuzona mwa nako nyana.

⁵² Likota ze, mutai wa niti ni mutai wa buhata! Mu ni utwile haninze ni kutazanga ka zona, kuzwa mwa lilimo zefelile, ka mo lihulezi cwalo hamoho. Litahile cwalo iliñwi ka iliñwi ni

ku bonisa cwalo, kuzwa ku Kaine ni Abele, mitai yemibeli yene kopani fa aletare; sibeli za bona neli ba bulapeli, sibeli sa bona neba tozizwe, sibeli za bona neba lakaza bupilo, ni ku lapela yena Mulimu ya swana. Yomuñwi na hanilwe mi yomuñwi a amuhelwa.

Mi nzila fela inosi yeo yana amuhezwi na kona kueza sika kaufela ka ku shutana kuzwa ku muhulwana hae, ne ku patuluzwi ku yena. Kakuli Bibebe i bulezi kuli, “Ka tumelo. . .” Maheberu, kauhanyo ya 11, “Ka tumelo Abele na tahisize sitabelo sesinde ku Mulimu kufita sani sa Kaine, ili yo Mulimu napakile kuli ki ya lukile.”

Jesu, naize, sinulo ya moya ya Seo ali Sona! “Kana batu bali kina mañi Na nili Mwana mutu?”

Ki hali, Pitrosi ali, “Ki wena Krete, Mwana Mulimu yapila.”

“Ufuyozwi wena, Simoni—Simoni, mwana Jonasi; nama ni mali ha li si ka patulula se ku wena. Ki Ndate ya mwa Lihalimu ki yena ya patuluzi seo. Fahalimwa licwe le Ni ka yaha Keleke ya Ka,” (sikamañi?) sinulo ya niti ya Linzwi. Ki yani fani Kota ya niti hape. “Abele, ka tumelo!”

Na i ze, “Ne si sinulo.”

⁵³ Tumelo ki sikamañi? Tumelo ki sika se si patuluzwi ku wena; se si sika ba teni kale, kono ulumela kuli sikaba teni. Tumelo ki sinulo ya tato ya Mulimu. Kacwalo, ka sinulo!

⁵⁴ Mi likeleke kacenu mane ha li lumeli mwa sinulo ya moya. Ba lumela mwa tuto ya litumelo ni milao yemiñwi. “Ka sinulo Abele na tahisize ku Mulimu sitabelo sesinde kufita sani sa Kaine, yo Mulimu napakile kuli ki ya lukile.” Amen. Na sepa mwa bona sani. Mwabona fo lupila? Mwa ibona hola?

Ne ni sweli kuambola ni—ni mutangana cwana ha ki kale hahulu, Mukreste wa munituti wa mutangana. Ki hali, “Bo Branham, lwa hana sinulo kaufela.”

⁵⁵ Se nili, “Kona kuli mu lukela kuhana Jesu Krete, kakuli ki Yena sinulo ya Mulimu, Mulimu ya ipatululezi mwa nama ya butu.” Ka kupalelwa ku sibona, mu latehile.

Jesu naize, “Kwanda kuli mulumele kuli ki Na Yena, muka shwela mwa sibi sa mina.” Ki yena sinulo ya Mulimu, ona Moya wa Mulimu opatuluzwi mwa mufuta wa butu. Ha mu sa koni ku lumela sani, mu latehile. Mu Mubeya kuba mutu wa bulalu, mutu wa bubeli, mutu ufi kaufela kwanda Mulimu, mu latehile. “Kwanda kuli mu lumele kuli ki Na Yena, mu ka shwela mwa libi za mina.” Ki sinulo!

⁵⁶ Kona hane bapalelwa ku Mu bona. “Hakuna mutu ya kona kutaha ku Na konji Ndate A mubize. Mi bao kaufela be Ndate a Ni file,” mwa mibisi, “baka taha ku Na.” Mwabona? Mwa utwa nji? Oh, kamo lu lukela ku Mu latela, ku Mu kubamela, ku Mu

lumba; ka kubona muselo wa Moya mwa mazazi a maungulo, mi Kota ya Munyaliwa yabuzwa kwa mafelelezo a nako!

⁵⁷ Mutai wa niti ni mutai wa buhata, sibeli sa zona ne li na ni tozo yeswana. Mezi na suluhezi fahalimwa zona zepeli cwalo. Ki kabakaleo Na lu lemusize, “Ne ika puma ni bona ba Baketilwe kambe ki nto ye konahala.”

⁵⁸ Mulemuhe, ba bonahala kuswana. Ba tozizwe ka kuswana. Kono mulemuhe, “Ka muselo wa bona. . .” Kana mu ziba cwani za teni?

Muziba cwani kuli ki olonji? Kakuli ibeya muselo wa magilepu. Kota yani ki yende, i pila mwa kota, kono ibeya muselo wa magilepu. Ha uswani ni wa pili.

Mi haiba keleke ibulela kuli “i lumela Jesu Kreste yaswana maabani, kacenu, ni kuyakuile,” kono ilatula Mata a Hae, kulatula misebezi ya Hae, kulatula Linzwi la Hae; haiba—haiba. . . Keleke ye lumela ku Jesu Kreste, ika eza misebezi ya Jesu Kreste, ikaba ni Bupilo bwa Jesu Kreste. Mi haiba haiyo cwalo, hakuna taba kamba Bupilo bwa kena ku yona; haiba haisika zibahala kale, kuzwa kwa mibisi, ika beya miselo ya magilepu nako ni nako, kamba sesiñwi se si shutana. Kono haiba ki Bupilo bo bu zibahalile kale, mwa mibisi, ika beya Jesu Kreste ya swana maabani, kacenu, ni kuyakuile, haiba ki Linzwi lelitile kufitela mwa Mubisi. Yeo, Yena kiyena Mubisi, makalelo a nako.

⁵⁹ Mulemuhe, kono ki ze ba beya kona ze talusa shutano. “Ka miselo ya bona,” Jesu naize, “mu ka ba ziba.” “Mutu ha koyolangi sisansa sa veine kuzwa mwa miutwa,” nihaikenge miutwa ki yeminde mwa bisansa bya veine. Sani sa konahala, kono muselo uka li paka.

Muselo ki sikamañi? Ki Linzwi, ki muselo wa nako yateni. Sani kona seo sili sona, tuto yabona. Tuto ya sikamañi? Ki tuto ya nako yateni, ki nako mañi. Tuto ya mutu, tuto ya likopano, kono, kamba ki Linzwi la Mulimu la nako ye swanela?

Cwale, nako icibilika kapili, kuli lukone kuinelela fani fa nako yetelele. Kakuli Ni sepa kuli mina babali teni mo, mi Na sepa ni mina kwabuse bwa naha, mwakona kubona se Ni lika ku mi bulelela, kakuli haluna nako yeñata kuli luine nako yetelele fateni.

⁶⁰ Kono mwa kona kubona kuli Tozo isweli kutaha fahalimwa baba sika luka, baluti ba buhata, ni kueza kuli baeze ona cwalo zeo Mulimu na ba bulelezi kuli basike baeza; kono ba ka lieza, niteni. Kiñi? Habakoni ku itoboha zona. Kana muutwa ukona kuba sikamañi sisili hape kwanda kuba muutwa? Hakuna taba ka buñata bwa pula yeka nelela fateni, ulukela kuba muutwa. Ki kabakaleo Jesu naize kuli, “Bakaba ba baswana kufitela lipuma nibona ba Baketilwe,” babali mwa mibisi, “kambe neli nto ye konahala,” kono ha ku konahali. Buloto habukoni kueza sika kwanda kubeya buloto; zani kona fela zebukona ku beya.

⁶¹ Mulemuhe. Muhupule, Mulimu ha ki mutateki wa likopano. Diabulosi ki yena mutateki wa likopano. Ni nyakisize sani ka Linzwi, kuya ni kukuta, ni kukuta kutela; haluna kukena kusani ka kusasana wo. Lu ziba kuli Mulimu asikabe a onga onga sicaba hamoho ka mukwa ocwalo, kupanga kopano. Lilimo ze mianda kasumulaho wa lifu la mulutiwa wa mafelelezo, ba si ka ba kale ni kopano yapili. Kamita ibonahalile kuba yepalelwa. Haiba ha i cwalo, kiñi ha lu si yo mwa lilato hamoho kacenu, Methodist, Baptist, Presbyterian, Katolika ni bao kaufela? Kiñi misebezi ya Mulimu ha i sa lu lateleli, he, keleke kaufela fa taba yeswana, ona Linzwi? Lika zani za kauhanya batu, sizwale. . . Lu kwahule ni Mulimu kufita mo lukile lwa belanga, likeleke, kona ze bulelwa.

⁶² Cwale, lu bulelelwa cwana, kuli, “Lika za kale kaufela neliezahezi sina mitala, kwa tuto yaluna, kalimelo, kelezo.” Kuli, lika kaufela za Testamente ya Kale ne liezahalile, sina miluti, ili kubona sene si ka ba mwa Testamente ye Nca, mwa lizazi la luna.

Kuswana fela sina kambe nemusika bona kale lizoho la mina, mi mutalime mwa halimu ni kubona muluti fa limota, sina lizoho laka mone likabela kuzwa kwa liseli, haiba lina ni minwana iketalizoho fa muluti, haiba muluti; mi muzamaisa mazoho a mina bu kaufi, ka kuba a niti, kutaha kwa—kutaha kwa muluti, ana ni kuto fita fa minwana iketalizoho.

Sina Biblele ha i lu bulelela, kuli, “Testamente ya Kale neli muluti, mufuta wa lika zenca, kamba wa lika ze ne sa taha; isiñi zona lika luli ze liteni, kono ki muluti, mufuta wa lika ze ne lukela ku taha.”

⁶³ Halu kuteñi kwa mulaho mi lubone haiba taba ye ikile yaba teni mwa lusika kaufela. Kana mwa lata cwalo? [Puteho ili, “Amen.”—Mu.] Kacwalo luka ziba, kuli lunyakisise se, kwa mulaho ni kwa pata, ka Linzwi; isiñi ka milelo ya mutu yomuñwi, mulutelo omuñwi.

Hanina taba kamba ki mañi; mutu ufi kaufela, na kasibili kamba usili kaufela, “Haiba abulela isi kuya ka mulao ni bapolofita, hakuna Liseli ku yena.” Mwabona? Sani kona sene ibulezi Biblele. “Linzwi la mutu kaufela libe la buhata, mi la Ka libe niti,” ibe mañi kamba mañi.

⁶⁴ Cwale halu kuteñi kwa mulaho mi lufumane haiba nji taba ye ikile ya ezahala fateni, ku lubonisa mutala.

Lwa kona kukuta cwale mwa Buka ya Exoda ni kuambola ka mutu ya bizwa Mushe, yanali mupolofita yana tozizwe ni ku lumiwa ki Mulimu, ni Linzwi la Mulimu ni tato ya Mulimu kwa lusika kwa hae. Sina Linzwi la Mulimu kamita hali zamayanga ka kuzwelapili, Na ize, “Na si ka eza sika konji Yena ha na Si patuluzi kwa bapolofita ba Hae pili.” Kona Ha na kona ku sieza. Uh-huh.

Cwale, Yena hakoni ku bulela buhata. Hakoni kupuma ni kuba Mulimu. Batili, sha. Una ni kuba wa niti. Hakuna lishano ku Yena. Una . . .

Mi Hakoni ku Li cinca. Haiba U eza cwalo, kona kuli Ha ki Mulimu; Na ezize mafosisa. Ulukela kuba ya sa shwi. Mi ya sa shwi hakoni kueza mafosisa. Mwabona? Kacwalo sa bulezi Mulimu, ki se si lukile Kuyakuile. Mwabona? Mi Na sepisize cwalo. Kacwalo, mutalime, hakuna sibaka mwa Biblele ku si cwalo si ka latelela ka kuzwelapili hande.

⁶⁵ Cwale, Mulimu na sepisize Abrahamama kuli peu ya hae neikaba mwa—mwa naha ya kwahule ka myaha ye mianda yemine, mi Na ka ba lamulela ka lizoho leli tiile lelimata, ku bonisa lisupo za Hae ni liponiso mwahala sicaba seo ba pila ni sona. Nako ya sepiso ne i sutelezi bu kaufi. Batu ne ba libezi ka zona. Neba na ni Bafalisi ni Basaduki, ni babañwi cwalo, likopano. Kono, hañi hañi fela, kiha kutaha Mulimu mi aba lamulela, kuzwa, mwahala bona kaufela.

Mulimu ali kuba, ka zazi lifi kaufela kamba ka nako ifi kaufela, abize mupolofita yazwa mwa likopano. Batili, sha. Kakuli yena kiya lyangani, hakoni kueza cwalo; ulukela kupila ni kopano yani.

⁶⁶ Mushe, muuna yana lumilwe ki Mulimu, ka Linzwi la Mulimu, mi mwa musipili wa hae hana zamaisa Isilaele kuya mwa naha ya sepiso, ka tokomelo ya litaelo za Mulimu, na kopani ni mupolofita yomuñwi, mutoziwa yomuñwi yana na ni tozo ya niti ya Moya o Kenile oswana onoli ku Mushe. Yani ki niti. Nali mupolofita. Moya o Kenile no li fahalimwa muuna yo. Libizo la hae neli Balami. Kaufela luna lwa mu ziba. Kulukile, ona lika luli, ka kuswana, lika—lika za na bulezi muuna yani, li sa ezahala, seli lilimo ze mianda ye mashumi amabeli ka ye ketalizoho—ka yemilalu yefitile. “Wena uswana sina sisansa sa litolwana, Mawe Isilaele. Kaufela ya ku fuyola uka fuyolwa. Kaufela ya ku kuta uka kutiwa. Mata a hao, ni kutiya, litende za hao ki ze lukile cwani, Mawe Jakobol!” Mwabona, na palezwi ku ipumanela tuso. Na ile kwani inza hupuzi mwa pilu ya hae kuli ayo kuta sicaba.

⁶⁷ Oh, mina baluti ba buhata babasweli kuteeleza kwa matepu a lilimo ze kaufela, ni kubona Mulimu inza paka ka swanelo za Na bulezi, mi mukile mwa ina mi mufumani kuli ki Niti; mi kabakala lishutano za likopano za mina, mwa likananela ni ku bulelela sicaba sa mina kuli ha li cwalo. Bumai ki bwa mina! Nako ya mina isuletezi fakaufi.

⁶⁸ Balami, na tozizwe ka Moya oswana ni wani onoli ku Mushe. Shutano neli ye cwani? Tuto ya Mushe neli ye petehile. Biblele i bulezi cwana ku Pitrosi wa Bubeli, kuli neli “tuto ya Balami” yeo Isilaele na amuhezi, ili taba yeo Mulimu na si ka swalela. Sibi se si sina swalelo! Hakuna ni haiba yomukana wa bona

yana pilisizwe, ni hane batile mwatasa limbuyoti za Mulimu, ni kubona lizoho la Mulimu ha li zamaya ka mupolofita ya mata yo, ni ku li bona hande ha li pakiwa ki Mulimu. Mi, kakuli, mupolofita yomuñwi natile teni ni tuto isili, ye shutana, mi a kanana ni Mushe, ni kulika ku bonisa sicaba kuli Mushe na fosahalile. Cwale Datani, Korah, ni babañata ba kubona, ba swalisana ni yena mi ba luta bana ba Isilaele kuli baeze buhule, kuli baye ka lituto za hae, kuli, “Kaufela luna lwa swana.”

“Kamba lu ba Methodist, Baptist, Presbyterian, kamba ma Pentekota, ni bao kamukana, luna kaufela lwa swana.”

⁶⁹ Ha lu swani! Mina mu sicaba se si kauhani, se si kenile ku Mulena, se si neezwi kwa Linzwi ni kwa Moya wa Mulimu, kuli sibeye miselo ya sepišo ya Hae ya lizazi le. Mi mina ha mu siemba sa bona! Na ziba kuli seo si tata luli, kono yani kona Niti ka kuswana fela. Ku neelwa kwa sebelezo mwa mazazi a maungulo aa! “Muzwe mwahala bona bani.”

⁷⁰ Cwale, “tuto ya Balami,” isiñi bupolofita bwa Balami. Sani ne si li hande. Yani neli Mulimu. Ki babakai ba balumela cwalo? [Puteho ili, “Amen.”—Mu.] Bupolofita bwa Balami nebuli ka ku luka, kakuli na si ke ku bulela sika sisili fela. Tozo ya Mulimu neisike ku bulela sika sisili fela, mi Mulimu na sipakile ka ku nyakisisa kuli neli Niti. Kono neli “tuto ya Balami.”

⁷¹ Cwale mubapise sani ni Mateu 24:24. Ba batozizwe, kono tuto yabona ki ya buhata. Za bulalu bwa bumulimu, ni lika zeñwi ze cwalo; ze fosahalile, antikreste!

Na sepa maikuto a mina a holofali. Mi musike mwa tima zani, mawaile ao isiñi kuatima. Mi musike mwa nanuha ni ku zwela fande. Ha muine fela mukuzize, mi luboneñi haiba Moya o Kenile hauna ku lu patululela, ni ku nyakisisa ku luna. Kuli, “Kono sani. . .” Seo mulumela kaufela, muine fela mukuzize mi muteeleze. Mi mubuze Mulimu kuli a kwalule lipilu za mina, kona kuli muka lemuha kamba mufuka, kamba seto, kamba seo kaufela muyemela. Mwabona?

⁷² Cwale, nihaiba Judasi, “na supelize kwa katulo yanali yona,” neili kwani fa pila Jesu. Mi Jesu a mu bulelela kuli, “Ki wena kasibili. Kaufela so ka eza, ni seo kaufela ulukela ku eza, uye usieze kapili.” Yena ka ku ziba sa na sweli kueza, kono, ka lishekele za silivera ze mashumi zani, ni kabubo, alekisa Mulena Jesu Krete. Alimuñwi wa balutiwa ba Hae, mubuluki wa sikwama sa keleke, Jesu amubiza kuli “mulikana” Hae. Mwabona? Bible i bulezi kuli, “Na pepilwe ali mwana sinyeho,” sina fela Jesu hana pepilwe ali Mwana Mulimu. “Kupuma nibona ba Baketilwe haiba ki nto ye konahala.”

⁷³ Mulemuhe ka tokomelo halunze lu bala fateni. Lukanga mutala omuñwi, mwa Buka ya Malena. Neku na ni—ni mupolofita, mi libizo la hae neli Mikaya. Neli mwana Imila, mi nali mupolofita. Kona sa nali sona.

Mi neku na ni mupolofita yomuñwi, toho ya katengo ka bapolofita, ba batozizwe. Biblele ibulela kuli nebali “bapolofita,” ona cwalo fela sina Ha naize kuli Balami neli mupolofita, ba batozizwe.

Mi neku na ni alimuñwi wa bona wa libizo la Mikaya, ya na tozizwe ki Mulimu ni ku lumiwa ki Mulimu, ni Linzwi la Mulimu.

Neku na ni alimuñwi, Zedekia, yana hupuzi kuli na lumilwe ki Mulimu. Na tozizwe ki Mulimu, kono tuto ya hae ne i shutana ni Linzwi la Mulimu. “Kukataha, Bokreste ba buhata, baka bonisa lisupo zetuna, ba ka puma nibona ba Baketilwe haiba ki nto ye konahala.”

⁷⁴ Mulemuhe, sibeli sa bona, sibeli sa bona ne ba tozizwe. Cwale, ne mu ka kona cwani kubulela yana lukile, ni yana fosahalile? Mutalime seo Linzwi ne li sepisize ku Akabe. Mupolofita yanali fa pila hae, yanali Elia, alimuñwi wa bapolofita ba batuna mwa lusika lwani, yani neli mupolofita yana ketilwe. Mupolofita yana ketilwe yani abulela, kuli, “Kakuli Akabe uezize bumaswe bo, kuli linja lika kapa mali a hae; ka kunga bupilo bwa Nabote. Ni kuli linja li ka ca Jezabele, mi ni . . . mubili ukaba musutelo mwa masimu.” Cwale, mukona cwani ku fuyola sa kutile Mulimu? Kamba mukona cwani ku kuta, sina Balami hana ize, seo Mulimu afuyozi? Mwabona?

Kono bapolofita ba nebali baba sepahala. Neku sina ku ka kanya kono nebali baana babande, baana bene ba kutekeha. Kakuli, kuba mupolofita mwa Isilaele, ulukela kuba ya kutekeha, kamba nihaiba kuba mu Isilaele. Ne mu ka pwacaulwa macwe, haku si cwalo. Nebali baana ba bakutekeha. Nebali batu baba butali. Nebali baana baba itutile. Nebali baketwa ba Akabe, ba naha. (Wabona seo, Kezeli Wright?) Baketwa ba naha, baba swanela hande kuba kwapi- . . .

⁷⁵ Mi cwale, fani Mikaya hana boni pono ya hae, na zibile mwa pilu ya hae seo Linzwi neli bulezi, kono na bata ku bona seo Moya onoli ku yena no ka bulela.

Kacwalo ba mu bulelela, mi bali, “U bulele taba ye swana sina mo ba bulelezi bapolofita babañwi ba. Mi ha u kaeza cwalo, kupalañi, ukaba, lu ka ku kenya mwa kopano, hakuna kukakanya, hape. Mwabona? Lu ka kueza kuba alimuñwi wa luna. Lu ka ku kutiseza hape mwa kopano yaluna. Ki wena . . . Lwa ziba kuli u mupolofita, haili wena ya twaezi ku bulelanga lika za kukuta kamita. Kamita ukutanga Akabe. Cwale, Zedekia, muuna yomuhulu, yena popu, kamba yena . . .” kaufela sa na li sona. “Cwale kele a fuyola Akabe, mi ali, ‘Zamaya upete cwalo.’ Cwale ubulele litaba ze swana, Imila. Kiñi, wena u mutangana ya shebile fela. Wena hauna nihaiba puteho, yekana, ni hanyinyani. Mi mitangana ba bana ni bo lule lule. Naha kaufela iyemi neku la bona. Cwale ubulele ze swana sina mo ba bulelezi, wabona so

ka eza, uka—uka ca zende za naha ye.” U ambola ku muuna ya shutana fani!

⁷⁶ Kucwani he kambe nekuizwe kuli, “Kana wa kona kufumana mulatu kaufela ku Zedekia, Mikaya?”

“Batili.”

“Kana ukile wa muswala mwa sibi?”

“Batili.”

“Kana ukile wa mu utwa inza lwaha mutu?”

“Batili.”

“Kana ukile wa muswala inza kozwi?”

“Batili.”

“Kana wa kona ku hanyeza tuto ya hae?”

“Batili.”

“Kana ulumela kuli pampili ya digri yanani ki ya buhata?”

“Batili.”

“Wa lumela kuli—kuli Ph.D. ya hae ilukile?”

“Luli. Ka ba katengo kaba Sanhedrin; Na sepa kaufela zona ki katengo, Na sepa kaufela li lukile.”

“Kulukile, he, kiñi ha u sa ikopanyi ku yena?”

“Kakuli uzwile mwa Linzwi!”

⁷⁷ Kulukile, luna ni kangisano ya zona, kanti, sina Elia mupolofita fapila zona. Mi haiba u mwana Mulimu, uka pila ni mupolofita wa Bibeles ye. Ona Linzwi. Mulemuhe hola, yona nako.

⁷⁸ Kulukile, kucwani haiba Zedekia na kali, “Oh, Na ziba mupolofita ubulezi kuli, kono zani ki za lusika lo lu tatama. Zani ki za nako yesali kwahule kuzwa cwale?”

Ki hali, “Mulibelele pili Ni bone pono kuzwa ku Mulimu, mi kutuha fo Ni ka mi bulelela.”

Ali, “Kona kuli muka bulela taba ye swana?”

Yena ali, “Ni ka bulela fela seo Mulimu akali bulela; hakuna sika sisili, hakuna sesiñwi hape. Hani koni kukeza linzwi leliñwi ku Lona, kamba ku zusa Linzwi leliñwi ku Lona.”

Kacwalo busihu bwani, mwa tapelo, Mulena ataha ku yena mwa pono. Na ile teni kakusasana le litatama, mi ali . . .

Kuna ni bapolofita bababeli!

⁷⁹ Muuna yomutuna kufitisisa nali mwa naha, mwa busole ni ku yemela naha, nekuli Zedekia. Nali yena mupolofita yo mutuna, bu kaufi ni mulena. Nali yena toho ya bapolofita babañwi, ka katengo. Na beilwe cwalo, ki katengo ka hae, toho ya bona kaufela; haku lata nali ya ziba kubala hande, yana itutile hande, yana swanela mwa musebezi. Mi na tozizwe ka

Moya o Kenile, kakuli ubizwa kuli “mupolofita.” Luli, isiñi fela mupolofita wa fela fela, nali mupolofita wa Muheberu. Cwale mu mutalime.

⁸⁰ Zedekia ali, “Mulena ubulezi ku na, ‘Mu Ni ezeze manaka amabeli a sipi,’ ili sisupo.” Mupolofita kamita ufanga lisupo. “Na ize, ‘Muni ezeze manaka a sipi a.’ Moya o Kenile uize ku na, ‘Ulwale ze,’ kona Tozo ye ni fuyozi.” Musike mwa hupula kuli ki kuipa, kono ki kutisa taba. “Moya o Kenile obulela ka malimi ka na, ona Luli o ni pakile, U ize, ‘Ulwale manaka a, mi, ka ona, ubulelele mulena kuli uka koma Siria kuzwa mwa naha yani. Mi Ni ka mukutiseza naha ye lukela kuba ya ma Isilaele, ili keleke.”

Muzwale, sani luli ki sa butokwa, sina fela Balami mwa na bezi kulo kwanu. Balami nasweli fela ku bulela ka swanelo sina Mushe mwana bezi. Mushe. . . Nombolo ye lukile ya Mulimu ki supile. Mi Balami ali, “Mu ni yahele li aletare ze supile; litabelo ze kenile ze supile, likomu, ni litotolo ze supile.” Zani ki kuambola ka kutaha kwa Mwana Mulimu. Ka butokwa, nali fela ya lukile sina yomuñwi kaufela wa bona.

⁸¹ Mi ki yo fa Zedekia, ka swanelo fela mone kulukela kubela, “Kakuli naha ye ki ya luna. Kiñi, ma Siria bani ni Mafilisita kwani banze ba sinduka mwa limba zabona, ni bana ba bona ni lika zeñwi, sila saluna, ka lico zeo bana ba luna ba sa li fumani! Fani, Mulimu nalufile naha ye!”

Muzwale, yani ki kañi yende. Na sepa nakonile ku huwa cwalo kwa ma Isilaele, mi neba kona kuhuwa ka tata hahulu mo ne ba konela. Cwale, Ni bulela za kacenu. Na sepa mwa ni latelela. Kuhuwa kaufela, kutoliya!

⁸² Mwa hupula Davida ka la Sunda yefelile? Mwabona? Mina kwande kafo mwa libaka za silimba, kamba naha ya luwaile lolu tamelezwi; ne mu sika utwa Liñusa la Sunda ye felile, mubone kuli mwa liutwa. *Kulika Ku Ezeza Mulimu Sebelezo Kusina Kulumelezwa Kueza Cwalo*, hakuna taba ka mo mubezi baba sephala, ki hande, ha ki ku amuhela ka Mulimu. Mwabona?

Cwale, ki yo fa Zedekia, ka ku nahana kuli ulukile.

⁸³ Mikaya ali, “Mutuhele nibuze Mulimu.” Kacwalo ki ha taha kakusasana lelitatama ana ni za kuli KISONA SA BULELA MULENA. Na tatubile pono ya hae ni Linzwi.

⁸⁴ Cwale kambe na ka bulelela Zedekia kuli, “Kana mwa ziba seo mupolofita wa Biblele fa na bulezi sene si ka ezahala ku mutangana yani?”

⁸⁵ “Kono isiñi ka nako ye, kakuli muuna yo ki mutu ya kutekeha. Usweli wa lika.” Musike mwa palelwa kuutwa se. “Usweli kulika kufa kwa keleke lika ze lukela kuba za keleke. Usweli kulika kufa sibiyana sa yona kusikutisa,” isiñi lika za Moya; haiba ne ku kaba cwalo, na ka nyanganyisa naha kaufela sina Elia mwana ezelize. Kono, kulika ku ba fa lika zeñwi, “Luna

ni lika. Lu kopano yetuna. Lu ba siemba sa yona. Luna kaufela, mina sicaba kaufela, mina Baipanguli, mulukela ku ikopanya ku luna.” Uh-huh.

Lwa taha ku sani mwa nako nyana. “Ki mizwale kaufela ni likezeli, nihakulicwalo.” Ha ku cwalo! Haku sikaba kale mi hakuna kuba cwalo ni kamuta, ka Keleke ya niti ya Mulimu. Haku konahali!

⁸⁶ Mulemuhe, na boni pono. Mi kacwalo sali, “Mulimu na bulezi ku na.” Cwale, mutalime, muuna yani na sepahala. Na ize, “Na ize, ‘Mueze manaka a, mi muye kwani fa pila mulena ni ku ba kasheza kwa neku la wiko,’” kamba nzila kaufela yeo naha yani ne i yemi teni. “‘Kukasha, mi sani ikaba KISONA SA BULELA MULENA, kuli uka koma ka tulo ni ku yokuta, tulo fahalimwa keleke.’ Kuya kwa ku ba lelekela kwande!” Sani si ka ba bu kaufi luli, nji cwani? Butata neli bufi?

Ki ha kutaha Mikaya kwani. Ali, “Cwale bulela sipolofita sa hao.”

⁸⁷ “Zamaya u kambame! Kono Ni boni Isilaele sina lingu, ze hasani, zesina mulisana.” Whew! Luli ka ku shutana fela.

⁸⁸ Cwale, mina mu kopano. Cwale ki ifi ye lukile? Sibeli sa bona, bapolofita. Nzila inosi fela ye mu kona ku talusa shutano mwahala zona, ki, ka ku litatuba ka Linzwi.

Ali, “Kana utwisisa cwani zeo?”

Ki hali, “Ni boni Mulimu inza inzi fa Lubona.” Ali, “Ne ni boni kopano kaufela i Mu potolohile.”

⁸⁹ Cwale muhupule, Zedekia naize kuli na boni Mulimu, ni yena, ni Moya. “Ni boni Mulimu. Uni bulelezi kuli ni pange manaka a kuzwa fa—fa sipi. Zamaya u kambame kwani mi uyo kasha linaha kuzwa kwani, kakuli yani ki ya luna. Babañwi habana tukelo ku yona.” Neba kaba ni tukelo kambe ne ba pilile ni Mulimu. Neba kaba ni sona sani, kono neba li kwahule ni Mulimu.

Cwalo kona mo li inezi likopano, ona keleke. Ina ni tukelo kwa lika ze, kono mupumilwe ku zona, kakuli ne muzwile kuya kwahule ni Linzwi la Mulimu ni Moya wa Mulimu, kutoza, kwa kupaka Linzwi la nako yatani. Musike mwa palelwa kuutwa Liñusa le.

⁹⁰ Mulemuhe sene singile sibaka cwale. Na ize, “Ni boni Mulimu,” Mikaya ali, “na inzi fa Lubona mwa Lihalimu. Kopano ya Hae neiputehani fa pila Hae. Ki hali, ‘Ki mañi yeluka luma kuli ayopuma Akabe, kuli manzwi a Elia abe a niti; Mupolofita wa Ka yana pakilwe. Ne ni bulezi kuli uka taha. Mi Elia una ni Linzwi la Ka. Mi lihalimu ni lifasi lika fela, kono Linzwi la Ka halina ku fela. Hanina taba ka mo ba kabela ba banca, kamba mo ba kabela babande, kamba ka mo ba kabela baba itutile cwani,

kamba kamo ba bezi ba batuna cwani, Manzwi a Ka hana ku palelwa.’

“Mi moya wa buhata wa taha kuzwelela mwa lihele, ku kubama ka mañwele a hae, mi wali, ‘Haiba Uka ni lumeleza fela, Na kona ku ba fa tozo yaka, kuba eza kuli bapete makazo kaufela ni ze komosa, Ni sa ba kelusa fela kwa Linzwi. Ha na kuziba nihaiba kuli Lani ki Linzwi la Hao. Uka tokwa kuisa pilu ku Lona, kabakala kabubo.” Muzwale, linako hali si ka cinca. Muzwale Neville, yani ki niti. Mwa hupula, yani ki niti. “Ni ka kena ku yena, ku mu eza kuli aeze lika zeswana sina babañwi baba siyezi. Ni ka mu eza kuli apolofite, ni ku bulela buhata.” Kana ikona kuba cwani buhata? Kakuli neli ze lwanisana ni Linzwi.

⁹¹ Munge yeñwi kaufela ya likolobezo za buhata zani, *za-kuli-ni-kuli-za-kuli* za buhata, Hanina taba kamo li utwahalela kuba za niti, kamo ba likela ku likanyisa, ki buhata haiba za shutana ni Linzwi la Mulimu la hola ye. Yani ki niti.

Mu li, “Kulukile, zaluna, kulukile, ne lu ezize sa *kuli*, mi lu eza sa *kuli*, mi keleke ya luna inzi ka nzila ye *cwana* kamba *yani*.”

Hanina taba ka seo sili sona. Haiba sa shutana kwa Linzwi leli ñozwi la hola ye, ki buhata. Mulimu hakuna sa ka eza ka sona, hakuna taba ka busepahali, kamo ba itutezi, kamo ba bezi baba butali, kamo si utwahalela kuba sa niti, kamo si utwahalela kuba sa bunangu, haiba sa shutana ni Linzwi la hola ye. Luka kena ku zona mwa butungi nyana mwa mizuzu yelikani, haiba nako ya lu lumeleza. Haiba haluna kukona, luka kutela fateni busihu bwa kacenu.

⁹² Mulemuhe, nali ya sepahala, muuna yo munde, hakuna kukakanya. Mi kiha li. . . Kona kuli, neku leliñwi, Mikaya ali ku yena, isiñi kutalimana ni pata ya hae, kono manzwi amañwi, “Utozizwe ka moya wa buhata.” Kana sani ha si koni kuba sika sa ku bulelela bishopu? Kono yena aeza cwalo.

⁹³ Mi kacwalo bishopu yo ataha mi ali, “Ha mu na kuba ni kopano hape ni kamuta,” mi a mubakula kwa meto. Ali, “U ziba kuli Ni mutu ya pakilwe. Keleke ya hesu ini ezize kuba toho ya yona, taba ye. Keto ya sicaba se si tuna sa Mulimu ini ketile kuba se. Kopano yaka ini ezize kuba se. Mi Mulimu na lufile naha ye, mi U bata kuli ibe ya luna. Mi Ni na ni KISONA SA BULELA MULENA.” Amu bakula, mi ali, “Ki nzila ifi ye ne uile Moya wa Mulimu ha ne U ni siile?”

⁹⁴ Mikaya ali, “Uka ziba, leliñwi la mazazi a,” cwale California ikwatasa nuka kwani, ni lika zeñwi ze kaufela. Mwabona? “Uka bona nzila yene Uile ka yona, ha u ka yo ba mwa tolongo ya mwahali.”

⁹⁵ Cwale, Akabe, uka bulela sikamañi? “Na lumela mupolofita wa ka,” ki habulela. Kucwani he kambe na ka bata mwa

Linzwi? Mwabona, nasalati kuipona kuba ya kutilwe. Muni kolwe! Nasalati kuipona kuba ya kutilwe. Hakuna mutu ya tabela cwalo.

Mi kopano ya- . . . muzwale wa kopano, bwani kona butata bo muna ni bona. Mu bata ku nahana kuli mu babande, kanti, mwa ziba mwa lipilu za mina, ha mu kolobeza ka libizo la “Ndate, Mwana, Moya o Kenile,” mwa puma. Mwa ziba hane mu lemuhi- . . . kubulela lika zani ze musweli kuezwa, mi munga bupaki bwa pili, ni lika kaufela sina cwalo, mu fosize. Kana bupaki bwa pili bukona kuba cwani kubulela ka malimi, mi ni kubulela ka kushutana ni sepiso ya Mulimu mwa hola ye? Kana ku konahala cwani? Ha mulati sikuto, nji cwani? Kono *Mo* ku ñozwi, kona mo ku kabelala. Lani ki liswayo la sibatana, fakaufi hahulu lika puma ba Baketilwe haiba ki nto ye konahala.

⁹⁶ Sisupo kaufela, makazo kaufela, mutu ya zozizwe, kupolofita, lika za mifuta kaufela linze li ezahala; lisupo kaufela mwa mifuta ya zona, ze komokisa kaufela ka mifuta ya zona, muka talusa cwani shutano? Mulemuhe Linzwi la hola ye. Kona mo mu kona kungela . . .

⁹⁷ Mutalime Mushe, mwa na bulelezi Balami. Mutalime Mikaya fa, ne lu zibile cwani kuli na lukile? Linzwi, fa pila hae, neli polofitile zani ka Akabe.

Mi haili Linzwi, fa pila luna, neli polofitile likopano ze ka lizazi le, ni sikuto se fahalimwa hae. Mi lika ze ka nga sibaka ka Keleke ya Hae ye tozizwe, luka ba ni Linzwi, Munyaliwa wa Linzwi. Ki luna ba fa. Ki se fa, kacenu, ona mone ku inezi kwani.

⁹⁸ Bibele ibulezi kuli, “Mwa mulomo wa lipaki zepeli kamba zetalu linzwi kaufela li patalazwe.” Ni bulezi ka za Balami, Ni bulezi ka za Balami ni Mushe. Mi Ni bulezi ka za Mikaya ni Zedekia. Cwale Ni ka bulela ka yomuñwi hape. Ki, kuna ni mianda anda ya bona, kono nako ye hape, kuezwa lipaki zetalu. Ni na ni sishañata sa zona liñozwi fa; kono kwa ku buluka nako.

⁹⁹ Jeremia yana pakilwe, na li muyambaeli, kono mupolofita ya pakilwe wa Mulimu. Neba mu toile muuna yani. Neba mu posaka- . . . miselo ye si ka buzwa, ni lika zeñwi. Mi ki ha ba kuta. Ni lika za na ezize, mi fani kwa matuku a teni, ni lika, ni kufa lisupo za kuli Isilaele na fosize.

Mupolofita kaufela, mupolofita wa niti yakile aba teni mwa lifasi, nekutile likopano zani za likeleke. Kana ne lika cinca cwani, ka Mulimu ya sa cinci?

¹⁰⁰ Moya o Kenile ki Mupolofita wa hola ye; Wa pakela Linzwi la Hae, ku Li nyakisisa. Moya o Kenile noli Mupolofita wa hola ya Mushe. Moya o Kenile noli Mupolofita wa hola ya Mikaya. Moya o Kenile, ono ñozi Linzwi, utahanga ku to paka Linzwi.

¹⁰¹ Cwale kiñi se ne si ezahalile mwa nako ya Mikaya? Akabe na bulailwe, mi linja za kapa mali a hae, kuya ka Linzwi la Mulimu.

Kaufela mina baluti ba buhata, kona mwa bulelela Mulimu, zazi lelinwi muka kutula se mu cala, mina baeteleli ba libofu munze muetelela libofu! Ha ni sika nyema. Ni mi bulelela fela Niti. Mi Ne ni si ke na ipulelela fela se fa halimu fa hape, mwa muzuzu wani, kambe kuli Moya o Kenile no si ka bulelela kuli, “Usibulele ka mukwa o cwana.” Kana Ni kile na mi bulelela sika sesiñwi sesi fosahalile kono kwanda seo Mulimu na pakile kuba se si lukile? Mu zuhe, bana bahesu, kusika fela kale nako!

¹⁰² Kono ni bulele cwana. Kana ku ka konahala cwani kuli mukona uzuhe mi ube seto, kanti no leliwe kuba ona sani? Kana ba Baketilwe ba ka palelwa cwani ku si bona? Kakuli, mu ketilwe kuli mu si bone. “Kaufela be Ndate a Ni file ba ka taha,” kubulele Jesu, “kono hakuna nihaiba yomukana yakona kutaha konji kuli Yena u Ni file bona kusika tomwa mutomo wa lifasi, fani mabizo a bona ha na beilwe mwa Buka ya Bupilo ya Ngunyana,” isiñi mwa buka ya muokameli wa keleke, kono mwa Buka, ya Ngunyana Buka ya Bupilo.

¹⁰³ Mulemuhe, Jeremia ki ha yema, inza pakilwe fa pila sicaba, kono niteni ne ba mu toile.

¹⁰⁴ Mi kacwalo ki ha bazwela kwande ba yo panga koko, a eza, mi a beya fahalimwa mulala wa hae, mi aya kwa pili a sicaba. Kiha bali, “Oh, luna lu sicaba sesituna sa Mulimu. Kiñi, ki luna Isilaele. Lu sephala hahulu ka sinagoge ya luna! Lwa banga teni kala Sunda ni sunda, luna, lu fanga litabelo, mi lwa lifanga masheleñi aluna. Kana Nebukardinezare naka bulele cwani lika ze kenile za Mulimu?” Huh! Libi za mina kona ze liezize.

Mulimu naize, “Haiba mu ka buluka litaelo za Ka, Ha ni na ku eza sa kuli. Kono, haiba ha muezi, li ka mi tahela.” Yani ki niti yetezi. Isali nto yeswana. Kubuluka litaelo za Hae, Linzwi la Hae la hola, sa Na sepisize.

¹⁰⁵ Cwale mulemuhe. Cwale, Jeremia, ka tato ya Mulimu, mupolofita ya pakilwe, nihaike natoilwe. . . Kaufela bona ne ba toilwe mwa mazazi abona. Ne ba ezize litaba zenza ze shutana ni kopano ya lizazi la bona, mutu kaufela na mu toile, nihaiba malena ni lika kaufela. Kacwalo abeya ona—ona koko fa mulala wa hae, ni kuli, “KISONA SA BULELA MULENA. Mukaba kwani ka myaha ye mashumi a supile,” kakuli nabile ni kutwisiso ya Linzwi la Mulimu. “Myaha ye mashumi a supile!”

¹⁰⁶ Mi cwale Hanania, Hanania, Ni sepa mu ipeletela kuli, H-a-n-a-n-i-a. Hanania, mupolofita mwahala sicaba, kiha taha, anga koko fa mulala wa Jeremia, ni ku iloba. Ni kubulela kuli, ibe ponahazo yetuna mwahala sicaba, mwabona, kanti na bulele ka ku lwanisana ni Linzwi la Mulimu. Mi ki hali, “Myaha yemibeli baka yo kuta. KISONA SA BULELA MULENA.”

Bapolofita baba tozizwe bababeli. Shutano neili cwani kubona? Yomuñwi nana ni kubulela Linzwi, mi yomuñwi kutokwa. Jeremia ali, “Amen.”

¹⁰⁷ Fapila bahulu kaufela ni kopano, Isilaele kaufela, mwabona, nabata ku bonisa kuli wakona ku ba yomutuna sina Jeremia. “Wa ziba kuli ha ba ku lati wena, nihakulicwalo. Kacwalo Ni mupolofita, nina. Na ni mupolofita kufita mo uinezi wena, kakuli upolofita buhata. Uni bulelela kuli sicaba sa Mulimu sikaba mwatasa taba ya *kuli-ni-kuli* wena?”

Sani kona se ba bulela kacenu, kono ukaba kwani ka mukwa oswana, sina keleke. Mu kutilwe ka sikuto. Kaufela mina likeleke, likopano liswalelezi kwa lizo za zona za mutu mwa sibaka sa kuswala Linzwi la Mulimu, mu kutilwe ka Mulimu.

¹⁰⁸ Cwale mulemuhe, ki yo fa wataha. Hanania unyanganyisa koko ye kuzwa fa mulala wa hae, ponahazo ya Mulimu, a iloba, mi ali, “KISONA SA BULELELA MULENA. Myaha ye mibeli ba ka yo kuta.” Ka mukwa fela wa kuiponisa, “Kina *Wa-kuli-ni-kuli*.” Kakuli na yemi mwahali, nali mupolofita wa katengo.

¹⁰⁹ Jeremia nali muuna wa lihalaupa yana ipilela anosi. Na polofitile bumaswe ka bona nako kaufela, kakuli nebali ba bamaswe.

Mi muuna yo na sweli kuba bulelela, “Oh, kaufela mina mwa lukisa ibile fela mu ba siemba. Ibile fela mu ma Isilaele, sani kona se si li butokwa. Mwabona, mina, luna. . . Mulimu hana kueza cwalo. Na ziba kuna ni sesiñwi sesi likani se si ka ezahala fa, kono musike mwa komoka, musike mwa saba.”

Oh, muzwale, ba sa pila ni kacenu. “Musike mwa saba, lika kaufela liiketile. Luna ni lika kaufela mwatasa tamaiso ye i ketile. Luna lu Keleke.” Musike mwa nahana cwalo. Eeni.

¹¹⁰ Kacwalo ki hali, “Lika kaufela li i ketile. Ba ka yo kuta fa myaha ye mibeli. Yani ki nto yenyinyani ye ne ezahalile. Ha ki taba yenca. Luna ni zani. Mi Nebukardinezare ki ha taha, kono Mulimu wa luna uka tokomela lika ze kaufela.”

Kono Linzwi neli ize kuli bakaba kwani myaha ye mashumi a supile; kufitela lusika lwani ha ne se lukaba lu felile, ni lusika loluñwi. Myaha ye mashumi amane ipanga lusika. “Ye ikaba bukaufi ni masika amabeli kona o mu ka yoba kwani.” Mi Jeremia abulela kuya ka Linzwi la Mulimu.

¹¹¹ Hanania aloba sani! Jeremia ali, “Ku lukile. Amen. Kono, Hanania, ha lu hupule se, sibeli sa luna lu bapolofita. Lu bakutazi.”

Mi Ni li ku wena, muzwale wa ka. Ha lu hupule kuli kukile kwaba bapolofita fa pila luna, mi ne ba polofitile kulwanisa mibuso, ni kupolofita kulwanisa lika zeñwi. Kono, hupula, fani mupolofita hana bulela sesiñwi, na lukela kupolofita kuya ka Linzwi. Sina Mikaya, ni Mushe, ni babañwi ba bona kaufela. Si lukela kuya ka Linzwi. Haiba ha si cwalo, kona kuli u hupule sene si ezahalanga.

¹¹² Mi he, Hanania, buhali bwa kuluka kwa hae bwa pahama. “Kina Hanania” (hakuna kukakanya), “ni mupolofita wa Mulena, mi Ni li, ‘Myaha ye mibeli.’” Ka manzwi amañwi, “Ha ni na taba ka seo Linzwi li bulela.” Tozo ya hae, “Ni li, ‘Myaha ye mibeli, ba ka yo kuta.’”

¹¹³ Jeremia azwa fa pila hae, azwela fande, ali, “Mulena, Ha nina taba ka sa bulezi, Ni sa lumela ni ku ziba kuli Linzwi lani libulezi cwalo. Ni ka pila ya sepahala ku Wena. Hanina ku pumiwa ki yena.”

¹¹⁴ Mulimu ali, “Zamaya utaluseze Hanania kuli, ‘Ni ka panga ka sipi, koko ye tatama.’” Kakuli uezize cwalo, na zusizwe mwa lifasi, Hanania aya, ka mwaha oswana wani.

Yani kona mitala ya luna, bapolofita bababeli. Lika zeñata za kona ku bulelwa ni ku ambolwa ka nako ye.

¹¹⁵ Kono mutokomele. Jesu naize, kuli, mwa nako ya maungulo ye, hape, mioya ye mibeli ikaba bu kaufi hahulu hape. Ki niti yeo nji? [Puteho ili, “Amen.”—Mu.] Cwale mulemuhe. Ikaba bu kaufi kufita mone ku inezi. Ye ki nako ya maungulo. Oh, bana! Mulimu alu utwele makeke! Kufitela, “Ha si ka ba sa niti luli kuli mane sipume nahaiba bona ba Baketilwe haiba ku konahala.” Cwale muka eza cwani. . . ne lu ziba cwani mwa mazazi ani? Mu ka li ziba cwani kacenu? Ka nzila yeswana, mupile ni Linzwi, “Jesu Kreste ya swana maabani, kacenu, ni kuyakuile.”

Cwale muiseze ngana kwa Liñusa le. Mi haiba muteeleza kwa litapa, mane mwendi Ni kabe niile zazi leliñwi haiba Mulena ukabe afelize ni na fa lifasi fa, mu swanisise ku se. Muteeleze kwa linzwi laka, seo Ni mi bulelela. Haiba Uka ni nga ku sikaba kale Kutaha kwa Hae, muhupule fela, Ni bulezi ku mina ka Libizo la Mulena, ka Linzwi la Mulena. Eeni.

¹¹⁶ Mulemuhe, “Likaba bu kaufi hahulu kuli lika puma nibona ba Baketilwe kambe ki nto ye konahala,” ba ka eza lisupo ze swana, limakazo ze swana, ka Moya o swana. Ki niti yeo nji? [Puteho ili, “Amen.”—Mu.] Sina fela bapolofita mo ne babezi bani be lusazo bulela ka bona, bapolofita. Cwale, hape ku ñozwi. . .

¹¹⁷ Ha lu yeni kuyona, ka taba ye, haiba mwa bata, Timotea wa Bubeli 3. Lusike lwa siya ye. Mi ha Ni lati kueza cwalo. . .

¹¹⁸ Ni sweli ku talima fa waci yani fa halimu fani, mi Ni—Ni bata kutula zeñata za teni, mi ha Ni sepi kuli lu lukela kueza cwalo fa. Mwabona? Mulemuhe. Fela. . . Haiba Ni yema kwanu, ni sweli kufufulelwa sina mo Ni bezi, mwabona, kono Ni tabile. Mi Ni ziba kuli ye ki niti. Timotea wa Bubeli 3:8.

¹¹⁹ Paulusi, muuna yana ize, “Haiba Lingeloi litaha kuzwa kwa Lihalimu mi libulela manzwi asili ku mina kufita ao Ni bulezi, libe le li kutilwe,” cwale, Lingeloi hali taha fafasi. Sani ki Matesalonika ba Bubeli. . . Oh, mu Ni swalele.

¹²⁰ Mulemuhe mwa Timotea wa Bubeli 3:8. Mutalime Paulusi wa bulela cwale. Ha lu kaleleni ka . . . Ha lu kaleleni fa timana yapili, mi cwale muteeze katokomelo luli. Mina mu na ni Libibele za mina, mubale ni na. Mina baba sina Libibele, muteeze hande. Kuna . . .

Hape u zibe kuli, kuli mwa mazazi a maungulo . . .

Mulale kwatasi a seo, “mazazi a maungulo.” Kwani kona ko li ka ezahalela.

. . . ku ka taha linako ze tata. (Luinzi ku zona.)

Kakuli batu ba ka ba baitati, baba lata mali, ba baitumbaeta, ni ku ikuhumusa, ikaba banyefuli, baba sa utwi bashemi babona, baba sina buitumelo, babasi ka kena,

¹²¹ Mutalime sikwata se luna ni se kacenu, sibolile. Nihaiba ku mutu ya zamaya mwa mukwakwa, mutangana yo munyinyani, banze bahohela milili yabona fafasi mwa lipata za bona, sina kwa basali ni bifaha sina musali. Ku lyangana! Masodoma!

¹²² Kana mubalile mwa silimo se, mutende wa kweli ye wa ba *Reader's Digest*? Noize, “Sicaba sa ma American ka nako ye,” seo Ni sepa kuli neli cwalo, “mwahala myaha ye mashumi amabeli kamba mashumi amabeli ka aketalizoho a kupepwa, seli mwa buino bwa myaha ya fa hali mwa bupilo.” Ba felile! Ba bolile! Sayansi ibulela kuli, kuli muuna mwa lilimo za hae za bunca, mi musali, haba se bali mwa lilimo ze mashumi amabeli za bunca bwa bona. Mibili ya bona ibolile hahulu mi i filwe ku za masila.

¹²³ Oh, America, ku kanga nako ye kuma kai Mulimu inza bata ku mi sileleza, kono cwale hola ya mina ifitile! Mu zamaisa lifasi mwa masila.

. . . banyefuli, baba sa utwi bashemi ba bona, baba sina buitumelo, baba si ka kena,

Ba basina lilato la taho, . . .

Hakuna kuba lilato la niti nihaiba ku mutu ni mutu, muuna ku musali, musali ku muuna. “Kutokwa nihaiba mane lilato la taho.” Masila, kuya ka za kusoma!

. . . baba na ni ñole, baba seba batu ka buhata, baba sina buiswalo, baba na ni buhali, ni baba toya batu ba bande,

Ka manzwi amañwi, lu bulele, “Mina sikwata sa bapikuluhi baba kenile.” Yomuñwi na buzize zazi leliñwi hane li nako ya kutaha kwanu kwa keleke. Ali, “Usike wa ya teni kwani. Kaufela ki sikwata sesituna sa lilata sesisweli kuzwelapili.”

Mwabona, “bahanyezi ba zani.”

Ikaba lishembi, ni matanya, ni baba inuneka, baba lata minyaka hahulu kufita kulata Mulimu;

Mu li, “Muzwale Branham, yani ki swalisano.” Timana ye tatama ibulela cwani?

Bakaba ni mubonahalelo wa bumulimu, kono (sikamañi?) ba ka latula mata ateni: (ona Linzwi, Jesu Kreste ya swana maabani, kacenu, ni kuyakuile, na bonahalize, sepiso ya lizazi lateni) . . .

Sina fela inge Hanania, sina fela inge Zedekia, sina fela inge Balami, kwani kwa mulaho, baplofita babañwi ba buhata.

Kuba ni mubonahalelo wa bumulimu, (kutoziwa . . . Mwabona?)

Kuba ni mubonahalelo, (kutoziwa, ba buleli baba beilwe mazoho . . .)

Kuba ni mubonahalelo wa bumulimu, kono ba latula (kuli Yena wa swana maabani, kacenu . . . Kulatula Linzwi la Hae!)

Kana ne ba latuzi cwani Jesu mwa lizazi lani? Ki mañi yene ba latuzi fani hane ba latula Jesu? Linzwi. Nebali ba bulapeli. Neba lutile kuzwa mwa Bibebe ya bona, kono ne ba latula Linzwi la lizazi la bona.

Ki sikamañi sebali sona kacenu? Taba yeswana, ba tozizwe, kukutaza Evangeli ya pentekota, kono ba latula sepiso ya lizazi la Linzwi le li pakilwe la kacenu, “Jesu Kreste ya swana maabani, kacenu, ni kuyakuile.” Kana mwa sibona nji? [Puteho ili, “Amen.”—Mu.]

Ku bona kuna ni baba nanalela mwa mandu, mi baswasa . . . basalinyana baba imezwi ki libi, baba yaulukiswa ki litakazo zeñata,

“Mikiti yaluna ya za kuluka ni za *kuli-ni-kuli*.” Yomuñwi ataha kuto lika kulyanganisa toloko ya Linzwi, mi ubulela cwana, “Ku likani, kezeli, kuli ube ni milili yemi kuswani. Musike mwa teya zebe kwa butanya bwani. Mwabona? Kamba, haiba mu—mu tina *cwana*; ha ki zona *zani*, ‘kono ki zezwa mwa pilu ya mutu kona ze mu silafaza.’” Mwabona? Mi kana walemuha kuli utozizwe ka moya o maswe, moya, wa litakazo mi o masila? Mutokomele, wa kona kuopela mwa kwaya, ni milili ye mikuswani, kono una ni moya omaswe. Zani za lwanisana ni Linzwi. Yani ki niti. Sani kona se ne i bulezi Bibebe. Mi wena uli, “Kulukile, Na tinanga tuputula. Ha si ni fi mulatu.”

“Yo kaufela, haiba musali u apala siapalo se si lukela kuba sa muuna, ki maswabisa fa pila meto a Mulimu.” Mulimu ya sa cinci na bulezi sani.

¹²⁴ Oh, lika zeñata luli, kana lu kona kuya cwani mwa lika zani? Nako ya luna ne i kafela. Kono muziba hande lika ze lukile ni ze fosahalile. Mi Ni kona cwani ku ba eza kuli bapete cwalo? Kana Ni kona kueza cwani? Muli, “Kulukile, ki sikamañi se

mu huwakela cwalo?” Ni paki ye milwanisa. Zazi leliñwi, mwa Lizazi la Katulo, hamuna kuba ni lilulu la kukena teni.

¹²⁵ Kana Mikaya naka tuhelisa cwani sani? Kana Mushe yena; kuhuwa, kulika ku lituhelisa? Mi Joshua ni babañwi banze ba mata mata mwahala sicaba? Mi Levi acomola mukwale wa hae ni kuba bulaya, ni bona? Ne ba zwezipili kuya ona cwalo ka kuswana.

Ku akalezwa kuli ba ka eza cwalo. Mi ba ka ba ni kueza cwalo, kakuli sani KISONA SA BULELA MULENA ba ka ba ni kueza cwalo. Kana mu hupula kuli liketisa zani lika lobeha fateni nji, likopano za bona lika kutela kwa Linzwi kana? KISONA SA BULELA MULENA, habana kuba cwalo! Kana ba ka kena mwa bu antikreste nji? Kaniti. KISONA SA BULELA MULENA, ba ka ba cwalo! “Kacwalo mubulela sikamañi ka sona?” Ni lukela kuba paki, mi ni mina mu cwalo, balumeli kaufela. Mutokomele.

. . . basalinyana baba imezwi ki libi . . . ka litakazo zeñata,

¹²⁶ “Kulukile, basali kaufela babañwi ba ezanga cwalo.” Bapolofita ba buhata! Cwale muteeleze. Bapolofita ba buhata, kona bo Ni bulela ka bona. Cwale ki sikamañi se ba ka eza ka lizazi la mafelelezo?

. . . baya ka basalinyana . . . baba zamaiswa ki litakazo zeñata,

“Kulukile, Na ziba basali babañwi kaufela . . .” Ki hande, muzwelepili.

¹²⁷ Ki sikamañi sene Ni bulezi ku si ka ba kale ni likezahalo zetuna ze mwa California mo? “Mina sicaba kwanu kwa Los Angeles, mwaha ni mwaha mo Nitela kwanu kuna ni basali ba kuta milili ni baana baba eza mikwa ya sisali kufita bene bali teni nako yapili, bakutazi babañata baya mwa likopano. Mina hamuna buinyazo! Kambe misebezi yemituna yene ezahalile mwa Sodoma ni Gomora neika ezwa ku mina, neika yema ni kacenu. Oh, Kapenauma, wena ya ipiza ka libizo la mangeloi, Los Angeles!” Mwabona se si ezahala? Uya inza tiba kunwela mwatasa liwate. Ki lili? Hani zibi folika yela, kono la ya. Mina batu ba banca, haiba ha Ni si boni mwa lizazi laka, mu tokomele. U ile!

Banze baituta kamita, . . . mi ba palelwa kufita fa zibo ya kuziba niti.

Cwale ki ye fa taba ye makalisa, ki ye fa taba ye zinga. Muteeleze ku se.

Cwale sina Janesi ni Jambresi ha ba ne bahanyezi Mushe, kacwalo nibona bao bahanyeza niti: ki batu ba ba bolile mwa maikuto a bona, baba latehile ka tumelo yekile yafiwa hañwi ku baba kenile, ka niti.

“Kuamana ni Tumelo.” “Mi uka shimbulula Tumelo ya bo ndate, kamba ya bana, ku kutela ku bo ndate.”

¹²⁸ “Baba latehile kuamana Tumelo.” Uh! Mwa ziba seo *kulateha* si talusa? Haiba mu na ni Bibehe ya Scofield, kuna ni taku ya “h” fani. Fa halimu fani, ili, “kukwenuha.” Kukwenuha kwa tumelo, sani kona seo sili sona.

¹²⁹ Cwale, fa muzuzu fela. Ni bata ku talima sesiñwi fa. Ni sepa Ne ni i ñozi. Ha ni sepi, kono Ni bata ku ibulela, ni ku i talima Ni—Ni sika ibulela kale. Cwale, ka muzuzu ulimuñwi fela. [Hakuna manzwi fa tepu—Mu.] “Bakwenuheli kuamana ni Niti, kuamana ni Tumelo.” “Ona Tumelo,” kuna ni fela Tumelo iliñwi. Yani ki niti. “Kuamana ni Tumelo, bakwenuheli!”

Cwale Ni bata kubala Luka 18. Fa muzuzu fela. Ha mu tokwi. . . Mwa kona ku li ñola; ha mu lukeli ku bala.

Mi aba bulelela nguli ya kuli, batu balukela ku lapela kamita, mi basike. . . bafokola;

Ali—ali, Nekuna ni muatuli mwa munzi omuñwi, ya na sa sabi Mulimu, mi na sa kuteki mutu:

Mi ne kuna ni mbelwa mwa munzi o swana; mi musali kiha taha ku yena, ali, Uni atulele ku ya ni zekisa.

Mi na si ka—mi na si ka eza sesiñwi fa nako nyana: kono kasamulaho aipulelisa ali, Ni ha Ni sa sabi Mulimu, kamba kubala mutu kuli ki mañi;

Kono kakuli mbelwa yo wa ni kataza, Ni ka mu atulela, aka suhana. . . ani toliyanga.

Mi Mulena ali, Muteeleze seo muatuli ya sina niti abulela.

Mi Mulimu kana asike a atulela. . . baketwa ba hae, baba lilela ku yena musihali ni busihu, ni ha ka ba kuzeza fa nako yetelele?

Ni mi bulelela kuli uka ba kutiseza kapili. Nihakuba cwalo ki kuli nako ya taha Mwana mutu, kana uka fumana tumelo mwa lifasi nji?

¹³⁰ Cwale yani ki puzo. Fa kona fo ne Ni bata kufita, mwa Sinulo 10. Lu ka fita kuyona mwa mizuzu yelikani, mwa Liñolo leliñwi la timana. Na ize, “Mwa mazazi a Liñusa la lingeloi la bu supa, kunutu ya Mulimu ilukela ku felelezwa.” Ki ye fa puzo, kikuli, haiba mulatelela mwa mukoloko wani ka hola ye, kana lika feliswa nji? “Kana Ni ka fumana Tumelo nji?” Kana Malaki 4 italelezwe ka nako ye, “Ku kutisa Tumelo ya bana, ku kutela kwa Tumelo ya bo ndate, ya makalelo, ona Linzwi?” Mwabona?

¹³¹ “Bakwenuheli, Jambresi ni Janesi, sina ha ne ba hanyelize.” Cwale, hape, muteeleze, Timotea wa Bubeli 3:8. “Sina Jan- . . . hana hanyelize Mushe, ona cwalo mwa mazazi a mafelelezo bakwenuheli kwa tumelo ba baka taha,” cwale mwa bona ko Si

fumaneha mwahali mo, “kuba ni mubonahalelo wa bulapeli,” ba batozizwe. Cwale fela halu. . . Mu kutele kwa mulaho mi—mi mubale fateni ha mu ka fita kwa mandu amina, ili kuli Ni kone kufeza se kapili, kakusasana cwana, haiba Ni kona. “Bakwenuheli kuamana. . .” Isiñi bakwenuheli mwa—mwa—mwahala ku pila; baiketile, baana baba itutile.

¹³² Cwale mulemuhe fani Mushe hanaile kwa Egepita, ni liñusa lakuli KISONA SA BULELA MULENA, mi na pakilwe; abiza Isilaele, yeneli sicaba, isiñi keleke. Isilaele neli sicaba; ne ba si keleke. Kakuli, linzwi lakuli *keleke* litalusa “baba bizelizwe kwande.” Nebali sicaba sa Mulimu. Mi cwale hane ba tiloba baba tozizwe ka Linzwi, mi ba bizezwa kwande, ne ba tiloba keleke ya Mulimu. Mi hape ba kutela mwa mulaho, kakuli ne ba sika lumela Linzwi la Mulimu, mi ba teezeza ku mupolofita wa buhata. Na sepa seo sanwela mwahali.

Isilaele, ka kuba sicaba sa Mulimu, ne ba tile ka lizoho la Mulimu, ne batozizwe ka Linzwi. . . ka Mata a Mulimu, ne ba boni lisupo ni limakazo za Mulimu. Mi cwale Mulimu hana sweli ku zamaya ni bona, mupolofita wa buhata ataha mwateni, ba batozizwe, mi ba luta sesiñwi se si shutana kwa Linzwi la Mulimu la pili lene ba utwile; mi yomuñwi ni yomuñwi wa bona ne ba shwezi mwa lihalaupa, kwanda batu babalalu. Cwale mu libelele fo.

¹³³ “Sina mo ne ku inezi mwa mazazi a Nuwe, ko ne kubile ni mioya ye ketalizoho ka yemilalu yene pilisizwe kwa mezi, kona mo ku kabelani ha taha Mwana mutu.” “Sina mo ne ku bezi mwa mazazi a Lota, ko ne ku pilisizwe babalalu kuzwa mwa Sodoma, kona mo ku kabelani Mwana mutu ha patululwa.” Ni bulela fela Mañolo, Linzwi la Mulena, a kuli, “Lihalimu ni lifasi lika fela. . .” Ikaba baba likani!

¹³⁴ Mulemuhe fa. Mushe uya ku Aruni. Mushe na lukela kuba Mulimu. Mulimu na mu bulelezi kuli abe Mulimu, ali, “Wena ube Mulimu, mi utuhele Aruni munyana hao abe mupolofita wa hao. Uka beya manzwi mwa mulomo wa hae haiba ha ukoni kubulela hande.” Ali, “Kono ki mañi yana pangile simumu? Ki mañi ya ezize mutu ku kona ku bulela?” Mulena kiyena ya ezize zeo.

Mi ki ha ya kwani. Ki sikamañi sa na ezize? Na ezize makazo ya niti mi ye lukile yana mubulelezi Mulimu kuli aeze. Mulimu na mubulelezi kuli, “Uye unepele mulamu wa hao fafasi.” A u nanula, mi neli noha. A i nanula, mi ya fetuha kuba mulamu. Ali, “Zamaya uyozeza cwalo fa pila Faro, mi uli, ‘KISONA SA BULELA MULENA.’”

¹³⁵ Mi cwale Faro hana boni se, lubulela kuli, “Kiñi, ki mabibo a manyinyani cwani a cwalo.” Ali, “Hakuna sesiñwi ku ona. Ki butali bwa minahano, mwa ziba. Luna ni micaha mwa katengo ka luna ba bakona kueza lika zeswana. ‘Taha kwanu, Bishopu wa *Kuli-ni-kuli*. Mi, wena, uzwele kwande.’ Luna ni ba bakona

kueza lika zeswana.” Yani neli Satani yana ambola kufitela ku Faro.

Yani neli Mulimu yana ambola kufitela ku Mushe.

¹³⁶ Kono mutalime mutangana yo hanatile. Janesi ni Jambresi baya fa pila Mushe, ni patalaza fa pila sicaba, ni kueza makazo kaufela yeo Mushe na kona kueza. “Ba ka puma ni ba Baketilwe haiba kinto ye konahala.” Yeo ki niti nji? Neba ezize taba yeswana sina Mushe mwa na ezelize. Mwa utwa nji? Cwale muhupule, KISONA SA BULELA MAÑOLO, kuli lika kutela hape mwa mazazi a maungulo.

Shutano neli ifi mwahala Mushe ni Jambresi?

Mushe naize, “Cwale hakutahe mali mwa mezi.”

Mi bapolofita ba buhata ba sebali, “Luli, lubeye mali mwa mezi, ni luna.” Mi se ku ezahala.

¹³⁷ Kacwalo Mushe ali, “Ha kutahe linda.” Ki sikamañi sa na fita kusona? Kuzwa ku Mulimu. Mwabona?

Mi ki sikamañi sa na ezize? Ki hali, “Kulukile, luli, lwakona kutisa linda, niluna.” Mi baeza cwalo. Makazo kaufela yana kona kueza Mushe, ne ba konile kueza, nibona!

Muhupule, mubeye seo mwa mihupulo ya mina, lwa fita ku sona, kasumulaho wa nako. Bakona kueza sika kaufela seo babañwi kaufela baka eza, kono ha ba koni ku pila ka Linzwi. Ha ba koni ku pila ka Linzwi.

¹³⁸ Cwale mulemuhe, neba ezize cwalo. Kono Mushe, mupolofita wa niti ya lumilwe ki Mulimu, ya laezwi ki Mulimu, na sika kanana ni bona, ali, “Ki fo, ha mu koni kueza cwalo! Ha mu koni!” Na batuhezi fela banosi, ku basiya fela ba zamaye. Ki bapolofita ba likoapano, kono muzwelepili kuya.

Mushe naile fela cwalo, ateeza ku Mulimu. Seo kaufela Mulimu sa na bulezi, “Cwale ueze se,” Mushe naile mi a yo eza cwalo. Na ezize taba yenca. Fani ha ne ba ezize, mutu ni mutu wa bona nabile ni maikuto kamba sesiñwi, ki bao se ba taha. Ne ba ezize cwalo, nibona, ona cwalo fela sina Mushe mwana ezelize.

¹³⁹ Cwale mulemuhe. Mitangana ye ki ha ishokomoka... Oh, mina sicaba, musike mwa latehisa se! Baikangabeki ba, balikanyisi, nebatilo bonahala kasumulaho wa niti hane se aile pili. Mwabona? Batahanga ku to likanyisa. Mwabona, bana ni kueza cwalo. Diabulosi hakoni kubupa sika kaufela; yena ki mubondololi fela wa lika za niti.

Mi sibi ki sikamañi? Ki ku luka ko ku futuzwi. Ku buka ki sikamañi? Kezo ye lukile ye futuzwi. Buhata ki sikamañi? Ki niti ye sika bulelwa hande. Kulyanganisa!

Mutalime ku Hanania, kulyanganisa kwa Linzwi la pili. Mutalime ku Balami, kulyanganisa kwa Linzwi la pili. Mutalime ku Zedekia, kulyanganisa kwa Linzwi la pili.

Mi ni Bibeले i bulezi kuli micaha ba baka taha, kutaha ka kulyanganisa . . . kamba kuto lyanganisa Linzwi le li pakilwe la makalelo mi ki le li nyakisizwe kuba la Niti.

¹⁴⁰ “Eza musebezi wa mubuleli,” mwa lilulu lani mwa buse, “ubonahalise bupaki bwa bulumiwa bwa hao. Kakuli nako ya taha ha ba si ke baiseza ngana kwa kuteeleza Tuto ye pilisa, kono ka litakazo za bona ba ka ipundekela baluti, baba ka ba ñwaya mwa lizebe; mi bazwelepili ni kueza sika kaufela se ba bata kueza, mi, ‘Ku likani, lu na ni sisupo sesiswana ni limakazo.’ Mi ba ka keluha kuzwa kwa Niti, mi batiswe kwa matangu, lituto za litumeo za bumulimu.”

¹⁴¹ Oh, ona zibo ya Moya o Kenile, kukomoka ko kunata fa moyo wa mutu hatuhela mi unahana buniti ni patalaza ya lika mo libezi fapila luna! Mukate licwe la mwa lilulu lani mi mubale siemba sa pampili se si beilwe teni mwani, myaha ye mashumi amalalu yefitile. Mwabona sa Na bulezi kuamana kwa buse kaza—kaza Mukwakwa wa bu Supa, kakusasa wani fani licwe la mwa lilulu le ha ne litomilwe. Cwale mutalime. Mutalime kwatasi kwani kwa nuka, fani Lingeloi la Mulena hane litile mwa mufuta wa Siita sa Mulilo, mianda anda ya likeleke, kamba sicaba sa keleke, ne ba yemi fa likamba; mi Yena ali, mubone haiba si ka to ezahala. Mubone ze ezahalile.

Ku tata hahulu. Na ziba ku bonahala kutatafala hahulu, mizwale, kwande kafo. Kono ki . . . Bibeले i bulezi kuli, Jesu naize Kasibili, “Li ka puma mane nibona ba Baketilwe haiba ki nto ye konahala.” Hakuna mukwa usili ka zona. Ha ba na kukona ku Li bona. Kambe ne ku ka konahala, nibona ba Baketilwe ne ba ka pumwa ka zona.

¹⁴² Mulemuhe, batu ba ne ba bonahalile kasamulaho ya tozizwe wa Mulimu wa niti na sa lumilwe; ka mupolofita wa Hae wa niti, Mushe. Mi fani Mushe ha na ka eza sika kaufela, ne ba ka si likanyisa.

¹⁴³ Cwale, muzwale, kezeli, Ni . . . Ye ki keleke ya ka tota. Ni na ni tukelo ya kukutaza ze Ni lata, ibile fela kuli sizwelela mwa Linzwi la Mulimu. Mi ha Ni mi nyazi mina sicaba, kono ha lu tatubeni fela sani ka nako ni hola ye lu pila kuyona.

Litumeliso ku Muzwale Ruddell, ku Junior Jackson, ni bona baba kwande kwani, likeleke zahesu zelupaka. Ni ba libezi, fa nako ye fitile. Na sepa ba swalisani kwa mawaile kakusasana wo, nibona, kakuli bakeñisa kutokwa—kutokwa sibaka mwa keleke.

¹⁴⁴ Munahane fela ka zona cwale, fa muzuzu fela. Ne ba ezize limakazo ze swana sina za na ezize Mushe. Mushe natisize linda; se ba likanyisa mi batisa linda. Mwabona?

Mulimu ali, “Zazi le mu ka ca kuyona, zazi leo mu ka shwa.”

¹⁴⁵ Satani ataha ni kutoli, “Kaniti, ha mu na kushwa. Fela mu ka ba ni butali. Mu ka ba ni kopano yende, buino bo

bunde. . .” Mwa ziba. “Mwa ziba, lika kaufela likaba hande ku mina, mu ka ba ni Liseli le liñata.” Mwabona, kulyanganisa fela. Mulukela. . .

Mi muhupule, KISONA SA BULELA MULENA, kuya ka Timotea wa Bubeli 3:18, kuli, “Mwa mazazi a maungulelo, kuli bona bo Jambresi ni Janesi ba ka ba mwa lifasi.” Cwale, Ni bata kuli mulemuhe kuna ni bababeli ba kubona, mwabona, balikanyisi.

¹⁴⁶ Cwale lu ka kutela kwa Sodoma, kasamulaho wa nako, kubona kuna ni, lufumane Mangeloi amalalu ani anatile, mi mubone malikanyiso, ni zeñwi cwalo, mwabona, mubone se si lukile ni se si fosahalile. Mwabona? Mwabona?

¹⁴⁷ Mulemuhe, ne ba ezize limakazo zeswana. Kono, mulemuhe, ne ba likanyisize kwa Linzwi la niti lene li tozizwe, ka yanali wa luli yo Mulimu na lumile; na latelezi, lwa bubeli.

Ha nizibi haiba lukona ku nahana fa muzuzu nyana. Kunga sicaba ka lizoho, ha ki kale hahulu, mwendi myaha ye mashumi amabeli ye fitile, mi sisupo ne si bonisizwe. Mushimani, ne ku na ni lisupo kai ni kai mwahala lika, mi mutu ni mutu. . . Alimuñwi na bile ni sona mwa lizoho la hae la silyo; yomuñwi una ni sona mwa lizoho la hae la nzohoto; yomuñwi wa si nunkelela. Mwabona, mifuta kaufela ya. . .Mi Na komoka. . . Mulimu hana ku ni tuhelela kuli ni mi bulelele ka nako ye sene sili niti ya luli, kono zazi leliñwi mu ka yo ziba. Sani neli fela ku bonahalisa bukuba bwa bona fa ngandaleza. Sani ne si sikaluka, kwa simuluhu. Ni ka mi bulelele, zazi leliñwi, haiba Mulena wa lumeleza.

¹⁴⁸ Mulemuhe, ne ba ezize limakazo zeswana, kono ne ba sika. . . Mulemuhe, ne ba sika eza konji pili Linzwi la niti hane likalile, pili. Kona mwa na ezelize Satani cwalo mwa simu ya Edeni. Cwalo kona mwa ezelize nako kaufela. Ki mañi yana polofitile pili? Mushe. Ki mañi yana bonahalile pili, Mushe kamba Balami? Mushe. Ki mañi yana tile pili, Jeremia kamba Hanania? Mwabona se Ni talusa? [Puteho ili, “Amen.”—Mu.]

¹⁴⁹ Mulemuhe, ne ba likanyisize. Balikanyisi ba butu, ku sepahala, ka kunahana kuli neba “ezeza Mulimu sebelezo,” sina Davida mwa na ezelize, biki ye felile, kono malikanyiso a butu. Ni libelele fela fa muzuzu. Ni bata kuli munahane mwahala libaka zepeli ze. Haiba ha Ni buleleli ka zona, kaniti Moya o Kenile uka li patulula, sihulu kuba Baketilwe. Mwabona?

¹⁵⁰ Kopano ya Faro ibulelela kuli, “Luna ni mutu yakona kueza lika zeswana ze,” mi ki ha ba eza. Mwabona? Ki kabakalañi Faro hana ezize cwalo? Ki kabakalañi Mulimu ha na li lumelelize? Ki kabakalañi Mulimu ha na ka luma mupolofita wa niti, ya tozizwe kwani kuli ayo eza makazo fapila Faro, ni kutuhela kopano kuli malikanyiso a kopano atahe bukaufi fapila sicaba? Ki kabakalañi ha Na ka tuhelele balikanyisi kutaha ni ku to eza

ze cwalo, ni kueza lika zeswana ona cwalo sina Moya wa niti wa Mulimu se ne ueza? Mwabona, Mañolo ana ni kutalelezwa.

¹⁵¹ Mulemuhe, Na ezize cwalo ili kuli A tatafaze pilu ya Faro ni Maegepita, kubonisa kuli Mushe na si yena anosi fela yana na ni Linzwi. Ne ba kona kueza lika kaufela ka kuswana sina Mushe mwana kona ku ezeza.

Mi ki kabakalañi Mulimu hana tuhelezi kuli se siezahale mwa mazazi a mafelelezo? Kacwalo, taba yeswana sina moya o puma mono bulelezi ku Zedekia, “Kana luka isa cwani Akabe kwani, kuli lika ze lito ezahala?” Kana Uka kopanya cwani sicaba se, se si sepa mwa likeleke za habo, kuli sizwele kwani ni kutuhela taba yeswana ye kuli i ezahale, yana akaleza Yena? Bona, mwa Lusika lwa Keleke ya Laodesia lo, “Kakuli wena ubulela kuli u ‘fumile, mi hakuna so tokwile. Ni inzi sina mulena wa musali.’ Hakuna se ni tokwa! Kikuli ha u zibi kuli u nyandile, u mubotana, usibofu? Ni ku eleza kuli utahе uleke ku Na,” Na ize, “oli ni gauda.” Ki kabakalañi ha Na ezize cwalo?

¹⁵² Ki kabakalañi ha Na tuhelezi malikanyiso a kutaha mwa mazazi a maungulo a, lika ze halinze lito ezahala ka Linzwi la niti la Mulimu; ni ku tuhelela balikanyisi banze bataha ni kuto eza lika zeswana, ni kulatula Linzwi la niti la Mulimu? Na ezize cwalo ku Mushe. Mi Faro naezize cwalo kulwanisa Mushe; ni bani, Janesi ni Jambresi, neba ezize kulwanisa Mushe. Mi Bibe le ibulezi kuli lika kutela hape mwa mazazi a maungulo. Kiluna ba fa. Cwale, haiba ani a ki Mañolo atalelezwa, ki kai fo lu zamaela?

¹⁵³ Kana Mushe na kananile ni bona ni kubulela kuli, “Kwanu! Kwanu! Ha mu koni kueza cwalo. Ki na fela ya supilwe ku eza cwalo. Kwanu! Mu tuhele zeo, ona fa”? Na ba tuhezi fela kuzwelapili.

Kuba tuhela banze bazwelapili. Muhupule, Bibe le i bulezi kuli, “Sina bukuba bwa bona ha ne bu bonahalile, ni cwalo ki mo ku kabela ku ba mwa lizazi la maungulo,” fo Munyaliwa ha a shimbiwa mwa mbyumbyulu. Mulemuhe.

¹⁵⁴ Mushe, Linzwi la niti lene libonahalile, na sika bulela nihaiba sika, mu li tuhele fela lizwelapili. Kono Na ezize sani ili kuli A tatafaze pilu ya Faro, apume Faro.

Na ezize ona taba yeswana yani kuli A pume Akabe. Mi mushimani alimuñwi yani inza yemi fani anosi, Mikaya yo munyinyani, aba bulelela ali, “KISONA SA BULELA MULENA.” Ne ku yemi yomuñwi fateni, ya tozizwe, “KISONA SA BULELA MULENA.” Mi kakushutana, yomuñwi ku yomuñwi.

¹⁵⁵ Lu yema kacenu ni manzwi akuli KISONA SA BULELA MULENA, kuli kolobezo ya mezi mwa mazazi a mafelelezo ilukela kuba ka Libizo la Jesu Kreste. Mi muuna yomuñwi uyema ni kueza limakazo, ni, wa tumelo ya bulalu bwa bumulimu.

Mu ni bonise linzwi lakuli *bulalu* bwa bumulumu mwa Bible. Mu ni bonise ko ku na ni Balimu babalalu. Mu ni bonise ko ku na ni lika zecwalo. Haliyo mwa Linzwi la Mulimu. Hakuna sika sa mufuta o cwalo kuli mutu wa kuli nakile a kolobezwa ka libizo la “Ndate, Mwana, Moya o Kenile,” kuitusisa malumbatina ani. Lika ze kaufela, “Oh, ki zende, likezeli. Zani li lukile, mube fela ni yemitelele. . . milili ya mina ye mikuswani. Zani li lukile, ha mulukeli kueza *se, sani*, kamba *sesiñwi*. Oh, bwani ki bukuba, puka ya kale.”

Kono Bible iize! Mi U sepisize, “Mwa mazazi a mafelelezo, Na ka luma Moya wa Elia, mi na ka biza sicaba, bana ba Mulimu, kukutela kwa Tumelo ya pili sina mo ne kuinezi kwa simuluho, ya Linzwi.” Linzwi lani ne li nyakisizwe, Mwana mutu mwa mazazi a maungulo, nto yeswana sina mo ne kubezi mwa Sodoma; maabani, kacenu, ni kuyakuile. Na sepisize kueza ona cwalo. Ki sepiyo ya Mulimu. Kakuli KISONA SA BULELA MULENA.

¹⁵⁶ Mulemuhe, ne ba ezize ze swana, sina fela Mushe mwana ezelize, konji Mulimu ha na bile ni zeñata za zona.

Cwale muhupule, ki KISONA SA BULELA MULENA, li ka ezahala mwa lizazi le. Cwale, mubatisise mwa lifasi kaufela; munge tuto kaufela, munge mukowa kaufela, munge mutu kaufela, munge keleke kaufela! Na mi laela, ka Libizo la Kreste, ku eza se, mina bakutazi. Na mi laela kuli mubale mutende kamba munge lipatisiso kai ni kai ko mu bata kuya, mubone haiba ha li yo mwa lifasi ka nako ya cwale. Mwabona?

Konakuli, Mateu 24:24 ki ye lukile hande. “Mahata, ba batozizwe ba ka taha mwa mazazi a maungulo, mi ikaba bapolofita ba buhata, mi ba ka puma ba bañata.” Mu li talime mwa mifuta cwale, ha linze litaha cwale, mwabona, “Ba ka puma ba bañata.” “Bapolofita,” mwa buñata; “Bokreste,” ba batozizwe ki, mwa buñata; ba bañata baba shutana, ba Methodist, mwa ziba, ni Baptist, ni ba Pentekota, ni babañwi cwalo. Mwabona?

Kono ku na ni Kreste alimuñwi wa niti, Moya, mi lani ki Linzwi le li ezizwe nama sina ha Na sepisize kueza cwalo.

Cwale lu ka zwelapili fa pata nyana fela, kuya kwa Mañolo amañwi.

¹⁵⁷ Konji, Mulimu nabile ni zona ka buñata, mi se kufela. Bukuba bwa bona ne bu bonahalile.

¹⁵⁸ Mulemuhe. Muhupule, sikapi sa buloto sibonahalanga mane inge kona buloto luli. Mwabona? Cwale, ha mu koni kubulela kuli, kwa mulaho kwani mwa lusika lwa ba Lutheran, “lutaka neli buloto,” kono luna ni Bupilo ku lona. Lutaka ki lolunde, ona Bupilo mwa lutaka nebuli hande, kono, muhupule, ona Bupilo nebuzwezi pili; ne bu pahami kuzwa ku Elisha kuya ku Elia. Bupilo bu zwelapili kupahama cwalo. Kono, muhupule, bu mwa lusika loluñwi. Ha bu koni kusiyala mwa lusika lwani. Halu

koni kuca nkukwe ya lusika loluñwi. Halu koni kuca nkukwe ya Pentekota, Methodist, kamba Baptist. Mwabona, lifetuhile kuba nkukwe. Luna ni Sico se sinca, ona Linzwi la hola ye, ni zeñwi cwalo.

¹⁵⁹ Muhupule, sikapi siswana fela hande inge ona bubeke bwa buloto. Ha mu koni . . . Ne si sika bonahalela mwa matali, ne si sika bonahalela mwa sibunga, kono ne li tiloswana mwa matali. Ne i sa bonahala kuba sina . . . Jesu Krete ya swana maabani, ku Luther; ne i sa bonahali sina ku Wesley; kono luli ya swana kwa Pentekota, ku “puma ni bona ba Baketilwe haiba ki nto ye konahala.” Mwabona? Ki ani masika amina.

¹⁶⁰ Kono muhupule, keleke ya Pentekota yani, mwa mazazi a mafelelezo, neli ya Laodesia; mi Krete na kashelizwe kwande, ona Munjeke, ona Buloto, Kasibili. Fani ha Na likile . . . Muhupule, fani ha Na likile kuiponahaza Iliyena mwa keleke, Na lelekezwi kwande. Ne isali keleke, ne i papata ku ba; yetozizwe.

Kono *kile* fa Linzwi, Krete Iliyena, lani ki Linzwi le litozizwe le likatela babasiyezi ba Mubili wa Hae, ona Munyaliwa. Ya tozizwe, ka mezi a swana ana selaezi buloto, sina ha ne lu ambola kazona, hape a selaela ni mufuka, ba batozizwe. Konji fela ba Baketilwe, kamba kuzibiwa kale, ba ka kona ku lemuha shutano mwahala bona. Cwale, Maefese 5:1 ya mi bulelela cwalo, ni kamo ku inezi.

¹⁶¹ Ki ba batozizwe. Mutu kaufela uli, “Kanya ku Mulimu! Ne lubile ni tukuluho kwanu. Haleluya! Luna . . . Oh, haleluya! Luna lubulela ka malimi, ni kutulaka. Luna ni tukuluho ya basali; mina sicaba mulika ku ba beya mwatasa lika ze kaufela.” Mwabona? Muzwelepili. Hakuna se mu kona kueza. Muli, “Kulukile, luna lubulela ka malimi. Lwa huwa. Luna lubinela mwa Moya. Lu kutaza ka Linzwi.” Kaniti. Hakuna sika sa kulwanisa ka sona. Kacwalo ki mo ba ezeza batu ba kwa mulaho kwani mwa Bibebe.

Jesu naize, “Li ka puma ni bona ba Baketilwe haiba ki nto ye konahala, bona ba Baketilwe.”

¹⁶² Cwale mulemuhe sikapi . . . Kuzwa kwa Bubeke bwa pili, Bubeke bone buile mwa mubu, Ne i si kopano. Neli Bubeke bo bu swana, mwahali ku bona Kasibili. Kono ha itilo mela, ne isi Bubeke; neli kopano, mwabona, matali, mbonyi.

Mi ki Ha iya kwa lusika loluñwi, yeneli sibunga. Niteni ne isi sina kwa simuluho. Ne ili kopano.

Ne ili mwa sikapi, matali amañata, Pentekota, bukaufi ni kubupeha hande cwale. Mutalime kuyona. Isweli kunga sibupeho nako kaufela, ona cwalo kuswana fela hande, ku bonahala sina Bubeke bwa buloto ha mu bona mubili o munyinyani wani kwani.

Kono ka kufeleleza I iponahalize, mi hakuna kopano. Haku sana nihaiba makapi. Kopano ki sikapi fela. Haku sana makapi; lutaka lu lukela kushwa, sikapi si lukela kushwa, lika kaufela lilukela kushwa, kono buloto bu zwelapili ku pila. Wani kona mubili wa zuho, utaha fafasi mi u to banga. “Ba bali kwa mafelelezo ba ka ba kwa pili, mi ba bali ba pili bakaba ba mafelelezo.” Mwabona, wa bashimba mwa zuho. Kana mwa latelela se nji? [Puteho ili, “Amen.”—Mu.] Ku lukile. Mulemuhe, bubeke ki bwa . . .

¹⁶³ Sikapi si bonahala mane inge bubeke. Mi mutu ya limile simu ya buloto, kamba sesiñwi sesi shutana, uka talima ni kubulela kuli, “Kulumbwe Mulimu, Ni na ni licalo za buloto,” kanti hana nihaiba lu cwani lolukana lwa buloto. Hmm? Si bonahalanga mane inge buloto fela, kono ki sikapi.

¹⁶⁴ Cwale, balikani, mukutele kwa mulaho ni na. Kana ancafazo yapili itahile kai, kasamulaho (wa lifu) mazazi fo bubeke bwa buloto ne bu na ni kuwela mwa mubu, ona Mubili, yena Munyaliwa wa Kreste? Kreste nabeile hamoho Munyaliwa wa Hae, ki niti yeo nji, Keleke ya Hae? Na si ka I ongaonga; Na tomile fela ba apositola, ni bapolofita, ni babañwi cwalo, mwa Keleke, kuli Iine inge i kenile. Kono kwa Nicaea, Rome, lilimo ze mashumi asilezi kasamulaho, ba i ongaonga ni kueza kopano kuzwa kuyona. Kana ki niti yeo? Mi se i shwa. Lika kaufela ze ne sa lumelelani ni keleke yani ne li bulailwe. Mi se i ina i kuzize, ka mianda anda ya lilimo, mwa masila.

Kono, kasamulaho wa nako, ya taha ku Luther. Lisina la pili la mbonyi la mela. Lwa bubeli, se i shoshela kuzwa fani. Ki ha baya, nekuna ni Zwingli ni babañwi cwalo, ni likopano zeñwi ni zeñwi cwalo. Kutuha fani, kasamulaho nyana, se ku taha za Anglican mwateni.

Mi ku ezahalile sikamañi? Ki ha kutaha Wesley ni ancafazo yenca, ona sibunga, sani ne si bonahalile sina Buloto luli. Kuzwa fani ki sikamañi se ne siezahalile? Se iikongakonga, ni kuomelela ni kushwa.

Bupilo nebuile hape mwa sikapi, mi sikapi se sitaha ka kuswana mane inge kuli kona Buloto. Kono, kwa mafelelezo, bukuba bwa yona ne bu iponahalize mwa lilimo za mafelelezo ze ketalizoho kamba ze lishumi, sihulu mwa lilimo za mafelelezo zetalu. Cwale si eza sikamañi? Sa comoha kuzwa mwa Buloto.

¹⁶⁵ Cwale ki kabakalañi ha ku sika ba kopano yekalile mwa lilimo ze mashumi amabeli za mafelelezo za ancafazo yetuna ye; ki bapolofita ba batozizwe, baluti ba batozizwe, ni zeñwi cwalo, kono kiñi ha kusina zeo? Hakuna sesili kwa buse bwa Bubeke. Mwabona, Li kutile, kusina kopano. Oh, mawi, mutu yali sibofu wakona kubona sani. Ha ikoni kuikongakonga; Ki ze lwanisa katata. Ki bubeke bwa Buloto, Kasibili. Mwana mutu

uka iponahaza. Bubeke bwa Buloto bu ka kuta ku bona Buñi hape, Mwana mutu mwa mazazi a maungulo.

“Mi ku ka taha mahata, balikanyisi ba Zona, mwa mazazi a maungulo, baba ka puma mane nibona ba Baketilwe haiba ku konahala.” Mutalime makapi a likopano za bona mwa sweli ku yebuhela cwale.

¹⁶⁶ Atuhela fela kuli Buloto bu zibahale, kwa Baketwa, be ili siemba sa Yona. Mulemuhe bunde ka mo si tahela se mwateni cwale. Konji fela. . . Mulemuhe, batoziwa ba ka kona; Baketwa, ba niti, baba lemuhilwe kale, Maefese 5:1, kamba 1:5, nitaluse, ba ka tomiwa, kuketiwa. Ki bona fela bao ba basike ba ku pumiwa.

Mulemuhe, bapolofita ba batozizwe bakaba ba buhata, mi mwahala bona kukaba batoziwa ba niti. Kana mu ka ba shutanisa cwani? Ka Linzwi. Sina, luna ni zona mwa muluti. Kana mwa libona nji? Muli, “Amen.” [Puteho ili, “Amen.”—Mu.] Mwabona?

¹⁶⁷ Mulemuhe, ba batozizwe, konji Linzwi fela kona le li ka ba kauhanya, isiñi lisupo. Oh, batili. Ba ka eza lisupo zeswana, kono Linzwi kona le li ba kauhanyize. Luli. Kaufela ne ba polofita. Kaufela ba ezize *se, sani*, ni *sesiñwi*, luli, ka kuswana fela. Jesu naize ba ka eza lika zeswana. Kono Linzwi kona le li ka ba kauhanya, mulemuhe, isiñi lisupo.

¹⁶⁸ Kana mu lemuhile? Jesu na bulezi fa, mwa Mateu 24. Na si kali, “Ku ka taha bo Jesu mwa mazazi a mafelelezo.” Oh, batili, bona ha ba na kuyemela zani. Batili. Mufumane wa Pentekota yali Mupentekota wa niti, kuli, yena kasibili, yakali ki “Jesu”? Mwabona? Mufumane mu Methodist wa buhata, kamba mu Baptist, kamba yomuñwi ya cwalo, kamba alimuñwi wa likopano, yali, “Luna lubo Jesu”? Ba ziba hande kufita zani. Ha bana kueza zani. Kono Bibeledi bulezi kuli bakaba “bo Kreste ba buhata,” isiñi bo Jesu, kono, “bo Kreste ba buhata.” Ha bana ku lemuha, bali, “Ki na Jesu.” Oh, batili.

¹⁶⁹ Kono bona ki “bo Kreste ba buhata,” mi ha ba li zibi, kakuli ba lwanisana ni Linzwi. Mi Mulimu upaka zeswana. Cwale, Ni sweli fela kutisa se fafasi kwa kangisano cwale, muboni lika zeswana ha liezwa ki batu ba ba swana ba mwa buniti. Mi Jesu na bulezi cwalo.

¹⁷⁰ Cwale, sina ha Ni bulezi, cwale ku mina sicaba kwande, mwa naha ya mawaile kafo, Na—Na ha ni minyazi, kono ye ki keleke yaka mi—mi ki sikwata saka seo Moya o Kenile unitomezi ku tokomela, mi Ni na ni ku ba bulelela Niti. Hola i sweli kuya i fela.

¹⁷¹ Cwale, ha ba koni ku yemela zani, kono, “bo Kreste ba buhata,” mahata, ba batozizwe, ka sisupo kaufela ni taku kaufela bu kaufi ni Linzwi. “Ba lumela kolobezo ya Moya o Kenile?” Kaniti. “Balumela mwa lika *ze* kaufela?” Eeni. “Balumela mwa kubulela ka malimi?” Eeni. “Balumela kuli lisupo ni limakazo za latelela, lisupo lika ba latelela?” Eeni. Bani

ha ki ma Methodist, bani ha ki ma Baptist. Batili, batili. Bani ki ma Pentekota. Mwabona, le ki lizazi la mafelelezo.

Cwale, keleke yapili ne i sike ya lemuha zani. Lusika lwa keleke ya Methodist nelusika izeza ngana ku zona; lusika lwa keleke ya Baptist, ne ba sika lemuha za teni; lusika lwa keleke ya Presbyterian, ne ba sika li lemuha. Kono, ma Pentekota, bu kaufi luli sina Taba ya niti! Kwani kona, Buloto . . . sikapi siswana fela mane inge Buloto. Habana ku li lemuha ni hanyinyani. Mwabona? Ne basike. Kono seli mazazi a mafelelezo, lizazi le. Eeni, sha.

¹⁷² Mulemuhe, sina fela mone ku inezi kwa simuluho, kona mo ku kabelana ni kwa maungulo. Sina fela Eva mwa na tolokezi ka mafosisa Linzwi lililini, Satani na ezize ku Eva, mi sa lumela. Musali, isiŋi muuna; ki keleke, isiŋi Yena. Mwabona? Keleke neli yona ye ne amuhezi linzwi la buhata. Mwabona? Ha ki Adama; Eva. Ha ki Krete; ki keleke, ki munyaliwa, ki ba batozizwe, ba lukela kuba bona, yaipiza kuli Munyaliwa, mwabona, una ni linzwi la buhata.

Kana ha muboni zani nji? Kiŋi, za tamahana hamoho sina mihala ya makatulo, sina linsi fa meto a mina. Kiŋi, lika kaufela ze mu ka sikuluhela kuzona, ona Bibebe, Ika li kopanya fela hamoho. Eva, isiŋi Adama; Eva na lilumezi, isiŋi Adama. Munyaliwa kacenu, yabizwa cwalo, na lumezi; isiŋi Krete. Munyaliwa una ni mifuta kaufela, ba babizwa cwalo kuli munyaliwa; lisupo zeswana, limakazo zeswana, lika kaufela zeswana; kono ha ki wa Luli. “Ba ka puma nibona ba Baketilwe haiba kwa konahala.”

Cwale kapili, haiba lu kona kufeza ze mwa mizuzu ye lishumi ka ye ketalizoho, lukaba ka nako. Mulemuhe hande cwale, kacwalo hamuna—hamuna kutokwa ku ba ni kutwisiso, ku mina.

¹⁷³ Cwale, batili, ne basike ba yema kuli babizwe “Jesu wa buhata.” Ne basike, ba yema kubizwa kuli, “Jesu.” Batili kutokwa. Yani ki niti luli. Mutu kaufela na ka ziba cwalo. Mutu kaufela na ka ziba kuli ne basike baba yena Jesu. Ha ni na taba kamba ba na ni oli fa mikokoto yabona, ni mali fa mazoho abona ni fa halimu ni fafasi a meto abona, mi ba ziba kuli ki . . . Mutu kaufela ya nani ngana, wa ziba kuli ne si Jesu. Mwabona? Ne basike bayemela zani. Kono baipiza bona baŋi kuba “ba batozizwe.” Mi ba eza lisupo ni limakazo, “kuli mane li fakaufi ni kupuma ba Baketilwe.” “Kono ki bo Krete ba buhata, ba batozizwe, ba ka taha, mi ba ka puma ba Baketilwe haiba ki nto ye konahala.”

¹⁷⁴ Cwale mutalime katokomelo. Musike mwa mbwinja mubulelelo wo, kakuli wa swanela ku uteeleza.

Usweli fela kubeya tepu fa maikulofoni fa, mutokwe ku latehelwa ki taba ya teni. Ni sweli ku fufulelwa; kulotela fa tepu, mwa bona.

175 Mi kacwalo ikaba fela sina Yona, Bibebe, i bulezi kuli ikaba cwalo. Mwabona?

176 Mulemuhe, ha ki bo Jesu ba buhata. “Bokreste ba buhata!” Balumela kuli ba tozizwe, kono ba ziba kuli ha ki bo Jesu. Mwabona, sani ki sa patalaza luli. Kambe mutu na ka yema ni kuli, kacenu, “Mutalime kwa mañiba a mwa lizoho laka. Mutalime fa liñobyoye za ka. Ki na Jesu.” Kulukile, cwale, luzibe kuli zani lifosahalile. Mi, muhupule, Jesu na si ka bulela kuli batu bani ba ka iponahaza. Na bulezi kuli ku ka bonahala “Bokreste ba buhata.” “Bokreste,” mwa buñata, likopano, ni zeñwi cwalo, *ba batozizwe*; ba batozizwe ka moya wa likopano, mi isiñi ka Linzwi. Mwa si latelela? Isiñi Jesu wa buhata. “Bokreste ba buhata,” mahata, ba batozizwe. Mwabona? Oh, ka mo si bezi patalaza! Ka mo luna . . . Luli ha mu na ku si mbunja!

177 Cwale, muhupule, Ni bile ni bulelanga kuli ku nani likwata zetalu za batu. Kuna ni mishobo ye milalu ya batu: Kama, Sema, ni Jafeta, mishobo ye milalu. Litopa zetalu, mi se Nili, yani ki mulumeli, yaikeza mulumeli, ni ya sa lumeli. Ki mo ku bezi kamita, kamita kukana ku banga cwalo. Mwabona? Ne ku na ni Mushe, yena mulumeli; ne ku na ni Janesi ni Jambresi; bene ba sa lumeli. Mwabona? Ne ku na ni Balami; Mushe. . . Kamita ona litopa zetalu za batu zani, litopa zetalu; mulumeli, yaikeza mulumeli, ni ya sa lumeli.

178 Cwale muhupule, ya sa lumeli, ona keleke ya likopano, yona ha i lumeli mwa lisupo lifi kaufela ni hanyinyani; yabata, yaenya, i omelezi mulala, keleke mwa lifasi, yona kopano. Kono yaikeza mulumeli ki yena sikapi sani. Yani ki yena mutu yaikeza mulumeli. Mi hape ku na ni mulumeli wa niti yali wa niti luli. Cwale, mubatalime habanze ba ya hamoho cwale, fa muzuzu fela.

179 Mi mulemuhe mo ba bezi bundume baba sa lumeli ba, kamba baba ikeza balumeli bani. Mawi! Ki ba bundume, mutalime, mane sina Satani hana yemi hande fapila Pata ya Linzwi la niti, ni kubulela kuli, “Ku ñozwi!” Ki niti yeo nji?

Kiñi Satani hana ezize cwalo? Kakuli na sa zibi Linzwi la . . . Na zibile Linzwi la hola yani, kono na kakanyize Muuna yomunyinyani yo kuba Linzwi lani. “Haiba Wena u Mwana Mulimu. Na ziba Mwana Mulimu wa taha, kakuli Ne liize kuli Uka eza ona cwalo. Mi ku ñozwi kuli, ‘Uka laela Mangeloi a Hae ku Ku tokomela.’ Mwabona? Uni nyakisiseze zona! Eza makazo! Ni Ku bone ha ueza.” Mwabona? Mwabona?

Mwabona, ya sa lumeli, yaikeza mulumeli, mulikanyisi. Mutalime ku Judasi mwahala bona, nako ye swana, yaikeza

mulumeli! Mwabona? Mulemuhe, mi kwani ne ku na ni Linzwi la niti.

¹⁸⁰ Ka mo ba bezi ba bundume! “Cwale, musike mwa iseza ngana kwa bukuba bwani. Hakuna sika sesiñwi ku Zona. Musike mwaya teni kwani. Ki sishañata fela sa lilata. Hakuna sesiñwi sa Sona. Bwani fela ki buhata. Zani li mwa munahano wa mina.” Mwabona, mwabona se Ni talusa? Muyeme ka kuluka fa Pila Linzwi mi mu libulele.

¹⁸¹ Satani nakeni mwateni. Sina Bibebe ha i bulezi mwani ku Juda, “Mane neba Lingeloi lelituna, ha na kangisana ni Satani, ali, ‘Mulena aku omanyeye.’” Kulwanisa Linzwi Lona kasibili!

Mi ki yo antikreste, ya tozizwe, uyemi ona fa kulwanisa Linzwi la niti la kacenu, Jesu Kreste, mi uli, “Ku ñozwi.”

¹⁸² Mutalime fa mazazi a mafelelezo. “Li ka ba bu kaufi kuli lipume nibona ba Baketilwe.” Oh, mawi! Libaka leo Baketwa basike ba pumiwa, mwa ziba kuli kiñi? Kakuli ki bona Linzwi. Mwabona? Sina fela Bupilo bobuli mwa mubisi, Ni bulezi nako yefitile, Halikoni ku i latula Lona liñi. Mwabona, ki Lona Linzwi mi ni mwa nako ya Linzwi. Yani ki niti.

¹⁸³ Sina fela Jeremia, na zibile. Hakuna taba kamba Hanania ka sa na bulezi, na zibile fa na inzi. Zani liswana sina Mushe mwana ezelize, ni—ni babañwi ba kubona. Sani, na zibile, hakuna taba ka sana bulezi mupolofita wa buhata, ne ku na ni Linzwi la Mulimu. Ne ku ñozwi.

Lani kona libaka leo Mikaya hana bulezi kuli, “Ku lukile, mulibelele fela mi mubone.”

Akabe ali, “Na lumela bapolofita baka. Kopano yaka i lukile. Ha Ni ka yo kuta ka kozo. . . Mulatele mucaha yani mwa tolongo. Ni ka to bonana ni yena! Mu mufe buhobe bwa manyando. Mu muisse kafo, ha ni na kutwano ni yena ni hanyinyani. Ha Ni kayo kuta mwa kozo, lu ka to zibana ni mushimani yo.”

¹⁸⁴ Mikaya ali, “Haiba uka yo kuta, konakuli Mulena ha si ka bulela ni na.” Na zibile kuli nana ni KISONA SA BULELA MULENA, mi pono ya hae neili hande ka za kuli KISONA SA BULELA MULENA; isiñi ka nako isili hape, kono ka nako yani. Amen! Haleluya! Ona nako!

¹⁸⁵ Bundume, kuyema ni ku kanganisana ni Lingeloi lelituna! Ku se ku bulezwi, kuli, “Likuba li ka zamaya ni makatulo a limapo fo ku saba ku zamaya Mangeloi.” Yani ki niti.

¹⁸⁶ Libaka le babezi Baketwa, Jesu naize, ha ba na ku pumwa, kakuli bona ki Linzwi lani. Ha ba koni kuba sika sisili fela. Ha ba koni kuteeleza lika lisili fela. Hakuna ze ba ziba zeñwi. Yani ki niti.

Muhupule, Mushe na si ka ya ka malikanyiso abona. Nabile cwalo nji? Mushe naize, “Cwale, libelele fa muzuzu, Faro. Wa ziba kana? Mulena ki yena yani bulelezi kueza se, kono, kanya

ku Mulimu, Na bona kuli bashimani ba hao bakona kueza lika zeswana. Kacwalo, uni bulelele se Ni ka eza, Ni ka kopana ni mina”? Huh! Sani ha si utwahali sina mupolofita wa Mulimu. Batili, kauke! Na yemi ka kutiya ka mwana konela kuyema. Na zibile, luli, Mulimu na ka litokomela fokuñwi, kakuli Na sepisize cwalo. “Ni ka ba ni mina. Ha ni na ku mi siya.”

¹⁸⁷ Na zibile, kacwalo na si ka ikopanya ni bona. Oh, batili. Na pilile hande ni bona. Na sa lati nihaiba iliñwi ya likopano za bona. Na pilile hande ni Mulimu. Na sikaya ka lika kaufela ze ne banani. Ha ne ba ezize taba iliñwi . . . Na tisize linda; ne batisize linda. Na tisize mali; ne batisize mali. Na tisize lika kaufela; ne ba mu likanyisize ka linzila kaufela, hamoho cwalo. Na yemi fela inza kuzize. Na zibile hande ka za teni. Mulimu nali fa musebezi.

Mwa utwisisa cwale? [Puteho ili, “Amen.”—Mu.] Mukopanye tuu ni tuu, mi mupange foo? [“Amen.”] Ha mutokwi kucisa hahulu. Kacwalo, ni mina—mina mwa utwisisa, mwabona.

¹⁸⁸ Kiñi? Habana ku pumwa ka zona. Mulumeli wa niti, ki Peu ye lemuhilwe kale ye lukela kuyema mwa lizazi le.

¹⁸⁹ Fela, hape, Jesu naize kuli, “Ba bañata ba ka taha ka lizazi lani, ka Libizo la Ka, mi bakali, ‘Mulena, kana ne Ni sika leleka mioya ya diabolosi ka Libizo la Hao?’” Jesu naize, “Kwa mafelelezo a mazazi, fani nako ha se ikabe ifelile ni zuho yetuna itaha, kuli ba bañata ba ka taha kwa kutoina mwa Mubuso.” Mubuso wa Mulimu upila mwahali ku mina.

Ba bañata, mifuka ikataha ku to ina hamoho ni Buloto, kuli, “Cwale, libelela fa muzuzu, Mulena! Ne ni bulezi ka malimi. Ni huwile. Ni binile mwa Moya. Ni lelekile mioya ya diabolosi. Ni bulezi ka malimi. Ni ezize lika ze kaufela.”

Uka bulela sikamañi Yena? Mulemuhe. “Mina baezi ba ze maswe, Nali kuba ni mizibe.”

¹⁹⁰ *Bumaswe* ki sikamañi? Mubuze mutu yomuñwi. Ki “sika so ziba kuli ulukela kueza, kono ha usiezi.” Ba ziba Linzwi lani. Ba Li utwa. Mwa teezeza kwa tepu ye. Mwa teezeza kwa Liñusa le. Mubona Mulena Mulimu kuli ubulezi sa kuli; mu Muboni inza sipaka, ku sieza kuba sa niti. Mi mwa ziba kuli Se ki sa niti patalaza sina lizazi mo limonyehela fande, kono mina baba swalelezi kwa likopano zamina, muswalelezi kwa lika za buhata zani; wena muezi wa ze maswe!

“Oh, eeni, Ne ni na ni mukopano omutuna. Ni ezize *se*. Ni ezize *sani*.”

Ukali, “Muzwe ku Na, wena muezi wa ze maswe, Na li kuba ni mizibe.”

¹⁹¹ “Kulukile, Moya o Kenile u ni suluhezi.” Hani kakanyi sani ni hanyinyani. “Ni bulezi ka malimi. Ni opelezi mwa Moya. Ni ezize . . .” Hani kakanyi sani ni hanyinyani. Hakuna puzo ka seo. Oh, muzwale, kezeli, ki buino bwa mufuta mañi!

Ye ki nako ya kungangama. Kana lu kai? Linzwi le litaha kwa Bupilo cwale. Mulemuhe.

¹⁹² Eeh, Naize kuli ba ka eza cwalo. Mulemuhe, “Mina baezi ba ze maswe.” Ni na ni Liñolo le liñozwi fafasi fa. Hani zibi kuli ikai yani. Ni ngile nako yetelele hahulu. Ni ka i batisisa hande, fa muzuzu fela, mi ni bone kuli neli yecwani. Ni na—Ni na ni Mateu 7:21. Ha—Ha ni zibi kuli kikai. Na, fokuñwi ha Ni ñolangi sesiñwi ka zona, kuli, Ni—Ni kutazanga ona cwana, Ni—Ni libezi sene Ni talusa ku sona ka Liñolo. Mateu 7:21.

Ha ki mutu kaufela ya li ku na, Mulena, Mulena, ya ka kena mwa mubuso wa lihalimu; kono ki ya eza tato ya Ndate ya mwa lihalimu.

Babañata ba ka li ku na mwa lizazi lani, Mulena, Mulena, kana ha lu sika polofita . . .

Bapolofita, ba batozizwe! Ki niti yeo? “Nelusi bapolofita nji? Kana nelusika tozwa nji, ba batozizwe? Kana ha Ni sika polofita ka Libizo la Hao? Mi ka Libizo la Hao kikuli ha Ni sika leleka mioya yemaswe?” Kana mukona kueza cwani zani, mi muhana kukolobezwa ka Libizo la Jesu? Mwabona? Oh, mawi! Mwabona mo libezi zepuma? Kufita hande ona fa sibaka sani, mi ba wa kukutela mwa mulaho. Ba ya hande kwa Linzwi, mi bawa kukuta mwa mulaho. Cwale mulemuhe se. Lu ka fita fateni, fa muzuzu fela.

Babañata ba ka li ku na . . . Mulena, Mulena, kana ha lu sika polofita, ha lu si ka ba bapolofita nji? . . .

Eeh, Ni bulezi ka zona mwa Mateu 24:24.

. . . mi ka libizo la hao . . . kuleleka mioya yemaswe ya diabulosi? mi ka libizo la hao lu ezize limak- . . . zeñata misebezi yemiñata?

Mi cwale Ni ka ba bulelela kuli, Na li kuba ni mizibe: Muzwe ku na, mina baezi ba ze maswe.

“Hane Li beilwe hande fa pila mina mi ne mu Liboni, ni ku Libona ha lizamaya, kubona kuli ne Li lona Linzwi; mi ka bakeñisa buino bwa kopano ya mina, Musweli fela ku zona. Nali kuba ni mizibe. Hanina taba ka buñata bwa mioya ya diabulosi ye mu lelekile, buñata bwa lika ze muezize se kamba sani; Ni tokwile sika se ni zibile ka mina.”

Balami ali, “Ne ni polofita hande, ka Libizo la Hao. Ne li sweli ku ezahalanga.”

¹⁹³ “Yani ki niti luli, kono, ha li fita kwa Linzwi, ne mu Lihanile.”

Oh, muzwale, mwabona siemba se si puma? Isiñi “mupolofita,” kaniti; kono ka Linzwi, Linzwi la niti, Linzwi leli pakilwe le li bonahalile. “Mina baezi ba ze maswe!”

194 Mulike, Satani ulikile mwa masika kaufela ku likanyisa Linzwi. Lwa ziba cwalo, nji cwani?

195 Mulemuhe, kutaha fa museto ni kuitulela. Mutalime kwanu, Na ize, mwa Maheberu kauhanyo ya 6, cwale, ne lu sweli kubala fa nako nyana yefitile. Ni mi bulelezi kuli muswanisise ku yona, mi lu ka eza cwalo ka mizuzu yetatama yemiñwi. Mi ki hali:

...kono *miutwa ni* liseto...ze *li bu kaufi ni* kuhaniwa; ze *mafelelezo a zona ki ku cisiwa.*
(Sihalihali!)

...mina baba *tatubile*...*kwa mpo ya lihalimu*,...

“Kutatuba,” manzwi amañwi, mu Li boni! Ha mukoni [Muzwale Branham umuma milomo ya hae hamoho—Mu.] mu Li tatube fela ka mulomo wa mina. Kono mu Li boni, mi mu Li zibile kuli ki Niti. Mu zibile kuli Neli Niti. “Mutamunile kwa mpo ya Lihalimu.”

...mi *muezizwe bo muca sanda sa Moya o Kenile*, sina ha ne uwezi fahalimwa mina,

...*ku tatuba kwa linzwi lelinde la Mulimu*,...

“Kutatuba,” mu boni kuli ne Li lukile. “Mi Moya o Kenile nowezi fahalimwa mina,” bucwani mwa simu.

...mi kipeto mu sikuluhela *kusili*,...

“Kulatula Kreste luli ya na mi kenisize, ni ku mi ziba, ni kubeya tozo yani ku mina.”

...*haku sana hape sitabelo sa sibi*, ka zani.

Halina swalelo! “Ha ku konahali kuli batahe kwa zibo ya kuziba Niti.”

Kakuli ha ku konahali kuli bani bene...*bali bo muca sanda sa Moya o Kenile*,

Nowezi fa bucwani, mwabona, “Ne mukalile ni Jesu, mi, ‘Mulena, Na ya kwapili,’” kono cwale hane mutilofita fa Linzwi, mwabe mwa kutela mwa mulaho. “Kueziwa bo muca sanda sa Moya o Kenile, mi mane ni kutatuba, kamba kubona Linzwi Kasibili ha li iponahaza.” Mi ni ku sikuluha kuzwa ku Lona, “Ki nto ye sa konahali kuli bakone ku Libona kamba kutaha ku Lona.”

Sani KISONA SA BULELA MAÑOLO. Cwale, mina... “Lihalimu ni lifasi lika fela, kono Lona halina kufela.” Mwabona nji? “Kaniti hakukonahali.” Bibebe i bulezi ona cwalo, mi ni Moya wapaka cwalo.

196 Mulemuhe, mutuhele ni mife mutala nyana. Mutalime sicaba sani se ne sitile mwatasa bupolofita bwa Mushe, ne bazwile mwa katengo kani, ni kuzwa mwa lika kaufela, mwatasa bupolofita, ne ba boni misebezi yemituna ni limakazo, ni lika zeñwi ze cwalo, mi batofita fa museto wa mahalihali a kukena mwateni.

Cwale, Lee, ki fo kutaha kuñolwa “libizo la hao mwa Buka.” Mwabona? Muna ni zona litomilwe. Mi mina musiyi kwanu, mi ni kwande kwa—kwa neku la mawaile, ki Muituti Lee Vayle ya inzi fa. Usweli ku ñola hande sikuwa mwa buka ya Linako za Likeleke Zesupa. Mi ha kutaha butata, kamba puzo, ka za “libizo la mina halizuswa mwa Buka ya Ngunyana ya Bupilo.” Mwabona, i lyanganisize bakutazi ba bañata. Kono mulibelele kufitela mu ba ni buka, muka liutwisisa haiba muna ni Liseli lelikana ku mina. Mwabona?

¹⁹⁷ Mulemuhe, cwale, muka sikulula toho ya mina mi mane hamuna nihaiba ku talima ku Yona haiba hamulati ku I bona. Sina boma ha ne ba bulelanga kuli, “Haukoni kuzusa mali mwa mupusi, kakuli hakuna mali ku ona.”

¹⁹⁸ Mulemuhe, Liseli litile; ha ki mwa lififi. Liseli litile mwa lififi, mi lififi ha li si ka Li lemuha. Mulemuhe cwale batoziwa mwa lizazi le.

Sina Mushe ha na tisize bana ba Isilaele bani; mi ba teezeza ni ku lyangana bakeñisa naha yani ka fani. Cwale, Isilaele neli likopano ze kopani hamoho. Ne i sina naha, ne i sina munzi. Ne iya kwa hae.

Haluna keleke. Luna haluna. . . Luya—luya kwa Keleke, ki Keleke ya Mweli, ki Keleke yeli mwa Kanya; ha ki keleke yeli mwa lifasi, ka mutu. Keleke yeli mwa Kanya, batu baba bizizwe, ba balemuhezwi kwa Bupilo Bobusafeli, mwabona, baya kwa Hae kubona.

Mi haba fita fa sibaka sa kusila, ba to kakanya Linzwi, mi ba kuta mwa mulaho. Kasamulaho Joshua ni Kalebu habato ya ni kukuta mi ba yo taha ni mashañata a ma gilepu, ili kuba kolwisa kuli naha neili teni, ona Linzwi la sepiso ya Mulimu, “Ki naha yende, mabisi ni linosi.” Mi ba yo kuta ni zona, kwa neku le, ku to nyakisisa cwalo ku bona. Mi ba to ca kwateni, kiha bali, “Oh, oh, halu koni kueza cwalo, niteñi.” Kiñi zene ezahalile? Ne ba shwezi mwa lihalaupa. Ne ba inzi ona fani mi ba iikongakonga ili bona, ni kushwa, mutu ni mutu wa bona.

Kono bani bene baile ni ku yo kuta, Joshua ni Kalebu; Mushe na ngilwe mwahala mubili. Mufuta wa Keleke ye libelezi; ni zuho ya Testamente ya Kale, Testamente ye Nca; ni Mubili wo ka ngelwa. Mwabona zetalu fani nji? Na babeile mwa mukoloko yemilalu, mwabona, kacwalo, ku mulumeli ni ya sa lumeli. Mwabona?

¹⁹⁹ Mulemuhe mo ne ku inezi “kakutala.” Muhupule, Mulimu na sika swalela sibi sani. Cwale ba ka kena cwani mwatani? Haiba ki miutwa, ka kukala, ki miutwa kwa mafelelezo. Konji fela baba leliwwe kona baba ka Li bona.

²⁰⁰ Mulemuhe ka tokomelo cwale. Sina fela mo ne ku inezi mwa mazazi a Muñoli Martin, kwani ku sikaba kale Linako za Lififi; muuna yomunyinyani wa bumulimu. Ki babakai kana babakile

ba bala za Muñoli Martin? Buñata bwa mina mu libalile. Ne luile kwa libuka zañozzi Muñoli Martin; muprisita naize, “Kono na si ka keniswa.” Luli, na si cwalo; isi kabona, kono nali ka Mulimu. Moya o Kenile no mu bulelezi kuli lu mu beye kwani kwa keleke ya nako ya bulalu. Mwabona?

²⁰¹ Mutalime muuna yomunyinyani yani wa bumulimu mwana inezi; yabizizwe, ya lemuhilwe. Bashemi ba hae, mahedeni. Bo ndatahe, ki masole. Na latelezi sikuka sa bona, kuba musole. Mi, hana ezize cwalo, mi kamita nalumelanga kuli neku na ni Mulimu kokuñwi; muuna wa mwa mishitu, mi na kona kubona Mulimu. Zazi leliñwi afita mwa munzi, mi nekuna ni muikunyandela yana lobezi fani, inza shwa, inza kupa yomuñwi. . . Na kangezi busihu bwani. “Oh,” ali, “aku nife sika sa ku i kapesa; Ni ka shwa busihu bwa kacenu.”

²⁰² Hakuna yana konile kueza zani. Mi Martin aina kwa neku leliñwi mi amutalima fa nako nyana. Hakuna mutu yana kona kueza sani. Yena nana ni fela koti iliñwi. Na ka kangela, ni yena, nali fa musebezi, haiba na—na ka mufa koti ya hae. Kacwalo a hupula kuli, “Sibeli sa luna luna ni kolo ya ku pila haiba Ni ka i kabela ni yena.” Kacwalo kiha nga koti ya hae, mi aipazula fahali ka sabule ya hae, ni kutateza muikunyandela yani ku yona. A mutateza ka koti ya hae.

Mutu kaufela ali, “Mutalime mulibeleli ya bonahala kusehisa yani. Mutalime musole ya bonahala kusehisa yani, licika la koti la mu apesa ka kutateza!”

²⁰³ Busihu bone butatami, hana zwile fa musebezi ni kuya kuyo lobala fa bulobalo bwa hae, ki ha zuha. Atalima, inza yemi mwa muzuzu wani, ne ku yemi Jesu Krete inza tatelizwe mwa siemba sa koti ya kale yana mu apesize. Na zibile hande cwale, “Se mueza ku babanyinyani ba Ka bao, ki ze muezelize ku Na, kwa batoziwa ba Ka,” inza lobezi fani.

Nali mutanga Mulimu yomutuna. Keleke ne i mu talimile ka lisheha, ne i munyandisize, ne i mulelekezi kwande, ni lika zeñwi kaufela, kono nali mupolofita wa Mulimu. Sa na bulezi ne sitilo ezahala. Ne ku na ni babañata bene ba mu lumezi ka nako yani, nibona.

²⁰⁴ Ni bata ku mi bonisa diabulosi mwa bezi pumumi. Zazi leliñwi na inzi inza bala. Mi ki ha kutaha lingeloi lelituna, mushukwe fa toho ya hae, aapezi likatulo za gauda, mihala ne itamilwe kwa liapalo za hae za gauda, mi ali, “Martin, kana wa ni ziba?” Ki ha li, “Kina Mulena hao ni Mupilisi. Ki na Yana kupilimize. Uni kubamele, Martin.” Kono mupolofita yani, ka kuziba kuli ne kuna ni sesiñwi sesi nca fani, a zwelapili ku mu talimela. Ki hali, “Martin, Ki na Mupilisi wa hao, Jesu Krete. Uni kubamele! Kana ha u ni zibi, Martin?”

²⁰⁵ Martin azwelapili ku mutalima, Mañolo akala kufita mwa munahano wa hae. Ki hali, “Satani, zwa ku na.” Ki hali, “Una

ni mushukwe kwa toho ya hao. Mi Linzwi la Mulimu libulela kuli ‘baba kenile ba Hae baka Mu apesa mushukwe’ kwa mafelelezo a nako.”

Kana kani ne si katwa ka Mapentekota? Mulemuhe Linzwi lani, muzwale. Fani kona fo kuli butokwa.

²⁰⁶ Zazi leliñwi, hape, mwa sibaka sa balapeli ba siroma, ne ba nani mulapeli wa kale kwani, sikwata sa baituti ba baana ba tumelo ya siroma baba nca kwani. Neku na ni alimuñwi wa bona yana nyemisa. Mulemuhe se, ki ye fa nguli ye—nguli yende kacenu. Na bata kuba sesiñwi fahalimwa bona kaufela. Na bata ku iponahalisa kuba sesiñwi, bundume, sesiñwi sesituna, sesiñwi sesinde, ya itutile hahulu, mwa ziba, ni sesiñwi sesituna. Nana ni kuba ya bunangu. Kamita na batanga kuli mizwale yemiñwi kuli basike ba . . . Mwa ziba, nana ni kuba ya shutana. Mwabona? Yena, hakuna taba kamba neli sikamañi, nali ya ikuhumusa luli. Nali yena fela licwe lelibenya fa likamba. Neku sina mutu yana kona ku muswala. Cwale mutalime sene siezahalile. Nana ni kuba ni sesiñwi sesituna. Nana ni kubapanya kwa—kwa tutengo to tutuna. Mwa ni latelela? Mwabona? Kacwalo, ki hali, kiha bapolofita. Mi ali, “Mulena uni ezize kuba mupolofita, nina. Ni mupolofita.”

Cwale, neku nani mupolofita alimuñwi yana zibahala mwa naha, mi yani neli Muñoli Martin; na pepilwe ali mupolofita.

²⁰⁷ Kono mwanana yo ali, mutangana yomunyinyani ali, muituti wa za tumelo ya siroma mwendi wa myaha ye mashumi amabeli ka yeketalizoho, ki hali, “Mulena uni ezize kuba mupolofita, mi Ni ka mi bonisa cwalo.” Ali, “Busihu bwa kacenu Mulena uka nifa lisila, lelinde lelituna, ku ni apesa lona, lisila le lisweu, ni ku ina mwahala mina. Mi kaufela mina mu ka taha kuna, mwabona, mi mukanga litaelo kuzwa ku na.”

²⁰⁸ Cwale mubapise sani kacenu, mwabona, “Ni ka ba toho ya katengo. Ni ka mi tokomela, mina licaziba za baana ba siroma kaufela.”

Mi kaniti luli, “Busihu bwani, liseli se litaha mwa muyaho wani,” kona mo libulelela litaba zañezi Muñoli Martin. Mu libale. Mi liyemi. Ki zakale. Mi liseli ki ha litaha, mi babañwi ba libona, mi ki ha kutaha . . . Yana na apezi lisila lelisweu, inza yemi mwahala bona. Ki hali, “Mwabona se ne Ni mi bulelezi?” Kono sani ne si shutana kwa Linzwi.

²⁰⁹ Mi cwale hana ile ni kuyonga muokameli wa sikolo sani, ki ha zamaya kafa-ni-kafa hanyinyani, ali, “Mwana, seo ha si utwahali hande.” Ki hali, “Ku na ni fela nzila iliñwi.” Ki ye fa! “Kuna ni fela nzila iliñwi yeo lukona kuziba kayona. Ne ibonahalile kuba ya buipiteli.” Mushimani, Pentekota yakona kubyangula sani, mubisi, teku, muhala, kashuto, ni lika zeñwi kaufela! Ki hali, “Makazo ya kona ku bonahala hande, kono ha ibonahali ku luka ka Linzwi. Cwale, luna ni mutu ya

cwalo, mupolofita ya tozizwe, wa libizo la Martin. Taha, u mu katanyeze.”

Mutangana wateni ali, “Batili, batili! Martin hana sa kueza ka sona se.”

²¹⁰ Mi ali, “Uka ya, nihakuli cwalo.” Mi ki ha ba muswala kwa lizoho, ku mu isa fapila Martin, mi lisila la musiya.

²¹¹ Mwabona, “Kupuma nibona ba Baketilwe kambe ki nto ye konahala.” Mwabona, baba ziba. Jesu naize, “Lingu za ka liziba Linzwi la Ka.”

“Oh,” mu li, “kuutwa “Muhuwo” wa Ka.”

Lani ki Linzwi la Hae. “Mutu hana ku pila ka buhobe fela, kono ni ka Linzwi kaufela.” Mwabona? Baba lemuhilwe kale ba ziba cwalo. “Linzwi lelinca, kamba muhuwo o munca, ha ba na kulatelela.”

Yani kona nzila ni sicaba sani kwa mulaho kwani; ne ba si ke kulatelela. Ne ba zibile kuli Martin nali teni fani, mupolofita wa lusika lwani, nazibahalisizwe ki Mulimu kuya ka Linzwi, na zibile Linzwi. Mi muuna yani na sike kuyema fapila Lona.

²¹² Ni yena ali, “Ko kuna ni Situpu,” kamba ona Linzwi, “kafo, mwa nako yateni, limbande ki ko lika kopanela.” Cwale yani ki Mate- . . . Mubata kuñola ni yona yeo, yani ki Mateu 24:28. Fahalimu fela fani, Mateu 24:24; litimana zene mwatasa yona, mwabona, haiba mubata ku i utwa. “Ko kuna ni Situpu,” ona Maana koiliteni, ko kuinzi Linzwi, “kafo ki ko limbande lika kopanela.”

²¹³ Cwale Ni lukela ku akufa. Ni talimile fani ni kubona nako . . . Ki—ki mizuzu ye supile kamba yeketalizoho ka yemilalu kasamulaho wa twelufu. Ni ka akufa kapili luli, kamba lu kone kufeza busihu bwa kacenu, ka mukwa kaufela o muka eza ka ona. Kakusasana cwana kamba busihu bo? Huh? Ki babakai baba lukela kuya kwa mandu kacenu hasamulaho wa sebelezo, halu boneni mazoho amina, mwabona. Oh, mawi, mbwasha muzwelepili!

Mu ni swalele kumi inisa sicaba fa mawaile kwande kafo ona cwalo, kono Ni ka akufa. Ki za butokwa hahulu kufita masheleñi amina. Na lumela li cwalo, ku na, mwabona. Masheleñi amina aka fela. Se kutokwa; Ki Linzwi. Mwabona?

²¹⁴ “Ko kuinzi Situpu, ki ko limbande lika kopanela.” Ko kuinzi Situpu, kokuna ni—ni—ni ze bulailwe, kwani kona ko ku ka kopanela limbande. Ko kuna ni Nama ye nca yemezi, Linzwi la mwaha wateni, kona ko ku ka kopanela limbande.

Kono kasamulaho limano bola, kona kuli manoñu aka kubukana kwateni. Eeh. Mwabona se Ni talusa? Haiba kuna ni sesi bulailwe, kutahanga limbande kwani; kono haiba siina fani, mi sabola, konakuli kuka taha manoñu. Limbande halina kueza sika ka sona. Mwabona?

Jesu naize, “Ko kuinzi Situpu,” kona ko ku wezi Maana, ona busihu bo buwile Maana yenca, “kona ko ku ka kopanela limbande ku Yona.” Yani kona Maana ya lizazi lateni. Mwabona? Mulemuhe.

²¹⁵ Kono kasamulaho i mano ba yebolile, mabuku akena mwateni, konakuli kutaha manoñu. Ha li koni ku inunkelela konji ha se ibolile. Kabakaleo Jesu na yemi kwani mi abulela kuli, “Jerusalema, wena ya pwacauzi bapolofita kaufela ka macwe!” Mulemuhe tulokandina twa butu twani, mwabona, “Jerusalema, Jerusalema, Ni ka nga nako yekuma kai. . .” Yani neli Yena mañi? “Ni kanga nako yekuma kai Ni nze ni ku babalela sina nasikuku kwa tuzwinyani twa yona, wena ya pwacauzi mupolofita kaufela ka macwe ye Ni kile na luma,” keleke yetuna yani, Jerusalema.

²¹⁶ Jerusalema isi ya mwa lifasi le, “kono lu ba Jerusalema ya Lihalimu,” kona ko kuzwa Linzwi, kuzwa kwa ku lemuhiwa, mwabona. Isiñi Jerusalema wa kale ya shwa; ki Jerusalema yo Munca ya sa shwi. Isiñi Jerusalema wa kale, yana yahilwe ki mutu; kono ki Jerusalema yo Munca ya yahilwe ki Mulimu, mwabona, Linzwi kwa halimu kwani li iponahalize. “Mwa ndu ya Ndate kuna ni miyaho ye miñata. Ni sa yo mi lukiseza zona,” Mubupi wa kupanga linzila za gauda, ni zeñwi cwalo. Wani ki Ona o sa shwi.

²¹⁷ “Jerusalema, Jerusalema, ni ka nga nako yekuma kai Ni nze,” kuzwa kwa makalelo a nako; ha ki Mutu wa bulalu, mutu usili fela, kono, “Ni nze ni mi babalela sina nasikuku kwa tuzwinyani twa yona, kono ha ulati. Kono cwale nako ya hao ifitile.” Mwabona?

“Ko kuinzi Situpu, limbande ki ko lika kopanela.” Kono kasamulaho limano bola, kona kuli manoñu aka kopana. Mwabona?

²¹⁸ Mulemuhe. Mushe, na si ka fa bana ba Mulimu. . . Mushe nali mbande, mi na si ka fa bana ba Mulimu lico zene siyezi ku Nuwe. Mwabona? Nana ni Linzwi la Mulimu le linca. “Mulena Mulimu na ni katani mwa lihalaupa, ni kupaka Linzwi la Hae, ni ku ni luma kwanu ku to mi lukulula.” Mi ki ha kutaha balikanyisi kuyena, inge ba likanyisa. Mwabona? Kono nana ni Linzwi la hola.

Kakuli, Mulimu naize ku Abrahamama, yena ya na nani sepiso, “Peu ya hao ika yambaela mwa naha ya kwahule, ka myaha ye mianda yemine, kono Ni ka ba potela ni kuba lukulula ka lizoho le li mata.”

²¹⁹ Mushe ali, “Cwale, Mulena Mulimu uka bulela ku na ni ku ni bonisa, mi uni bulelezi sa kueza, mi Ni ka mi bulelela.” Ali, “YALITENI! ki yena ya ni lumile.”

“YALITENI!” Isiñi “Ya nali teni, kamba yaka bateni.” “YALITENI,” tensi ya cwale, ki Linzwi la cwale. Ha ki Linzwi

lene lili teni, Linzwi le li sa taha; ki Linzwi le li liteni cwale. Mwabona? Mwa utwa nji? “YALITENI!” “YALITENI” kona Linzwi. “Kwa simuluhlo nekuna ni Linzwi, mi Linzwi nali ku Mulimu.” Ki niti yeo nji? “YALITENI.” “Mulimu uni lumile kakuba mupolofita wa Hae, kwa kupaka se kuba sa niti. Ki na kalabo kwa Linzwi le, uni bulelezi kuli nitahe kwanu mi nieze cwana.”

²²⁰ Mi hana ezize sani, Faro ali, “Kulukile, luna ni bashimani ba bañata mwa sikwata sa luna ba bakona kuezwa cwalo, nibona,” balikanyisi.

Jesu naize, “Cwale, sani si ka kutela hape mwa mazazi a maungulo,” mwabona, kuipapata lika zeswana. Mutalime yana tile wa makalelo pili. Mutalime yana pilile ni Linzwi. Kona cwalo. Kona mo li zibahalela, kacwalo mwa bona.

²²¹ Lwa lemuha, Mushe na si ka fa ze neli mwa nako ya Nuwe, “Lu ka yaha aleka cwale, kakuli lani ki Linzwi, mwa ziba. Nuwe na yahile aleka zazi leliñwi.” Batili, manoñu a na sweli kuca sani. Batili. Batili.

²²² Le ki Linzwi leli sepisizwe. Mulemuhe, kakuli liñusa le na liamuhezi kuzwa ku Mulimu, na nani Linzwi le li lemuhilwe la Mulimu ka hola yani.

Nihaiba yena Jesu na si ka bafa lico zana siile Mushe. Mushe nana ni Linzwi la hola yani, kono Mushe neli mupolofita. Kiyo fa Mulimu Kasibili, mwabona, Na si ka ba fa lico zana siile Mushe—Mushe.

Kono mutalime fela manoñu kwani mwa kopano yani, nasweli ku lwanela fateni. “Lwa ziba! Lu na ni Mushe! Ha lu lukeli kuba ni Wena.”

²²³ Ki hali, “Kambe muzibile Mushe, ne mu ka Ni ziba, kakuli Mushe na bulezi za Ka.” Mwabona?

“Ko kuna ni Situpu, limbande ki ko lika kopanela.” Limbande! Ku bulaya ko ku mezi kwa Linzwi, ona Linzwi lene lizusizwe ni kutahiswa, mi liiponalize ni kufiwa kuba Sico sa bana.

Cwale, situpu sa kale se si lobezi fani ka myaha ye mianda anda, sikaba ona fani.

Ki taba yeswana cwale! Luther nana ni liñusa la kubaka; kono, mina sishañata sa ba Lutheran manoñu tuni! Ba Baptist neba na ni liñusa; kono, mina ba Baptist manoñu tuni! Mwabona? Ba Pentekota neba na ni liñusa; ka kutaha kwa hae cwale, manoñu a Pentekota!

“Kono koku inzi Situpu, kona ko limbande lika kopanela.”

²²⁴ Muhupule, hamukoni kufepa wa Lutheran, ka mazazi afelile ani (mwa kona ka cwale), nkukwe ya Katolika. Batili, sha. Na na ni nama yenca ye mezi. Lwani neli lusika lwani.

Hamukoni kufepa ma Methodist, liñusa la ba Lutheran. Oh, batili, na sa lati nkukwe yani. Li bolile. Mwabona, Bupilo ne buzwile mwateni ni kukena ku sesiñwi fela. Lwani kona lutaka lwa kale lo lu shwile, kwa mulaho kwani. Bupilo bu sweli kuzwelapili ku zamaya.

Mane hamukoni nihaiba kufepa Munyaliwa wa Jesu Kreste za Bupentekota. Batili, haku konahali! Likopano zetezi mabuku; hakuna ze ezahala! Batili, batili!

Kakuli sepiso ki kuli, “Mi lizazi lelituna lani le li sabisa ha li kataha, Ni ka mi lumela Elia mupolofita. Uka kutisa lipilu za bana kukutela kwa Tumelo ya bo ndate hape.” “Lisepiso ze kaufela neli ezizwe mwa Bibebe, Ni ka li eza, mi kwani ki ko limbande lika kopana.” “Kaufela bao Ndate a Ni file ba ka taha ku Na.” Mwabona?

²²⁵ Jesu na sika lika sani. Kono Jesu hanatile, Na fumani manofu inza kubukani, “Luna ni Mushe ni mulao.” Mwabona? Kulukile, zani neli lico zende kwa mulaho kwani hane li bulailwe ni kufiwa ku bona. Mwabona, zani neli zende ka nako yani.

Kono se kona se ne si bulezwi ki Mushe, kasibili, yana bulaile sitabelo, ali, “Mulena Mulimu wa mina uka zusa alimuñwi mwahala mina, wa banabahenu, ikaba Mupolofita. Ku ka ezahala kuli, mutu kaufela ya si ke autwa ku Mupolofita yo ku sa Ka bulela, uka bulaiwa kuzuswa mwahala sicaba.” Mi nekuli cwalo.

²²⁶ Mutalime ka bupolofita bo bu eza mianda yesilezi mo ne butalelizwe ona kwani, za Testamente ya Kale, ku Jesu Kreste. “Ne ba tabile mazoho a Ka ni mautu a Ka.” Kaza, Ni libezi fela kuli neli zekai ze ne talelelizwe mwa liholo zesupa kamba ze ketalizoho ka zetalu za bupilo bwa Hae, bapolofita bani kaufela ne ba bulezi, ka kupetahala.

²²⁷ Kambe ne Ni ka polofita kacenu kuli sika sa kuli si ka ezahala ka silimo se si taha kuzwa kacenu, mwendi Ni na—Ni na kolo ka mashumi amabeli ya ku bona zeo hali ezahala, kamba li lukile kamba lifosahalile. Mi haiba ne Ni ka bulela ku akaleza ze ne ka ezahala, mi ni sika bulela kuli ki lili, Ni na ni siemba sa pesenti yenyinyani. Kambe ne Ni ka akaleza kubulela ze ne ka ezahala, si ni fa tohonolo ye nyinyani. Kambe ne Ni ka akaleza sibaka ko ne lika ezahalela, nitefi si sa na ni tohonolo yelikani fela. Kambe ne Ni ka akaleza kaza . . . yo si ka ba ku yena, konakuli Ni sa na ni sibaka kakutala kuli sa kona ku ezahala, haiba ha ki niti.

Mi Linzwi kaufela, haleluya, zani neli ñozwi kuama Mesia yani, ni kutalelezwa kuya ka litaku za teni. Mane konji kufitela ni kacenu, kubala Mañolo, Natilo yema mwahala mubamba, ni kubulela kuli, “Moya wa Mulimu ufahalimu a Ka kuli ni kutaze Evangeli, ni ku lukulula ba . . .” Ni kutuhelela ona fani mwahala mubamba, kakuli zeñwi za teni lipaka Kutaha kwa Hae kwa

buleli. Amen! “Lihalimu ni lifasi lika fela; Manzwi a Ka hana kufela.” Mwabona?

²²⁸ Na li yena Linzwi kwani, yana bafepa kwa mulaho kwani. Mushe na ba bulelezi Niti; kono, mwa bona, kamita ba ezanga likopano kuzwa mwa lika zani, kuli manoñu atoba. . .

Kuna ni zeñwi za Lona ze siyezi limbande lifelize kuca mi liile kwa hae. Konakuli ba libelezi kubona sika sesiñwi. “Linzwi,” ba bulela kuli, “Si lukela kutaha fa. Ne luna ni ngu maabani; luna ni ngunyana kamuso.” Mwabona se Ni talusa? “Kuna ni situpu za ngu ya kale kwani, inze inyakalala, kono luna ni lingu zetaha kacenu. Kana ikai?” Mwabona se Ni talusa? Lico za Mangeloi! Sicaba sene sicile maana zazi leliñwi, haiba ne ba likile ku ibuluka kufita kwa lizazi lelitatama, ne i sinyehanga kushasha. Kana ha mu boni mifuta kaufela, za kupetahala? Ka kuswana cwale!

²²⁹ Mulemuhe, manoñu a lizazi la Jesu ni ona na leleka mioya ya diabulosi; batoziwa fa situpu sa kale. Ki niti yeo nji? Ne ba leleka mioya yemaswe. Jesu na bulezi cwalo.

Mi muhupule, ne ba na ni bapolofita mwa mazazi ani. Kefasi, yena muprisita yomuhulu, na polofitile. Ki babakai ba baziba cwalo? Kefasi na polofita. Mulemuhe mayemo a mufuka mwa simu; u selaelwa ka tozo yeswana. Kiñi Bibehe ha ibulela kuli na polofita? “Kakuli nali muprisita yomuhulu mwaha wani.” Sibungu se si bolile, mufuka ni muutwa, lifumaneha mwahala Buloto; kono Moya noli fahalimwa hae, ona Moya o Kenile wa luli wa Mulimu. Moya o Kenile wa Mulimu noli fahalimwa hae, kuli akutaze, apolofite, ni ku bulela kuli li to ezahala; ni kulatula ni ku kokotela yena Linzwi lelipakilwe la hola.

Oh, sishemo, muzwale! Ki butelele bo bucwani bo lu lukela ku bulela lika ze, mwabona, ki kufita kai mwahala Mañolo? Ni ka akufa. Ni na ni mapampili akona kuezza lishumi fa, za Mañolo, ka mwa ku nyakiseza lika kaufela. “Lizazi ku baba lukile ni baba si ka luka, ka kuswana.”

²³⁰ Jesu naize, kwa kupaka se. “Haiba Ni leleka mioya ya diabulosi ka munwana wa Mulimu, bana ba mina ba ileleka ka mañi?” Cwale, neba nze ba lelekanga mioya ye maswe ya diabulosi. Ne ba nze ba polofita. Kana ki niti yeo? Kono neba sika Mu lemuha kuli ki Linzwi la hola, (kiñi?) kakuli Na si ka utwana ni bona.

Cwale munge Mateu 24:24, “Bokreste ba buhata,” baba tozizwe, “baka taha, mi ba ka ba bapolofita ba buhata banze ba li polofita,” mwabona, “mi ba ka puma nibona ba Baketilwe haiba ki nto yekonahala.” Mu utwile cwale nji?

²³¹ Mulemuhe bana. “Ki mañi yo bana. . . Haiba Ni leleka diabulosi ka Linzwi la Mulimu,” ili, Nali Linzwi la Mulimu, “kana bana ba mina ba likopano ba leleka ka mañi?” Cwale, mi Mulimu fela anosi ki yena ya kona ku leleka diabulosi, lwa

ziba cwalo, Mulimu anosi. Kakuli, muuna ya tiile ulukela kuba ya tiile kufita ya inzi mwa ndu. Ne ba na ni mata a kueza sani.

Mwa ziba, mwa Sinulo mwani, ili uka. . . antikreste yani yana zuhile mwa mazazi a maungulo, “Na ezize lisupo ni limakazo, ze ne pumile ni baba yahile mwa lifasi, ze ne pumile kaufela bona, Bakreste ni bao kaufela, be mabizo abona a si ka ñolwa mwa Buka ya Bupilo ya Ngunyana,” kalabo ki Mateu 24:24, “be mabizo abona a si ka ñolwa mwa Buka ya Bupilo ya Ngunyana haisamba lifasi litomwa.”

Bupilo bwani ne buli mwa mubisi wa—wa kota ye lukile yani, zene litile ka kufitela mwahala likota za miselo ni lika zeñwi kaufela, mi kufita cwalo kubeya muselo kwa halimu akota, fahalimwa kucomekiwa kwa mitai ya likopano. Mu utwile kana? Ni ka akufa. Muuna ya tiile. . .

²³² Muhupule Davida cwale, nali wa niti, ya sepahala, kulika ku ezeza Mulimu musebezi, mi kanti ha u si ka ketiwa kuli ueze cwalo.

“Bona,” ba batozizwe; kono Jesu naize, “Ba luta Lituto za kutoloka (kwa Mañolo) kwa mutu,” mwabona, isiñi Linzwi la Mulimu, isiñi Linzwi la Hae le li pakilwe; kuluta Kreste wa za kale, mwabona, sesiñwi sene sili sona.

Mi Bibe le i bulezi kuli, “U teñi.” “YALITENI,” isiñi “Ne ni liteni kamba ni ka ba teni.” “YALITENI, ona fa.” Ki yena Linzwi le lipila mwahali mo.

Nali cwalo, kwa simuluho, kono Na li mwa. . . Na li mwa—mwa matali; Na li mwa lutaka; Na li mwa makapi; kono fa cwale Umwa Bubeke.

²³³ Cwale, mukute kwa mulaho mi mulika ku pila hape? Kucwani haiba Bupilo bwani ne bu kutezi fafasi, munahana kuli Bupilo bwani (bobuzwile) hane bu ka bulela, ni ku kutela mwa sikapi sani se si omile, kukuta mi bupile hape? Ha bu ezangi cwalo. “Kakuli ha ku konahali kuli bani bene ba monyehezwi pili,” mi ha ba sika ya ka Linzwi kuya ka mo litezi kuli lito ezahala, “zani li shwile, liile; ni miutwa ni liseto zeli bu kaufi ni ku haniwa, ze mafelelezo a zona ki kucisiwa.” Ki niti yeo nji?

Cwale ka kuakufa kapili fela ka mo Ni konela.

²³⁴ Mulemuhe Liñolo cwale. Kuluta Mulimu wa ikale, mwabona, inge fela kuli balika ku pila mwa nako ya kale, sina, “Kulukile, Wesley nabulezi *sakuli-ni-sakuli*.” Kamba, “*Wakuli-ni-kuli* ubulezi *sakuli-ni-sakuli*.” Musweli ku latula Linzwi leli sepišizwe la lizazi le, ona Maana ye bonahalile hande mwa lizazi la kacenu. Balika kubeya ma waine akale abona akale ku ba Lutheran, Baptist, Pentekota waine mwa mabotela aluna amanca. Ha lina kubeleka. Mi Waine ya luna yenca, mwa mabotela abona a kale, halina kubeleka. Haiba balika ku

beya Waine yenca ye mwa likopano, bukuba bwa bona se bu bonahalile. Ha ba koni ku lieza. Li ka ba kasheza mwa halimu.

²³⁵ “Cwale, muzwale, Ni boni Linzwi la Mulimu, kuya ka kupetahala ka Linzwi!”

“Cwale, talima kwanu, muituti, haiba . . . Luna—luna halu koni kuba ni Sani.” Ned, Na sepa ubile ni ze cwalo kwa mulaho nyana. “Luna, ha lu fumani Sani mo cwale. Ne—Ne ni ka tabela kuli mwendi muye fela kwapili.” Mwa ziba. Mwabona, halina ku beleka. Lika kashezwa mwa halimu.

“Ha mu lukeli kubeya lisila lelinca fa sapalo sa kale, kakuli muka lipazula hamoho.” Mwabona? Kana Jesu na si ka bulela cwalo? Haukoni kusela Waine ye nca mwa matalo a kale. Aka panca. Waine ye nca ina ni Bupilo mwahali ku yona. Ku lukile.

²³⁶ Mulemuhe sesiñwi fa, kapili cwale, halunze lu feza mwa . . . mwa ngambolo ya luna. Mulemuhe Sinulo 16:13 kuya fa 14, haiba mubata ku i ñola. Hanina ku ba ni nako mwendi ya kuya ku zona. Ni bata kuli mu be ni niti luli ni ku yo i talima. Cwale mulemuhe, wo ki Muhuwo mwahala lunaka lwa bu Silezi ni lwa bu Supa.

²³⁷ Cwale lu . . . lu ka kwala fa muzuzu fela, haiba mwa kona fela kuitiisa nako nyana fela. Lu se lukwala.

²³⁸ Mulemuhe Sinulo 16:13 kuisa fa 14, mwahala Muhuwo wa bu Silezi ni bu Supa, “Mioya ye milalu ye si ka kena yeswana sina limbotwe” (kana mulemuhile sani?) “ne li zwile mwa mulomo wa mutu yomuñwi.” Cwale mulemuhe, kapili. Kana mu itukisize? Muli, “Amen.” [Puteho ili, “Amen.”—Mu.] Moya wa bulalu bwa bu bumulimu!

²³⁹ Cwale muzwale wa mwa likopano, ina ukuzize fela fa muzuzu. Musike mwa yema ni ku zwela fande, kwande kafo fa silimba, libaka za mawaile. Musike mwa tima tepu fa silimba sa mina. Muine fela mukuzize, mi muteeleze. Mu pepilwe ki Mulimu, mukaba cwalo.

²⁴⁰ Bulalu bwa limbotwe! Simbotwe ki folofolo yetalimanga kwa mulaho kamita. Sona ha si talimangi ko si ya; si talimanga ko si zwelela. Mwabona? Kana ha mu boni? Bulalu bwa bumulimu ne bu pepezwi kai? Muhupule, “mioya yemilalu ye masila,” mioya ya mutu anosi. Kana mwa utwa nji? [Puteho ili, “Amen.”—Mu.]

²⁴¹ Mulemuhe, ba talimanga kwa mulaho kwa Katengo ka ba Nicaea ko ne ku pepezwi tuto ya tumelo ya bumulimu, hali yo mwa Bibebe. Hakuna lika ze cwalo. Ba talima kwa mulaho kwa Katengo ka ba Nicaea kwani kwa Nicaea, Rome, kona ko ne ku pepezwi tumelo ya bulalu bwa bumulimu.

Mulemuhe ko lizwelezi. Mulemuhe. Mi bulalu bwa limbotwe za tumelo ya bumulimu, za to pepa bulalu bwa bumulimu, ma bona. Ne li zwelezi kai zani? Bulalu bwa bumulimu, “yona

dragoni,” mwabona, “sibatana,” ni “mupolofita wa buhata.” Bulalu bumulimu, zenca. Kakuli ki lili fo ne lithahile limbotwe zani? Neli lili fani? Mulemuhe, ne liliteni nako kaufela, kono ne li si ka bonahala konji mwahala Nkwana ya bu Silezi ni ya bu Supa, ku sika kwaluha kale Maswayo (Hmm?) kuli lipatululwe.

“Kakuli mwa Liñusa la lingeloi la bu supa, likunutu za Mulimu ne li ka zibahala,” lika ze kaufela za bulalu bwa bumulimu, ni likolobezo za buhata, mi lika kaufela ne li lukela ku bonahaliswa. Mulimu alutuse kuli lubone se sili Niti! Mi lusike lwa nahana kuli ki mutu ya sweli kulika kubulela sesiñwi kuli . . .

²⁴² Ni utwa kuli moya usweli kuhanyeza Sani, mwa bona. Ha ni ipuleleli zaka fela, muzwale. Ni bulela ka Lingeloi la Mulena leliliteni mwa muyaho. Yani luli ki niti.

²⁴³ Mulemuhe, bulalu bwa bumulimu! “Ona drakoni,” ki babakai baba ziba seo drakoni neili sona? Neli Rome. “Mi drakoni ya yema fa pila musali kuli i bulaye mwana hae nako ya pepwa.” Ki niti yeo? Kana “sibatana” si talusa sikamañi mwa Bibelet? Mata. Ku lukile. “Mupolofita wa buhata, mupolofita wa buhata,” lihata, le li tozizwe. Mwabona?

²⁴⁴ Neikalezi kai? Yo ki “mupolofita wa buhata,” mwa buñwi. “Mupolofita wa buhata,” popu wa pili; mi kuzwa fani kwataha “ni lona—ni lona lihule, mi neli me wa mahule,” taba kaufela.

Bulalu bwa bumulimu ne bu zuha; isiñi mwa mazazi a makalelo, ne li si ke za bonahalela mwa mazazi a makalelo, ne li zamaile ni zona mwahala zona. Kono cwale Maswayo a Supile hana tile, ni kuto kwalula likunutu zani ni ku li patulula; fani kona “fo limbotwe, mioya ye milalu ye sika kena sina limbotwe, hane itilo iponahaza ili yona,” tuto ya bulalu bwa bumulimu ku lwanisana ni Niti. Mwabona? Huh!

Mwabona ko li zwelela? Mwabona ko li kutezi? Katengo ka za Bulapeli. Kaufela bona ki mizwale, nihakuli cwalo; mioya yeswana, taba yeswana.

Mi amubone. Za puma luli, kueza limakazo! Mi ye ki mioya ya diabulosi yeile mwa milimu kaufela ya lifasi, inze beleka limakazo, ku ba puma mwa lizazi la mafelelezo, mi ika kondisa ka kueza cwalo. Ki sikamañi sana bulezi Mulimu ka moya o maswe wani?

Ali, “Ni kaya ni kene mwa milomo ya bapolofita ni kuba eza kuli bapolofite buhata, kutisa kuli Akabe azwele kwande mi ayo bulaiwa.”

²⁴⁵ Mulimu ali, “Zamaya. Uka yo kona. Uka ba kolwisa kuli ba lumele. Ha bayo fa Linzwi lani, ka kukala.” Mwabona? “Zamaya, kakuli uka yo mu susueza. Ki wena ya ka yo eza zani, ha mu ka fita mwahala bapolofita ba buhata bani, kakuli uitingile ku bona. Mi hakuna sa ziba ka Linzwi, kamba mane nihaiba kulika

ku ituta sika ka Lona. Hakoni kueza cwalo, kakuli ki muutwa, ka kukala.” Mwabona? Mwabona? “U ka kondisa.”

²⁴⁶ Mutalime kwanu kwa limbotwe za buhata ze, ku talimela kwa mulaho, “Kiñi, mwa ziba se ne ba bulezi kwa mulaho kwani kwa Nicaea?”

Hanina taba ka se ne ba bulezi ka zona, kwani kwa Nicaea. Ni bulela sene babulezi kwanu fa Lubona lwa Mulimu; sene sikaba teni, isiñi sene siliteni; se sikaba teni, kakuli Yena ki “YALITENI.” Mwabona?

“Buhata.” Mutalime ku sani. Huh! Mulemuhe ko ba zwelezi.

²⁴⁷ Cwale muteeleze hande. Lwa bona hande, kasamulaho wa Maswayo a Supile ha sa kwaluhile, sani neli ku patulula kunutu yani. Bulalu bwa bumulimu bwani ki sikamañi? Mwabona? Ki kai ko ne likile zabizwa kuli bulalu bwa bumulimu? Mwabona? Ki kai mwa Bibebe ko I kile ya bulela linzwi lakuli bulalu bwa bumulimu? Kikai ko ku kona kuba Balimu babalalu, kuli lu lapela Balimu babalalu kwanda kuba mahedeni?

Kana bakona ku kauhana cwani, fani ha Na bulezi kuli, “Na ni Ndate Lu nto Iliñwi?” “Haiba ha mulumeli kuli ki Na Yena, mu ka shwa mwa libi zamina, mwabona, kusa lumela kwa mina.” Sibi ki kusa lumela. “Muka shwa mwa kusa lumela kwa mina.”

Oh, mina muli ki Na mañi, mu bulezi kuli Ni zwelela kai,

Oh, ki kuli mwa Mu ziba Ndate, kamba mwakona ku bulela Libizo la Hae?

Kina Palisa ya Sharoni, Naleli yebenya Lilungwe la Kakusasana.

Kana mwa kona kubulela Yo ali Yena?

KINA yana bulezi ku Mushe mwa sicacani se si tuka Mulilo,

KINA Mulimu wa Abrahamama, Naleli ye benya Lilungwe la Kakusasana.

KINA Palisa ya Sharoni, oh, mubulela kuli Ni zwelela kai;

Oh, ki kuli mwa Mu ziba Ndate, kamba mwakona kubulela Libizo la Hae? (Amen!)

KINA Alfa, Omega, wa Makalelo kuzwa kwa Mafelelezo;

KINA pupo kaufela, mi Jesu kona Libizo la Hae.

²⁴⁸ Yani ki niti. Hakuna bulalu bwa bumulimu! Batili, sha. Yani ki taba ya buhata.

Maswayo Asupile, ki kukwalula makunutu ani “alukela kufeliswa,” kubonahalisa kakutala. Liswayo li kwaluhile; ngandaleza, kubonahalisa kakutala, ku patalalisa Niti ye

patilwe yeo Maswayo apatile ka myaha ye kaufela, mwahala likeleke zani ni likopano.

“Lihule le lituna,” la Sinulo seben- . . . Nali mañi yani? Kono yena ki “YENA MAHE MAHULE,” ni yena. Mwabona?

²⁴⁹ “Cwale, mu libiza kuli ‘manoñu,’” mu li, “Muzwale Branham.” Ki niti yeo.

Kono, muhupule, linoñu ki nyunywani. Li tozizwe kuli lino fufanga, ni lona. “Mioya yemibeli ikaba bu kaufi hahulu kuli ipume ba Baketilwe . . .” Linoñu ki lelituna sina—sina mbande. La kona kufufa sina mbande; mi litozizwe kuli lifufange, kamba kukutaza, kamba kupolofita, mulemuhe, ka kuswana fela sina mbande. Kono halikoni kulatelela butelele bwa kulenda sina mbande. Batili, batili. Haiba likona kulika ku likanyisa mbande, bukuba bwa lona bu ka bonahala. Eeni, sha. Halikoni ku likanyisa mbande.

Oh, lakona ku bulela kuli, “Ni lumela ku Jesu Kreste kuba Mwana Mulimu. Ni lumela ku Mulimu Ndate, Yamata, Mubupi wa lihalimu ni lifasi; Jesu Kreste Mwana Hae,” ni zeñwi cwalo. Oh, luli, bakona kueza zani. Kono cwale kucwani ka Yena kakuba ya swana maabani, kacenu, ni kuyakuile? Mwabona?

²⁵⁰ Mbande ki nyunywani ye i pitezi hande. Hakuna yeswana ni yona, fa lifasi. Mwabona? Yona—yona . . . Haiba linoñu likona kulika ku i latelela, kamba nyunywani yeñwi kaufela, ika cancauka kupazauha. Bukuba bwa yona bu ka bonahala, luli kaniti. Ika panca haikona kulika kunwa Waine yenca mwa matalo akale. Mwabona, ya kona kupanca. Ika fateha ni kuwa. Ha i sika pangiwa, ha i koni. . . Mubili wa yona no sika beiwa hamoho fa sibupeho sesikona kuswala mayemo ayona mwa halimu mwani. Haifita mwa mbyumbyulu mwa halimu mwani, haiba neisika bupiwa cwalo, ku tomiwa, ku lemuhiwa, kubupiwa kuba mbande, ika panca mwa liembaemba. Mwabona? Mafufa akona ku comauha kwa mafufa ayona, mi likona kuwela fafasi. Luli. Halikoni kulatelela mbande, ka kulenda. Haiba likona kulika cwalo, bukuba bwa lona buka bonahala. Yani ki niti. Hamukoni.

²⁵¹ Kiñi? Halikoni kubona sina mbande. Ki bunde mañi bobuli teni ka kulika kutula hahulu, mi hamukoni kubona fo muinzi hamuli mwa halimu? Mi haiba likona kulika, nihaiba kulika ku likanyisa mbande ye, mwa mbyumbyulu, li ka ba sibofu kuli mane lika palelwa kuziba fo lizamaela. Yani ki niti. Lika kangauka ni kuhuwa, ni kuzwelapili; kono aku bulele fela Linzwi ku yena, mushimani, kwani kona ko ku ka bonahalela bukuba bwa hae.

Mu bulele ni yena ka za kolobezo ka Libizo la Jesu Kreste, kamba, Yena kakuba ya swana maabani, kacenu, ni kuyakuile, kaufela—kaufela sina cwalo, ni ku mubulelela. “Kiñi, oh, cwale mulibelele fela fa muzuzu!” Mwabona? Oh, eeni, fani mafufa a

hae aka comauha kuwa. Mwabona, uka tula tula ni kupolofita, ni kupolofita, ni kuleleka mioya ya diabulosi, ni kubulela ka malimi, ni kuhuwa, ni kuzwelela pili, kumata mata kafa ni kafa fafasi. Kono musike mwalika ku likanyisa kufita fa halimu Fani; kiñi, kaniti muka zibahala.

Ibo, utomilwe. U tozizwe. Wa kona kufufa. Wa kona ku ipabalela iliyena, kupahama kufita fani, kono isi . . . ka kulenda hahulu. Mwabona, wa kona kuca nkukwe, kono hakoni kuca Nama ye nca ye mezi yezwelela kwa Lubona.

Ki sibofu. Yena ulendile luli, kono ha zibi sa lendezi cwalo. Mwabona, ona Moya oswana wani nowezi fahalimwa hae, sina pula, ku mupanga buloto; yena ha ki buloto ka kukala. Uka panca. “Oh, Hanikoni kuya ku ze . . . Oh, batili, sha! Na ziba Mualafi Jones naize kuli . . .” Ku lukile, muzwelepili cwalo. Mwabona? Muzwelepili cwalo, haiba mulata.

²⁵² Batili, mulemuhe, ha si ka pepwa, kamba ku yahiwa, kamba ku lemuhiwa, fa kuba nyunywani ya mufuta o cwalo. Wa kona . . . Ikona kuba . . . lemune yemelile fa kota ya olonji, kono yona haisika zwelela kwa mibisi. Ki sika sesi ekelizwe. Mi ha bafitile fa butelele bwani mwa likopano za bona kuli habakoni kubona Linzwi la Mulimu le li pakilwe, fani kipeto bukuba bwa bona bwa iponahaza. “Oh, lika zani, Liseli fahalimwa toho, ni zeñwi cwalo kaufela, oh, Ki bukuba.” Mwabona? Li zibahalile.

²⁵³ Ha si ka lukisezwa kuli abone kufitelela fani. Ukona fela kubona kufitela ka magilasi a kopano ya hae ze ika mulumeleza ku bona. Kono, kasamulaho wa fani, uba sibofu sina sikampafwa. Fani kona fo bukuba bwa hae buka bonahalela. Mwabona? Sani kona sa kona kuinela mbande luli kuli ace. Eeni, sha. Kwani kona ko limbande za niti, ze ketilwe lika bona seo ali sona. Ha sa koni kunga Linzwi lani, ba ka ziba hande kapili kuli ki linoñu la mwa likopano.

²⁵⁴ Kiñi, kiñi hasakoni kufufa? Kakuli, mutalime kusabile acanga. Ubile acanga ze bolile linkukwe za likopano. Zani halina—zani halina kufa moya kwa mubili wa hae, halina kumubeya mwa buiketo bwa moya, mwa manzwi amañwi, kwa kumulwala mwa halimu a shutano ya likopano. Mwabona? Mwabona, yena usweli fela kuca lico ze bolile; mubili wa hae upangilwe ka ze cwalo. Hakoni kuya mwa halimu mwani ko ku na ni Nama yenca ye mezi yani ye lwaliwanga ki mbande. Yena hakoni fela kueza cwalo. Mwabona?

²⁵⁵ Sani sitaleleza Mateu 24:24. Wa fufa, kutulela mwa moya, kunataka mafufa ahae, kono yena hakoni kufita fateni ka bupahamo bwani. Mwabona? Yani ki niti. Mwabona, hakoni kuya, hakoni kufita fahalimu halimu kuli ange Maana yenca. Yena ukona kuca maana ya kale yewezi mwa mubu, tushakame twa kale totu hatilwe mwendi sunda yefelile, ni kweli yefelile, kamba myaha ye mashumi amane afitile, to tubolile. Wakona

kuca sani, nikuya fela ku yo lwanela kuzona, ni ku keketeza ni kuhuwaka, ni kuzwelapili, kutulela mwa halimu ni kufufa sina mbande yeñwi. U tozizwe, sina nyunywani yeñwi.

Mi yena ki mufuta wa mbande, linoñu li cwalo. Lwa ziba cwalo. Yena kaniti ucwalo, kono hakoni kulatelela mbande ya luli yani. Mwabona? Yena hakoni fela kueza sani. Batili, sha. Mubili wa hae hauyo cwalo; ubile aca ze shashize nkukwe ye shutana, mwabona, mi halina kuba cwalo. . . halina ku—halina ku ba Nama yenca ye mezi, ona Maana yenca. Neikaba sesiñwi sakile abulela Luther hanaize, Wesley naize, kamba Mualafi *Wakuli-ni-kuli* cwalo. Halina kuba ku sa na bulezi Jesu ka hola ye.

²⁵⁶ Haluyeñi cwale, lukwale. Ba batozizwe, “Bokreste,” mwa mazazi a maungulo, kono haili “baluti ba buhata ni mupolofita wa buhata.” Mulemuhe mo li sabiseza! Cwale Ni bata kuli mubapise se; haluna nako ya kubala fateni, Mateu 24:24 ka Timotea wa Bubeli 3:8.

Mateu 24:24 iize, mwa mazazi a maungulo, mwabona, “Ku ka taha bo Kreste ba buhata,” mahata, ba batozizwe, “bapolofita ba buhata, mi ba ka eza lisupo ni limakazo,” ona cwalo sina Wa luli—Wa luli, “mi baka—mi baka bata kupuma ni bona ba Baketilwe.” Cwale mulemuhe, yani neli Jesu yana bulela.

²⁵⁷ Ki ha kutaha Paulusi, kwa mulaho wa Hae, mi uli, “Cwale, mwa mazazi a maungulo, ku ka taha batu ba bulapeli, mwabona, kuba ni mubonahalelo wa bumulumu. Mi ba ya ni basalinyana, ba baimezwi ka libi za mufuta kaufela wa litakazo za lifasi.”

Mi baka komoka, kuli, “Kiñi ha ubulela hahulu ka basali?” Oh, ki bunde. . . Ha ba Li boni ni hanyinyani.

“Ba ya ni basalinyana, ba baimezwi ki libi ni litakazo zeñata,” kuzwa kwa lika sina. . . ona za. . . Mwabona, “Mi sina Janesi ni Jambresi. . .”

Mateu 24:24, “Bokreste ba buhata,” mahata, ba batozizwe, baka eza lisupo ni limakazo ze ka puma ba Baketilwe.

“Cwale sina Janesi ni Jambresi hane ba hanyelize Mushe, kacwalo ki mo baka ezeza bakwenuheli ba tumelo ba; mihupulo ya bakwenuheli ku ya ka Tumelo.” Isiñi “ka” tumelo kakalikani. “Kono Tumelo!”

“Tumelo Iliñwi, Mulena alimuñwi, iliñwi kolobe-. . .” Hamukoni ku ba ni “Tumelo iliñwi” kusina kulumela ku “Mulena alimuñwi.” Hamukoni kuba ni likolobezo zepeli, mi haki iliñwi ya Ndate, ni Mwana, Moya o Kenile. “Kolobezo iliñwi,” Jesu Kreste. Yani ki niti. Mwabona, kolobezo ya buhata!

²⁵⁸ Mulemuhe, mulibapise hamoho cwale hamukafita kwa malapa. Cwale Mateu 24:24, Jesu wa bulela; Paulusi, Timotea wa Bubeli 3:8; ni zeñwi zeñata. Mi cwale mubapise sani.

²⁵⁹ Mi cwale mubeye Liñolo leliñwi, Luka 17:30, Malaki 4.

“Sina Janesi ni Jambresi hane ba hanyelize Mushe,” ona Linzwi le li tozizwe la hola, “kukaba cwalo ni kwa baana ba,” ha ki mutu, “baana,” baba tozizwe, “baka hana Niti.”

²⁶⁰ “Ka lizazi luli leo Mwana mutu haka patululwa.” Sinulo 10:1 kufita fa 7, muibale ha mu ka fita kwa malapa, “Liñusa la lingeloi la bu supa, likwalula Maswayo.” Ki sikamañi? Ha ki kuli lingeloi ki yena Mwana mutu; kono numwana upatulula Mwana mutu. Mwakona ku li kauhanya cwale? Fani kona fo ku bonahalela kutatafala ku mina, mwa bona. Ha ki Mwana mutu, Kasibili; kono ki lingeloi la bu supa, numwana wa bu supa, upatulula kwa nyangela ni ndopu yena Mwana mutu, kakuli Li siile sikapi. Hakoni ku Li lemuha. Ki Bubeke, Nibona, hape.

“Mi ka lizazi lani, Janesi ni Jambresi ba ka hanyeza,” ba batozizwe (balumeli ba kuikeza ni babasi balumeli, keleke ya sihalihali ni Mapentekota) kuyema ni kulwanisa Bubeke bwa niti, “kono ha mu lituhele linosi; bukuba bwa bona buka bonahala, sina bukuba bwa bona mo ne buinezi.” Mwabona? Mwa utwisisa cwale? [Puteho ili, “Amen.”—Mu.]

²⁶¹ Sinulo 10, ili, “Mwa mazazi a linzwi la lingeloi la bu supa.” Cwale muhupule, la bu supa, Lusika lwa Keleke ya Laodesia. “Muhuwo wa lingeloi lani,” mi lusika lwa keleke yani ha lu felile ka likopano ni kuba lusika lwa keleke, ha ku felile mwa likopano za Mapentekota; fani numwana wa . . .

Numwana ufi ni ufi nali sikamañi? Martin Luther nali sikamañi? Kalimelo kwa Katolika. Wesley nali sikamañi? Kalimelo ku ba Lutheran. Mapentekota nebali sikamañi? Kalimelo ku babañwi. Kana Bupilo buile kai cwale? Kwahule ni kopano. Ha ku sana sikapi; ki Bubeke bwa yona. Ki sikamañi sani? Kalimelo kwa Pentekota, mwabona, kwa kutalelezwa Mañolo a hola ye. Mwabona?

²⁶² Mulemuhe, ona lizazi luli fani numwana yo . . . Isiñi ka nako ha kala, kono ha kala ku shaela Liñusa la hae. Mwabona? Kuhoha kwa Pili, foliso; Kuhoha kwa Bubeli, kupolofita; Kuhoha kwa Bulalu, kukwalula kwa Lubeli, likunutu kupatululwa. Haku sana, hakuna siyemo sesifiwi sesituna se si kona ku patulula Linzwi, kufita bapolofita. Kono nzila inosi fela yeo mupolofita akona ku pakiwa ki ka Linzwi. Mi, muhupule, Kuhoha kwa Bulalu neli kukwalula kwa Maswayo a Supa, kwa ku patulula Niti ye patilwe mwa Linzwi. Kana mwa si bona nji? [Puteho ili, “Amen.”—Mu.]

Kifona fani, mwa lizazi lani fani sika sani hane sikanga sibaka, bani bo Janesi ni Jambresi, balikanyisi, baka iponahaza hape. Sina fela mo ne ba ezelize fani Mushe hana bonahalile ka Linzwi la pili, ku to Li bulela; ba bonahala ku Li likanyisa. Ona cwalo ka swanelo. Cwale mwabona seo Mateu 24:24 ili sona? Mwabona, ba batozizwe!

263 Cwale kuna ni lika zetalu ze lu ka bulela lusika kwala kale. Se ki sona. Ni bata kuli muteeleze ka tokomelo halunze lu kwala. Lika zetalu, muhupule, lika zetalu litalelelizwe. Lika zetalu liyemi fapila mina ona fa cwale.

264 Sa pili. Lifasi liinzi mwa buino bwa Sodoma. Jesu naize lika ezahala. Mutalime kwa ku lyangana; bahame ba luna balika kueza inge baana; baha ndate balika kueza inge basali, za sisali; ze bolile, ze masila, buipi, kutasezwa ka diabulosi, mi haba zibi. Biblele ibulezi kuli lika ezahala, mi kwani kona ko li fumaneha.

265 Sa bubeli. Ki mwa hola yani, kuya ka Mañolo fa, yani Janesi ni Jambresi ba bonahala. Sa buleli.

266 Sa bulalu. Ki mwa hola yeswana yani fo Mwana mutu ha patulula.

267 Ki yani fani mulumeli wa mina, mulumeli wa kuikeza wa mina yo, ni ya sa lumeli wa mina. Kuna ni Linzwi leli yemi hande, lelipakilwe; kuna ni mulumeli wa kuikeza inza Li likanyisa; mi kiyani fani ya sa lumeli i nza hanyeza sika kaufela.

Kono kukaba Liseli ka nako ya manzibwana,
Nzila ye ya kwa Kanya kaniti mu ka ifumana.
(Ki niti yeo?)

Linaha za zikinyeha, Isilaele wa zuha,
Lisupo zeo Biblele yaluna neilubulelezi;
Mi mazazi a Bamacaba a balilwe (Sodoma), ka
mikokolombwa ye miñata;
Mukutele, kwa hae O mina muhasani, muye
haenu.

Lizazi la kuliululwa li fa kaufi,
Lipilu za batu za kalelwa, ka sabo ye;
Mutale ka Moya wa Mulimu, mutukise lilambi
za mina limonyehe, (kuli mukone kubona
Linzwi la hola,)
Mutalime mwa halimu, kuliululwa kwa mina
ku fakaufi!

Bapolofita ba buhata ba puma, (nebaize kuli
bakaba teni fa; baba tozizwe), Niti ya
Mulimu ba ilatula,
Kuli Jesu Krete ki Mulimu wa luna.

Zani ki, ha ba Li lumela. Biblele i bulezi kuli kukaba taba yani fa. Ki fa cwale!

Kono lu ka zamaya ko ba apositola ba zamaile.
(Liseli leliswana! “Ni ku kutisa Tumelo ya bo
ndate kwa bana.”)

Lizazi la kuliululwa lani li fakaufi, bu kaufi
 hahulu,
 Lipilu za batu za ngangama ka sabo, (lifasi la
 kena mwateni);
 Oh, mutazwe ka Moya wa Mulimu, mutukise
 lilambi za mina limonyehe.
 Mutalime mwa halimu, kuliululwa kwa mina
 ku fakaufi.

Mwa lumela cwalo? [Puteho ili, "Amen."—Mu.] Halu inamiseni litho zaluna kanti.

²⁶⁸ Kwande ko ku kaya Liñusa le, kuzwa kwa neku la Likamba la Upa kuya kwa Wiko, kuzwa kwa California kuya kwa New York, kuyopunya ni kwa Mboela, ku kambama ni kwa Mutulo, ku yo fita ni kwa libaka za bahasanyi, mi ni kafo Li kaya kaufela, mi ni mwa tabernakele ye. Lu ba botana. Haluna lika zetuna, zende, za mapalisa, ni litukiso za mazimumwangala. Lu lika fela kueza zende ze lukona. "Kono bao kaufela Ndate a Ni file ba ka taha."

²⁶⁹ Cwale, Ni bata muzibe kuli ye ki niti, ni mina baba teezeza kwa tepu ye. Mwendu munahanile kacenu kuli Ne ni ipulelisa fela zani ka na muñi, kakuba kuli Ne ni lukisa Liñusa le. Hanina zeñwi za kueza ka Yona ni hanyinyani, haki sesiñwi kono ki linzwi fela. Mi, linzwi laka, mane li lwanisana ni kuatula kwaka kokunde; Ne ni bata kuba ya swasa. Kono ki tato ya Ndate ye Ni shaela kueza, ni ku susueza ku eza.

Ne si na Ya na bonahalile kwa nuka; Ne ni yemi fela fani ha Na iponahalize. Ha ki na Ya eza lika ze ni ku bulela lika ze ezahalanga ka swanelo mo libelanga; Na ni banga fela fa kaufi Ha lipetanga. Na nenili fela linzwi la Na itusisa, kuli ni Libulele. Ne si se ne Ni ziba; kono ki ze Ni ipile na muñi, kuba sa Na bulela kusona. Ha ki na, ne si lingeloi la bu supa, oh, batili; neli ponahazo ya Mwana mutu. Ne si lingeloi, liñusa la hae; neli kunutu yeo Mulimu na patuluzi. Ha ki mutu; ki Mulimu. Lingeloi ne li si Mwana mutu; nali numwana ya nazwa ku Mwana mutu. Mwana mutu ki Kreste; Ki Yena ye musweli kuca ku yena. Ha mu ci za mutu; mutu, manzwi a hae aka palelwa. Kono musweli ku ca fa Linzwi la Mubili le li sapalelwi la Mwana mutu.

²⁷⁰ Haiba hamusika kula hande ka Linzwi kaufela, kuli limife mata aku fufa fahalimwa likopano ze kaufela ni lika za lifasi, kana ka nako ye muka eza cwalo, halunze lu lapela?

²⁷¹ Ndate yomunde, ye ki taba yetata. Ha ku konahali kuli mutu aeze cwalo. Wena wa ziba lika kaufela. Mi Na Ku lapela, Mulimu yomunde, kuli lisike zapala ku utwahala. Kono, mwa Liseli la Linzwi la Hao, mi sicaba ha si zamaye.

²⁷² Mi, Mulimu Ndate, Na ha ni zibi kuli ba Baketilwe ki bafi; Wena wa ba ziba. Na ha ni zibi kuli Kutaha kwa Hao ki lili. Kono Ni ziba kuli No ize kuli lika ze halika nga sibaka, mahata, ba batozizwe ba; isiñi fo ne li kalezi.

Mushe na ba siile fela banosi, kakuli neku sina sa na ka eza ka bona. Na konile fela kubulela so No bulela. No mu bulelezi kuli abize linda; mi Ni bona ba eza zeswana. No mu bulelezi kuli afetule mezi kuba mali; mi ba likanyisa ni bona. Mushe yena na lwezi fela, Linzwi ka Linzwi, sina ha No bulezi, kono he No li Wena Yana ezize bukuba ku bonahala.

²⁷³ Cwale, Ndate, Wena u Mulimu, niteni. Linzwi leliswana lakuli se si ka ezahala mwa mazazi a mafelelezo. Batu babañata baba sephala, sina ha ne lu bulezi la Sunda yefelile, kubeya lizoho la bona kwa Aleka yani fa sikocikala sesi nca, mi isiñi maheta a ma Levi, na wile mi ashwa, “ku shwela mwa sibi ni mwa bumaswe,” ku kananisana ni lizwalo la bona bañi.

²⁷⁴ Bakutazi babañata baba inzi mwa palo ye, ba balile Linzwi lani, ni kuapula likepe kapili; kwa kusaba kupanca, kakuziba kuli uka latehelwa ki mayemo a hae mwahala sicaba kwa nyangela, ni keleke ya hae ni ka kopano ya hae. Mulimu alutuse kuli lusike lwa eza zani!

²⁷⁵ Kenisa pilu zaluna, Mulena, kuzwa kwa masila kamukana a lifasi. Mulena, Ni yema ni itukisize ku keniswa. Ni yemi ka ku itukisa, ni keleke ye ni bao kaufela baba teezeza mwahali, ni yo kaufela ya ka teezeza kwa tepu ye. Ni yemi, Mulena, mi ni kupa kukeniswa. Mulena, u niise kwa ndu ya mubupi mi uni lobake mwa liemba, unibupe kuba mutanga Yo tabela.

Kakuli, Mulena Jesu, “Na ni mutu wa milomo ye masila,” sina Isaya hana lilile, “ni pila ni sicaba sa milomo ye masila; mi bumai ki bwaka, kakuli Ni boni sinulo ya Mulimu ha ipatuluha,” sina Isaya hana boni Mangeloi mwa Tempele. Ni boni mafelelezo a nako, Mulena, mi ni maibile na ni lubasi lwa ka; ni maibile ni sicaba sahesu. O Mulimu wa Kuyakuile, ulu utwele butuku. Na ikupela hamoho ni sicaba. Lusike lwa shwa ni baba sa lumeli, kono lupile ni balumeli.

²⁷⁶ Kopano kaufela, Mulena, muuna kaufela kamba musali. . . Ha ni koni kukupa kuli U fuyole kopano, ha Ni ziba kuli Wa i lwanisa. Kono Ni kona fela kubulela kuli, Mulena, haiba Una ni yeñwi ya lingu za Hao kwande mwahala zona, ha li utwe kwa tepu ye. Ha ba I teezeze, Mulena, mi ba U twisise ka kutwisiso Yo ba file, mi habazwe mi ba Ku amuhele. Mi basike ba ipumelwa ki bubofu bwa lizo za lizazi le. Basike ba lika kuca sesiñwi sa. . . kamba situpu sa lizazi leliñwi. Ha ba lwale Linzwi.

Yani kona nzila yeo Bafalisi ne ba Ku kokotezi, Mulena. Ne ba nga situpu sa lizazi la Mushe, ni ku lika ku lwanela fateni; kasamulaho ha No file mufuta wani, mwa lihalaupa, kwa maana yenca ye mezi busihu ni busihu, kotalusa lusika kaufela. Kwani kona ko ne ba palelezwi. Ne li ba kenyzize mwa kozi. Ne li ba bulaile, ka kuca lico ze shashize zani.

Mi, ka moya, si ezanga sika se si swana kacenu; kuba bulaya, ka moya, ni kopano.

Ulu tuse, Mulimu yomunde. Kaufela li mwa mazoho a Hao cwale. Ka Libizo la Jesu Kreste.

²⁷⁷ Ni litho za luna zeinami, luka opela cwalo hamunze mu ba ni buiketelo bwa mina. Kana mu ka ya musipili kaufela?

Ni utwa Mupu- . . . (mi Yena ki Linzwi) . . . -lusi
ha bi za, Ni utwa . . .

“Oh, Ni yambaezi nako yetelele, kono, luli, ona fa Na Mu utwa, ‘Mutahe ku Na, mina kamukana baba yambaela cwalo.’ Muutwe, ‘Munge sifapano sa mina, mu Ni latelele zazi ni zazi.’ ‘Eeni, ni ha Ni zamaya mwa musindi wa muluti wa lifu, Ha nina kusaba bumaswe; mwahala mafulo amatala a miluti, mi ni kwa mezi a kuzize.’”

Mi kwa Ni isa Ni ka . . .

“Mulena, Ni bona bukuba bwa bulalu bwa bumulimu bwani. Ni boni lifasi kaufela lizezwi mwateni; bucwani bumelile kai ni kai. Kono ko u ka Ni zamaisa cwale, Mulena, Ni kaba sina bani mwa Likezo 19. ‘Hane ba utwile Se, ne ba kolobelizwe sinca ka Libizo la Jesu Kreste.’”

. . . latelela, (“Ni fitile libima mwa musipili,
Mulena, zeñata ni amuhele ku Wena.”)
Cwale Ni kaya ni Yena mwa musipili kaufela.

[Muzwale Branham ukala ku ñuñuna *Mwa Ka Ni Isa—Mu.*]

²⁷⁸ Mulimu yomunde, Na sepa sani si zwelela kwa pilu yaka. Na sepa si zwelela ni kwa pilu ya mutu ni mutu ya sweli kuopela ka nako ye, mwendi babañata baba ka teeleza tepu ye, baba siyo kamba baba sa liutwi ka nako ye. Halube baba lakaza, Mulena, hakuna taba ka teko. Ali, “Sina mutu yaya kwa ku kopana ni mpi yeñwi, musole, mulena; pili uina fafasi ni kubala, wa kona kueza cwalo, kana wa kona kutuhela lika za lifasi? Kana mwa kona ku i toboha, ku kena mwa mpi ya Mulimu ya Linzwi le liñozwi, ku zamaya ni masole ba Hae, kufufa ni limbande za Hae?” Akulumeleze cwalo, Mulena, ka Libizo la Jesu.

²⁷⁹ Mwa lumela nji? Mwa Mu amuhela? Ku lukile. Lu ka mi bona kwanu hape, busihu bwa kacenu, haiba Mulena alata. Kana mwa lumela kuli yeo ki Niti? [Puteho ili, “Amen.”—Mu.] Kana za utwahala hande? [“Amen.”]

Konakuli unge Libizo la Jesu,
Mwana ya mwa manyando;
Li ka kufa kozo ni nyakalalo,
Mu linge kaufela- . . .

Cwale, muswalane mwa mazoho ni yomuñwi ya inzi mabapa ni mina cwale.

Libizo Lelinde, O kwa munati!
Sepo ya mwa lifasi, sepo ya mwa lifasi, tabo ya
kwa Halimu;

Libizo Lelinde, O kwa munati!
Sepo ya mwa lifasi ni tabo ya kwa Halimu.

Ka Libizo la Jesu lwa kubama,
Kuwa ka mañwele kwa mautu a Hae,
Mulena wa malena mwa Halimu uka apesa . . .

(Yena ki Mulimu, kasamulaho)
Fani musipili wa luna ha ufela.

Libizo Lelinde, Libizo lelinde, O kwa munati!
O kwa munati!

Sepo ya mwa lifasi ni tabo ya kwa Halimu;

Libizo Lelinde, O kwa munati!

Sepo ya mwa lifasi ni tabo ya kwa Halimu.

²⁸⁰ Na sepa kuli bakutazi kaufela ne ba zibahalizizwe kakusasana cwana, ba zibahalile.

Mutu ha sa lapezi ka sunda kaufela, ku bilalela ka ze, kubona Mañolo a, mi ni kuyema fapila hao. “Mi bumai bwa ka,” Paulusi naize, “haiba ha Ni kutazi Evangeli.” Kwa mafelelezo a musipili wa hae, ki hali, “Ha ni sika swabela ku patulula Likatulo za Mulimu kaufela ku mina sina mone Li fezwi kuna.”

²⁸¹ Na kamita ni libalanga ku lemuha lika, ku tahisa, ku neela limbututu.

Billy ali, ka zazi leliñwi, muuna yomuñwi ataha, ali, “Ni bile nitahanga kwanu seli lilimo zepeli, kuba ni kuneela mbututu waka.”

Billy ali, “Usike wa nahana se si maswe ka sani. Ni nani mbututu, wa eza mwaha; ha si ka neelwa kale, ni yena. Kacwalo Ni ka libelela fela kufitela ahule pili kuli wa kona ku zamaya ka yena muñi, Na sepa.”

²⁸² Kacwalo lufumane muzwale, kezeli, ha ki—ha ki, mwabona, Ni . . . Taba iliñwi, lu lukela kuneela bana ba luna.

Lu lukela kukolobeza mutu kaufela. Kuna ni lisa; mezi ki a. Haiba musamba kuba, ki sikamañi se si ka mi hanisa? Ki a mezi. Mutahe ka nako ona ye. Musike mwa libelela kufitela busihu bwa kacenu; mutahe ka yona nako ye. Kuna ni muuna ya yemi mo uka kolobeza mutu kaufela ya bakile ni kuba ni buipuleli. Haiba mubile mu kolobezwa linako zeñata nyana, ba ka mi kolobeza ka Libizo la Mulena Jesu Krete ka swalelo ya libi. Mwabona? Luna lu cwalo.

²⁸³ Kono, mwabona, Liñusa li mwa pilu yaka. Ni lukela ku Li longola. Wani kona mulelo waka ka kutala, hakuna taba ka seo musala ka abulela, seo banake ba bulela, seo mukutazi waka abulela, seo muhaesu kaufela abulela. Ki Mulena ka. Ni lukela ku longolela Sani kwande. Wani kona mulelo waka ka kutala.

²⁸⁴ Mi cwale, linako zeñata, Ni palelwanga ku lemuha bakutazi. Na sepa mwendi . . . muzwale wa luna, Muzwale Neville, muuna yo munde. Ni mizwale yemiñwi ye kwanu, lu tabile ka kuba ni mina.

²⁸⁵ Haki kuli lwa kangisana ni mina, muzwale, kuba ba bashutana. Buñata bwa mina mo busihu bwa kacenu mwa kona kuba bakutazi ba tumelo mwa balimu babalalu. Halu bati ku minyemela. Lwa mi lata. Kambe ne lu sa milati, haiba ha Ni sika lumela cwalo, Ne ni si ke na siya keleke ye kufitela Ni ba fafasi ka mautu aka ni kubulela kuli, “Mulimu, uni eze ya lukile.”

Ha ni bati likañi lani, moya wa baitati kuli ukopane ni moya waka. Ni bata kuli moya waka ube olukile mi o kenile, lilato la kulata bana bahesu, lelikenile ka Moya o Kenile. Cwale, haiba mutu ueza se si maswe ku na, zani li lukile. Mi Ni ha ni kona kuba ni tukelo ya ku mukutiseza, Hani lati zani mwa bupilo bwaka. Batili, Ni—Ni bata kuba ni lilato. Ni bata ku itukisa ku sikulula ka lilato, ka lilato leli alaba kwa buse kwani.

²⁸⁶ Ha nitalusi kuba ya shutana. Methodist, Baptist, Katolika, Presbyterian, yo kaufela uli yena, Ha ni buleli lika ze kuli ni shutane, ni be ya ikuhumusa ni mina. Haiba Ni eza cwalo, Ni muipi mi ni lukela kuba fafasi fa katala fa, ku lapela ka tata ku Mulimu.

Kono ha Ni bulela cwalo, ki bakeñisa lilato, mi Na bona ko muya. Cwale, Ha ni buleli se ka na fela, ni ku bulela kuli Na hakanyeha. Ni mifa zeli KISONA SA BULELA MULENA. Yeo ki Niti. Mi Na mi lata ka zona lika zani. Mulimu ami fuyole.

²⁸⁷ Cwale halunze luopela timana yeñwi ya pina ye, halu, lu sikaya kale. Lu bata kuli mu be kwanu busihu bwa kacenu, haiba mwa kona. Haiba hamukoni, Mulimu abe ni mina kufita lu kopana. Lu lapela fela kuli Mulimu uka—uka mi fuyola ni ku mifa zende za naha ya Hae, mwabona.

Munge Libizo la . . .



BATOZIWA BA KWA NAKO YA MAUNGULO LOZ65-0725M
(The Anointed Ones At The End Time)

Liñusa le ka Muzwale William Marrion Branham ne likutalizwe lwapili mwa Sikuwa la Sunda kakusasana, Sikulu 25, 1965, ili fa Branham Tabernacle mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi ne i hatisizwe ni kuhasanyiwa ki ba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Kreste. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleni ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org